

Iluarsiissut

Siunnersuut 11. Februar 2019-meersoq taarserneqarpoq

Iluarsiissummi Inatsisartut Allattoqarfiata inatsisinik isumaginnittoqarfianit aaqqissutissatut siunnersuutit tunngavigalugit iluarsiissutigineqarput.

Iluarsissutit pingaarutillit pillugit allaatiginnineq: Innersuussutinut aaqqiisoqarpoq oqaatitsigullu iluarsiissuteqarluni

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

1.1 Siunnersuummut tunngaviusut

Kalaallit Nunaanni tarnimikkut napparsimasunik napparsimavimmut pinngitsaaliissummik untsitsisarneq 1980-imiilli pisarsimavoq. Tarnimikkut napparsimasut nakorsarneqarnissaannut tunngatillugu pinngitsaaliissummik iliuuseqarsinnaanermut tunngasoq 2008-mi Kalaallit Nunaannut, inatsit nr. 1406 decembarip 27-ani 2008-meersoq tunngavigalugu, nuunneqarpoq. Inatsimmi tassani aalajangersarneqarpoq, inatsit taamanikkut attuuttoq tarnimikkut napparsimasut napparsimavimmi uninngatitaasarnerat pillugu inatsit apriliip 13-ianni 1938-meersoq Kalaallit Nunaanni atuutiinnassasoq, Namminersorlutik Oqartussanit maleruaqqusanit atuutilersinneqartunit allanngortinneqarnissaata imaluunniit atorunnaarsitsisoqarnissaata tungaanut.

Maannakkut atuuttoq Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisaat nr. 24, 3. december 2012-imeersoq juulimi 2013-imi atuutilerpoq. Inatsit tassaavoq tarnimikkut napparsimasut pillugit Kalaallit Nunaanni inatsit siullerpaaq, tassani Kalaallit Nunaanni tarnimikkut napparsimasut nammineersinnaajunnaarsinneqarnerannut tunngatillugu allatigullu pinngitsaaliissummik nakorsarneqartarnerannut il.il. atatillugu inatsisitigut inissisimanerat sukumiisumik maleruaqqusaliorneqarpoq.

Tarnimikkut nappaatilinnik kiffaangissusiiiaaneq allatigullu pinngitsaaliissummik iliuuseqarneq pillugu Inatsisartut Inatsisaata allanngortinnera pillugu Inatsisartut inatsisaat nr. 12, 3. juni 2015-imeersoq aqutugalugu ilaatigut ilanngunneqarput Tarnimikkut Nappaatillit Maalaa-rutaannik Aalajangiisartut aalajangiivigisaat pillugit naammagittaalliutit Kalaallit Nunaanni Eqqartuussivimmut ingerlateqqinneqartassasut, tamanna tikillugu eqqartuussisoqarfinnut i-

ngerlatitseqqiisarnermut taarsiullugu. Taamatuttaaq Tarnimikkut Nappaatillit Maalaarutaanik Aalajangiisartut aalajangiivigisaannut tunngatillugu naammagittaalliutit ingerlateqqinneqarnissaannut kingusinnerpaamik piffissaliussanik ilanngussisoqarpoq.

Inatsisartut Ombudsmandianit misissuiartortitat 2017-imi aprilimi Nuummi Dronning Ingridip Napparsimavissuani Tarnikkut Nappaatilinnut Immikkoortortaarfiani A1-imi siumut nalunaaruteqaqqaarluni misissuineq ingerlappaat. Misissuiartornerup kingunerisaanik nalunaarusiortoqarpoq, tassani ilaatigut Tarnikkut Napparsimasunut Immikkoortortaarfimmi naammaginangitsut arlaqartut, aammattaaq inatsisitigut tarnimikkut napparsimasut pillugit inatsisip aamma tamanna tunngavigalugu nalunaarutit atuutilersinneqarsimasut akornanni assortuuttut uparuarneqarput. Taamatuttaaq Folketingets § 71-tilsynia immikkoortortaarfimmi tassani 2017-imi novembarimi misissuiartorluni takusaavoq. Tamanna tunngavigalugu misissuiartortitat ilaatigut apeqquteqarfigaat Peqqissutsimut Iisimatusarnermullu Naalakkersuisoqarfiup Inatsisartut Ombudsmandiata misissuinnermit nalunaarusiaani isornartorsiorneqartut qanoq iliornikkut iluarsiiiffiginiarnerai.

Inatsisitigut assortuuttut uparuarneqartut iluarsiiiffigineqarnissaat siunertaralugu, aammattaaq Kalaallit Nunaanni tarnimikkut napparsimasut nammineersinnaajunnaarsinneqarnertunut aamma pinngitsaaliissummik nakorsarneqarnertunut atatillugu il.il. inatsisitigut inissisimaneerat pitsanngorsarniarlugit, siunnersuut manna saqqummiunneqarpoq.

1.2 Siunnersuutip imarisai ataatsimut isigalugit

Siunnersuummi tarnimikkut napparsimasut pillugit inatsimmi atuuttumi tunngaviusut ingerlateqqinneqarput, kisianni aammattaaq allannguutinik arlaqartunik ilaqarlutik.

Siunnersuummi periarfissaliissut pisariaqartoq pilersinneqarpoq, tassa nakorsat allat Dronning Ingridip Napparsimavissuani tarnikkut nappaatilinnut immikkoortortaarfianni nakorsaaneq peqanngitsillugu pisuni arlalinni tarnimikkut napparsimasut pillugit inatsit naapertorlugu aalajangiisinnaapput, taakkua tamatuma kingornatigut nakorsaanermit akuersissutigineqartussanngortillugit.

Tamatuma saniatigut siunnersuummi ilaavoq pinngitsaaliissummik nakorsaatitortitsinermit nakorsaatip toqqarneqartup sunniutaata saniatigut allamik sunniuteqarneranut qanoq naleqqiusinissamut erseqqissaat.

Taamatuttaaq oqaaseqatigiinnik aqqissuussisoqarpoq aamma naleqqussaasoqarluni tamatamani siunertarineqarluni inatsisip imarisaanik erseqqissaaneq aamma paasiuminarsaaneq.

2. Siunnersuutip immikkoortui pingaarnerit

2.1 Siunnersuutip tullerriaarnera pingaarneq

Siunnersuummi tarnimikkut nappaatillit pillugit inatsit atuuttoq annertuumik ingerlateqqinneqarpoq, tassa Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersumi aalajangersarneqartoq. Inatsimmi danskit tarnimikkut napparsimasut pillugit inatsisaat 2015-imeersoq (Inatsisitigut nalunaarussiaqnr. 1160 af 29. September 2015) isumassarsiorfigineqarpoq, taamaattorli immikkoortuni arlaqartuni allaaneruvoq, taamaaliornikkut inatsit maani nunami pissutsinut naleqqussarneqarluni.

Siunnersuummi ilaapput:

Kapitali 1, inatsisip atuuffianik malittarisassiuussivoq, tak. §§ 1-2.

Kapitali 2, tassani ilaapput aalajangersakkat pinngitsaaliissummik atuinermi aalajangersakkat nalinginnaasut, tak. §§ 3-6.

Kapitali 3, tassani nammineersinnaajunnaarsitsinermut (napparsimavimmut pinngitsaaliissummik unitsitsinermut, napparsimavimmi pinngitsaaliissummik uninngatitsinermut aamma oqqussinermut) piumasaqaatit malittarisassiuunneqarput, tak. §§ 7-13.

Kapitali 4, tassani pinngitsaaliissummik nakorsarneqarnissamut periarfissat malittarisassiuunneqarput, tak. §§ 14-15.

Kapitali 5, tassani napparsimavimmit angerlartinneqarnerup kingornatigut malinnaaffigineqarneq malittarisassiuunneqarpoq, tak. §§ 16-20.

Kapitali 6, tassani sukaterussineq il.il. (pinngitsaaliissummik sukaterussineq, nukit atorlugit pissaanermik atuineq, sernissuiniarluni sukaterussineq, immikkut nakkutiginninneq aamma immikkoortortaqarfimmi matunik parnaarsuineq) malittarisassiuunneqarput, tak. §§ 21-31.

Kapitali 7, tassani allagarsianik/nassiussarsianik, napparsimasut inaannik aamma pigisaanik, timimik satsaalluni misissuineq aammattaq pigisanik arsaarinnissuteqarneq aamma suujunnaarsitsineq malittarisassiuunneqarput, tak. §§ 32.

Kapitali 8, tassani pinngitsaaliissuteqarnernik nalunaarsuineq aamma pinngitsuugassaannigsumik nalilersueqqinneq malittarisassiuunneqarput, tak. §§ 33-34.

Kapitali 9, tassani napparsimasunik siunnersuisut malittarisassiuunneqarput, tak. §§ 35-40.

Kapitali 10, tassani naammagittaalliuteqarsinnaanermut il.il. ilitsersuineq malittarisassiuunneqarpoq, tak. §§ 41-45.

Kapitali 11, tassani naammagittaalliornissamut periarfissat aamma eqqartuussivikkut ingerlatitsisinnaaneq malittarisassiuunneqarput, tak. §§ 46-49.

Kapitali 12, tassani ilaapput atuutilersitsinermut, atorunnaarsitsinermut aamma ikaarsaariarnermut il.il. aalajangersakkat, tak. § 50.

2.2 Inatsimmi pineqartoq

2.2.1 Inatsit atuuttoq

Inatsimmi aalajangersarneqarpoq nammineersinnaajunnaarsitsineq aamma pinngitsaaliissummik allamik atuineq Dronning Ingridip Napparsimavissuani tarnikkut nappaatilinnut immikkoortotaqarfianni taamaallaat pisinnaasoq aamma taamaallaat inatsisartut inatsisaanni matumani maleruaqqusat naapertorlugit, tak. § 1, imm. 1

Inatsimmi Dronning Ingridip Napparsimavissuani unitsinneqarnermut, uninnganermut aamma nakorsartinnermut atatillugu pinngitsaaliissummik atuinerit tamarmik malittarisassiuunneqarput.

Inatsimmi § 1, imm. 1 malillugu pinngitsaaliissummik unitsinneqarneq aamma pinngitsaaliissummik uninngatinneqarneq taamaallaat Dronning Ingridip Napparsimavissuani tarnikkut napparsimasunut immikkoortotaqarfiimi taamaallaat pisinnaapput. Taamaattorli pinngitsaaliissummik unitsitsineq peqqinnissaqarfiup suliffeqarfiini allani aallartinneqarsinnaavoq. Unitsitsinerit taamaattut Dronning Ingridip Napparsimavissuani tarnikkut nappaatilinnut immikkoortotaqarfianni nakorsaanermit aalajangerneqassapput nakorsaq aggersarneqarsimasoq isumaqatigalugu.

Oqariaatsini peqqinnissaqarfiup suliffeqarfiini allani eqqarsaatigineqarput nunap immikkoortuini napparsimaviit aamma najukkani napparsimaviit. Taamaattumik aalajangersakkat inunut plejehjeminiittunut imaluunniit isumaginninnermi suliffeqarfinniittunut atuutinngillat, naak taakku peqqissutsimikkut qanoq innerat siunnersuummi ilaatinneqartussatut isiginneqarsinnaagaluartoq.

Napparsimavimmut pinngitsaaliissummik unitsitsinerit aallartinneqartut pineranni Dronning Ingridip Napparsimavissuanut nuutsitsineq nalunaaquttap akunnerisa 48-t tikitsinnagit ingerlanneqassaaq, nalinginnaasumik angallannerup tamanna pinngitsoortinngippagu. Napparsimasumik angallassineq nalinginnaasumik aallartoq siullesq aqutigalugu ingerlanneqassaaq. Taamaalluni angallassineq angallassigasuarnerit ingerlanneqassanngilaq, naak kingusinnerpaa-mik piffissarititaasoq nalunaaquttap akunneri 48-t qaangerneqaraluartut, imaanngippat napparsimasup qanoq innerata imaluunniit ulorianassusiata tamanna pisariaqartillugu. Naatsorsuutigineqarpat napparsimasup qanoq issusia tassangaannartumik pilluni qaangiukkiartussa-

soq sivikitsuinnaassasorlu taava nuutsitsineq pissanngilaq. Dronning Ingridip Napparsimavissuani tarnikkut nappaatilinnut immikkoortorta qarfianni nakorsaaneq taannaavoq, nuutsitsinerup ingerlanneqarnissaanut imaluunniit ingerlanneqannginnissaanut aalajangiisuususaq.

Siunnersuummi pinngitsaaliissummik atuineq imatut nassuiaaserneqarpoq, ilisimatitsereraluarluni taamaattorli akuersisoqarsimangitsoq iliuuserineqartut ingerlanneqarneratut. Taamaallilluni pinngitsaaliissummik iliuuseqarneq oqariaatsimut ilisimatinneqareerluni akuersinermut attuumassuteqarpoq. Oqariaaseq aammattaaq napparsimasut inatsisitigut inissisimanerat pillugu Inatsisartut peqqussutaanni tunngavigineqartoq, tak. peqqussummi kapitali 2. Oqariaatsip ilisimatinneqareernikkut akuersinerup qanoq paasineqarnissaa pillugu § 2-mi immikkut oqaaseqaatit ilanngullugit innersuunneqarput.

2.2.2 Siunnersuut matumani pineqartoq, tak. kapitali 1 §§ 1-2

Siunnersuummi inatsisitigut atugassarititaasut atuuttut oqaasertai annikitsumik erseqqissarlugit ingerlateqqinneqarput.

§ 1, imm. 3-mi ilanngunneqarpoq timikkut anniaatigisap pinngitsaaliissummik nakorsarneqarnissaa pisariaqarpat tamanna timikkut anniaatilinnut immikkoortorta qarfimmi ingerlanneqarsinnaasoq, tak. § 15. Ilanngunneqartumi qulakkeerniarneqarpoq tamatumunnga tunngavisaqartoqarnerata paatsuungassutigineqannginnissaa.

§ 1, imm. 4-mi nutaajusumi takuneqarsinnaavoq napparsimasoq tarnimikkut napparsimasunut immikkoortorta qarfimmi unitsinneqarsimasoq, Kalaallit Nunaata avataani tarnimikkut napparsimasunut immikkoortorta qarfimmu matoqqasumut nuunneqarsinnaasoq, imaappat napparsimasoq avatangiisiminut ima ulorianartigisoq Dronning Ingridip Napparsimavissuani tarnikkut nappaatilinnut immikkoortorta qarfianni uninngatinneqarnissaa illersorneqarsinnaanani. Aalajangersakkami inatsimmi atuuttoq aamma suleriaaseq ingerlateqqinneqarput, tak. § 9. imm. 2-mi atuuttoq.

2.3 Aalajangersakkat nalinginnaasut

2.3.1 Inatsit atuuttoq

Inatsimmi tunngaviusumik isumaavoq pinngitsaaliissummik iliuuseqarnermik atuinerup pitsaaliornissaa aamma ator neqartannginnissaata sapinngisamik annertunerpaajutinnissaa.

Nakorsartinnissamut suogaluartumulluunniit nammineq piomassutsimik peqataaneq tunngavivoq pitsaanerpaq, anguniagarlu taannaavoq ullumikkut anguniarneqareersoq. Taamaattumik

pingaaruteqarpoq isumaliutigissallugu iliuutsit sorliit atussallugit tulluarnerunersut napparsimasup nammineq piumassutsiminik peqataanissaanut periarfissai anguniarlugit.

Inatsimmi ilaavoq nalinginnaasumik maleruaqqusaaq nakorsap pisussaaffigisaa nammineerluni, tarnimikkut napparsimasunut nakorsarneqartunut anguniagaq aamma taakku nakorsarneqarneranni nakorsaatit atorpeqartut suunerinik peqqinnissaqarfiup napparsimaviinut unitsitsinermut atatillugu, ilisimatissallugit, tak. § 3, imm. 2, imm. 1-imut ataqatigiissillugu. Iilersuinnissamat pisussaaffiup qulakkiigaa tassaavoq napparsimasup isummernissaminut tamatumalu kingornatigut ilisimatinneqareerluni akuersisinnaanissaminut pisariaqartumik tunngavissaqarnissaa. Pinaveersaartitsinermut atatillugu matumani kissaatiginarpoq aammattaaq napparsimasup qaniginerpaasai napparsimasup nakorsarneqarnera pillugu ilisimatinneqarnissaat. Taamaattorli taamatut ilisimatitsinermi piumasaqataassaaq napparsimasup akuersissuteqarnissaa.

Dronning Ingridip Napparsimavissuani tarnikkut nappaatilinnut immikkoortortaqarfianni nakorsaaneq pisussaaffeqarpoq tarnimikkut napparsimasunut tamanut nakorsarneqarnissaaq pillugu pilersaarusiornissamik, tassani apeqqutaatinnagu napparsimavimmi pinngitsaaliissummik uninngatinneqarnerisut imaluunniit namminneq piumassutsiminnik uninnganersut, tak. § 3, imm. 3. Nakorsarneqarnissaaq pillugu pilersaarusiaq sapinngisamik piaartumik napparsimavimmut unitsinneqarnerup kinguninnguatigut suliarineqartariaqarpoq aamma napparsimasup pisariaqartitsinera tunngavigalugu ingerlaavartumik naleqqussarneqassalluni. Nakorsarneqarnissaaq pillugu pilersaarut taamaattoq paasitinneqareersimalluni akuersissuteqarnissap anguneqarnissaanut atussallugu tulluassaaq. Nakorsartinnissaaq pillugu pilersaarut pigineqanngippat taava napparsimasumit qanoq pisoqassanersoq, kiisalu pineqartup taassuma suna akuerineraa imaluunniit akerlerineraa paasineqarsinnaanngilaq.

Imatut pisoqartillugu napparsimasup nammineq piumassutsiminik peqataanissaa anguneqarnerani, taava napparsimasup isumaa nalinginnaasumik ataqqinneqassaaq, tamatumalu kingunerissallugu napparsimavimmut unitsitsitsineq pissanngitsoq aamma nakorsarneqarneq aallartinneqassanngitsoq. Pinngitsaaliissummik iliuuseqarnissamat piumasaqaatit pigineqarpata, tak. matuma kingorna immikkoortumi 2.4-imi nammineersinnaajunnaarsitsinermut tunngasoq, taava qulakkeerneqassaaq pinngitsaaliissummik iliuuseqarnerup taamaallaat pisariaqavissumut killilerneqarnissaa. Tamanna tassaavoq annikinnerpaamik periuseqarnermi atorpeqartusatur taaneqartartoq.

2.3.2 Siunnersuut matumani pineqartoq, tak. kapitali 2 §§ 3-6

Siunnersuummi inatsisitigut atugassarititaasut atuuttut ingerlateqqinneqarput, oqaasertai annikitsumik § 5-imi erseqqissarlugit.

Maannakkut paasisutissiinissaq pillugu aalajangersagaq § 38-miittoq kapitali 2-mi § 4-mut nuunneqarpoq, tassa aalajangersagaq aalajangersakkanut nalinginnaasunut allanut tulluurtumik attuumassuteqarmat.

Namineersinnaajunnaarsitsineq tunngaviumik inatsimmi § 71 naapertorlugu erseqqilluinnartumik inatsisitigut tunngavissaqartussaavoq. Tarnimikkut napparsimasut pillugit inatsimmi atuuttumi Dronning Ingridip Napparsimavissuani tarnikkut nappaatilinnut immikkoortortaqarfianni nakorsaaneq inuttut arlalinnik pisinnaatitaaffilerneqarpoq ilaatigut napparsimavimmut pinngitsaaliissummik unitsitsinissamut aamma pinngitsaaliissummik sukaterussinissamut atattillugu.

Kisiannili Dronning Ingridip Napparsimavissuani tarnikkut nappaatilinnut immikkoortortaqarfianni sulisoqarnikkut killilimmik isumalluuteqartoqarpoq, taamaattumik piviusumik periarfissaanngilaq nakorsaanermik tamatigut pigaartuusoqartarnissaa, tassa matuma siuliani taaneqartunik aalajangiinnaasumik. Tamanna pisinnaatitaaffiit isumannaatsuunissaannut aamma peqqissutsikkut suliatigut eqqarsarnartoqarpoq, tassami sulisut imatut inississinnaammata toqqaasariaqalersinnaallutik pinngitsoornani aalajangiinissamut inatsisitigut pisussaaffeqarnerminnit qaffasinnerusumik inissisimasumi, imaluunniit suliassaq peqqissutsimut tunngasoq nakorsarneqarnissamik pisariaqartitsineq pisariaqartoq pinngitsuussalluni. Taamaattumik Naalakkersuisut siunertaqarluartut isigaat inatsimmi aammattaaq isummertoqarnissaa qanoq iliortoqarnissaanut, tassa aalajangiinissamut pisinnaatitaaffik nakorsaanermut inuttut pissanngortinneqarnerani, kisianni aalajangiineq allatut ajornartumik nakorsamit appasinnerusumi inissisimasumit aalajangerneqartariaqalerpat, soorlu assersuutigalugu napparsimasoq unuakkut napparsimavimmukaanneqarpat pinngitsaaliissummik unitsinneqarnissaa siunertarjneqarluni, tassanilu periarfissaqartoqarnani pinngitsaaliissummik unitsitsinissamut apeqqut nakorsaanermut saqqummiutissallugu.

Nakorsaanerup peqannginnera soorlu assersuutigalugu napparsimanermik, feeriarnermik imaluunniit qinikkatut pisortanillu toqqakkatut suliaqarnermik patsiseqarsinnaavoq.

Tarnimikkut napparsimasut pillugit inatsisimmi § 6 siunnersuutip kingunerissavaa aalajangiinerit aalajangersakkami taaneqartut, soorlu assersuutigalugit napparsimavimmut pinngitsaaliissummik unitsitsinermut aamma napparsimavimmi pinngitsaaliissummik uninngatitsinermut tunngasut, nakorsaanermut inuttut aalajangerneqassasut imaluunniit nakorsaaneq peqanngitsillugu taava nakorsamit, nakorsaanerup peqannginnera pissutigalugu Dronning Ingridip Napparsimavissuani tarnikkut nappaatilinnut immikkoortortaqarfianni nakorsaasoqarnissamut

tunngatillugu akisussaassuseqartumik. Aalajangersakkami qulakkeerneqarpoq tarnimikkut napparsimasut pisariaqartumik nakorsarneqarsinnaanerata, aammattaaq taamatut pisoqartillugu tamanna pisariaqarpat nakorsaanerup peqannginnerata nalaani.

Nakorsaq nakorsaanerup peqannginnerata nalaani aalajangiippat, taava nakorsaanerup *piaarnerpaamik* aamma kingusinnerpaamik nalunaaquttap akunnerisa 24-t qaangiunnerini isummerfigissavaa nakorsap pinngitsaaliissummik iliuuseqarnissamut aalajangiinera, tassa imaappoq periarfissami siullerpaami. Nakorsaanerup isummenera pinngitsaaliissummik iliuuseqarneq pillugu allattaavissuarmut ilanngunneqassaaq. Taamaalilluni maleruaqqusap siunnersuutigineqartup tunngaviusumik aallaavisoq atuutsinnassavaa, tassa taamatut annertuumik pisoqarnissaanut aalajangiinerit tunngaviusumik nakorsaanerup pisinnaatitaaffianut ilaasut.

Malugineqassaaq nakorsaaneq tassaasoq suli akisussaassuseqarnerpaajusoq, tassa nammineersinnaajunnaarsitsinermi aamma pinngitsaaliissummik allamik atuinermi tarnimikkut napparsimasup pillugit inatsimmi maleruaqqusat naapertorlugit pisariaqartitsisoqarnera sinnerlugu atuisoqannginnissaanut, tak. § 34, imm. 1.

2.4 Nammineersinnaajunnaarsitsineq

2.4.1 *Napparsimavimmut pinngitsaaliissummik unitsitsineq aamma napparsimavimmi pinngitsaaliissummik uninngatitsineq*

2.4.1.1 *Inatsit atuuttoq*

Silanngajaarneq tassaavoq pinngitsaaliissummik napparsimavimmut unitsitsinissamut aamma pinngitsaaliissummik uninngatitsigallarnissamut qitiusutut piumasaqaatitut tunngavissaasoq, tak. § 5. Silanngajaarneq inunnet pineqartunut qanoq innerannik naliliinermi killiinissamut sapinngisamik ilisarnaatitut annikinnerpaatut isigineqartariaqarpoq, tassa ulorianassutsimut aamma nakorsartinnissamut ilisarnaatip equutsinneqarnissaanut atatillugu taakku tarnimikkut napparsimasunut immikkoortortaqaarfimmi nammineersinnaajunnaarsinneqarsinnaanerit.

Silanngajaarneq (isumaqatigaa tarnikkut perulunneq) tassaavoq tarnikkut pissuseq pisarnertut ittuunngitsoq. Siullermik ilisarnaataavoq piviusunik naliliisinnaanerpup allanngornera, napparsimasup avatangiisiminik aamma imminik misiginnissinnaanerminik, nammineq qanoq innerminik aamma iliuuserisaminik naliliisinnaanermut periarfissaqarneranut "piviusunut" naleqqiussilluni ajoquteqalerneq.

Retslægerådip paasinninnera naapertorlugu suliatigut atituumik isumaqatigiittoqarpoq silanngajaarnerup (tarnikkut perulunnerup) suuneranut tunngatillugu. Tarnikkut perulunnerit assi-

giinngitsut suunerinut sumut killeqarnerat pillugit tarnikkut nappaateqarnerit pillugit ilinniarfinni ataasiakkaani assigiinngitsunik isumaqarneq apeqqutaatinnagu, kiisalu ajornartorsiutit imatut: tarnimigut peruluppoq – tarnimigut perulunnigilaq aalajangiinissamut ajornartorsiutit attuumassuteqartut apeqqutaatinnagit, taamaalilluni oqariaaseq tarnikkut perulunneq pingaaruteqartumik aalajangersimavoq. Pinngitsaaliissummik unitsitsinermut aamma pinngitsaaliissummik uninngatitsinermut atatillugu tarnikkut nakorsaasarnermi napparsimanerup suussusianik aalajangiinermi silanngajaarnerup saniatigut aammattaaq ilaapput *imatut pissuseqarneq tamanna silanngajaarnermut sanilliunneqarsinnaalluarluni*. Pissuseq misissuinerup nalerpiaani silanngajaarnermit allaanerusutut immikkoortinneqassanngilaq taamaattumillu aammattaaq assinganik nakorsarneqassaaq, imaappat qanoq issusermik naliliinissamut nakorsartinnissamut aamma ulorianassutsimut ilisarnaatit tamatumunnga atatillugu eqquutsinneqarsimappata.

Piomasagaatigineqarpat imaattoqarnera "imatut pissuseqarneq tamanna silanngajaarnermut sanilliunneqarsinnaalluarluni" taava allanneqassaaq, tamatumani pineqartoq tassaavoq sammi-sami killiliussat annikitsuarsuunerat. Assigiissutsip naammassinera pissutissaqavissaguni taava assigiissuseqarnissamut piomasagaatit eqqorluinnartumik naammassinnissapput. Tamanna taamaattoqarneratut isigineqartariaqarpoq soorlu assersuutigalugu sakkortoorujussuarmik puuarrallalluni pissuseqarnermi, pissusissamisuumngitsumik tassanngaannaq iliorneq siannissutsip allangorneranik malitseqartumik, imigassamik aamma/imaluunniit tarnikkut napparsimasunut nakorsaatiniq peqquteqartumik nappaateqartutut pissusilersorneq, pissutsit inuttut inuunermut attuumassutillit, noqartarnermik nappaateqarneq pissutigalugu noqarnermi pujorsuup iluaniinneq aamma neriumajunnaarnermik nappaateqarnermi – nukillaarnermik anertuumik aamma inuunerup navianartorsiortinneqarneranik kinguneqartumik.

Silanngajaarneq imaluunniit imatut tamatumunnga sanilliunneqarsinnaalluartumik pissuseqarneq pisariaqarpoq – kisianni naammangilaq – napparsimavimmut pinngitsaaliissummik unitsitsinermut imaluunniit napparsimavimmi pinngitsaaliissummik uninngatitsinermik aallartitsinissamut atussallugu.

Napparsimasup *nakorsarneqarnissamut ilisarnaat imaluunniit ulorianassutsimut ilisarnaat pigissavai*. Tamatuma saniatigut piomasagaataavoq napparsimavimmut unitsinneqarnermi imaluunniit napparsimavimmi uninngatinneqarnermi *nakorsarneqarnissaq siunertarineqassasoq*. Taamatut piomasagaateqartoqarnera nakorsarneqarnissamik ilisarnaat tunngavigalugu nammineersinnaajunnaarsitsinissamut atuutiinnangilaq, kisianni aammattaaq ulorianassuseqarnermik ilisarnaat tunngavigalugu namminneersinnaajunnaarsitsinissamut atuuppoq.

Napparsimasoq pissuseqarnermigut *imminnut navianartorsiortissaaq imaluunniit allanut navianartorsiortitsilluni*. Imminnut toqunnissaq imaluunniit imminut ajoqusernissaq aarlerinarpata, taava napparsimasoq imminut navianartorsiortissinnaavoq. Allanut navianartorsiortitsinnaaneq ilisarnaateqarpat taava periarfissiissutigineqassaaq pinaveersaartitsinermik iliuuseqarmissaq inuit allat illersorneqarmissaat piinnarnagu aammali tarnimigut napparsimasoq mianeralugu, taanna pinngitsaaliissummik unitsinneqaruni inatsisinik unioqqutitsinissaanut illersorneqassamat. Inatsisitigut unioqqutitsinerit immaqa eqqartuussisutigut malersorneqarnermik kinguneqaratarsinnaasut.

Tarnimikkut napparsisunut immikkoortotaqarfimmi nammineersinnaajunnaarsitsinermut taarsiussineq imaattariaqanngilaq pineqartumut iliuuseqartoqassanngitsoq, imaappat ilisarnaat "allanut ulorianarnek" isumakkeerneqarluni. Tamatumunnga paarlaallugu akuttunngitsumik politiinit pineqaatissinneqarneq pisinnaavoq, soorlu assersuutigalugu tigusaaneq imaluunniit isertitsivimmiitinneqarneq pinerlussimanermik, aalakoourujussuarnermik imaluunniit tamat ornittagaanni akornusersuinerik pissuteqartumik il.il., tamannalu inunnut tarnimikkut nappateqartunut aaqqiissutissatut kissaatiginarnaviangilaq.

Nakorsarneqarnissamat ilisarnaat tunngavigalugu nammineersinnaajunnaarsitsineq pisinnaavoq imaappat, taamak iliortoqanngippat *peqqissinissamat imaluunniit malunnaateqarluartumik aamma pingaarutilimmik peqqinnerulernissamat periarfissat malunnaateqarluartumik ajornerulertussaallutik*. Piumasaqaatigineqarsinnaanngilaq silanngajaarluni napparsimanerup qaangivillugu ajorunnaarsinnaanera, tamanna imatut paasineqassaaq napparsimasup napparsimavimmi nakorsarneqarnermi kingornatigut peqqissivinnissani naatsorsuutigisinnaanngikkaa. Taamaattorli nakorsartinneq malunnaateqarluartumik peqqinnerulernermik imaluunniit qanoq issutsip tassanngaanaq ajornerulernissaata pitsaaliorneqarnera erseqqissumik tunngavissaqassapput. Nakorsartinnissamat ilisarnaatinut piumasaqaatit naammassineqartutut isigineqarsinnaapput naammaginartumik malunnaateqarluartumillu iluaallatsitsineq misigineqarpat. Piviusorsiortumik ilimagineqarsinnaassaaq napparsimasup napparsimavimmi nakorsartereernermi kingornatigut ima pitsanngortigisimanissaa, nakorsartinnerup inernerisinnaallugu napparsimavimmit angerlartinneqarneq.

Tarnimigut napparsimasoq matuma siuliani § 5-imi piumasaqaatit nassuiaatigineqartut eqquutsinneqarpata napparsimasoq napparsimavimmut pinngitsaaliissummik unitsinneqarsinnaavoq imaluunniit napparsimavimmi pinngitsaaliissummik uninngatinneqarsinnaalluni. Pinngitsaaliissummik uninngatitsineq atuutsinneqassaaq napparsimasoq nammineq piumassutsini naapertorlugu napparsimavimmi uninngasooreerpat imaluunniit napparsimavimmi pinngitsaaliissummik uninngatinneqareerpat.

Napparsimasup napparsimavimmut pinngitsaaliissummik unitsinneqareernermi kingornatigut angerlartinneqarnissani kissaatigippagu Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup nalilissavaa § 5-imi piumasaqaatit suli atortinneqarnersut. Taamaappat angerlarniarneq itigartitsissutigineqassaaq napparsimasorlu pinngitsaaliissummik uninngatinneqassalluni.

Napparsimavimmi pinngitsaaliissummik uninngatitsinissamut taamatuttaaq allamik periarfissaqarpoq, aammattaaq Dronning Ingridip Napparsimavissuani nammineq piumassusertik naapertorlugu uninngasunik. Tassani pineqartut tassaapput napparsimasut napparsimavimmut pinngitsaaliissummik unitsinneqarnissamut inatsimmi § 5-imi piumasaqaatini pineqartut namminerlu piumassutsiminnik uninngareerlutik napparsimavimmit angerlarusuttut. Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanermit inatsimmi § 5-imi piumasaqaatit atortinneqarnissaat nalilerneqarpata, napparsimavimmit angerlarnissaq itigartitsissutaasinnaavoq napparsimasorlu pinngitsaaliissummik uninngatinneqalissalluni.

Nappasimasooq silanngajaartoq nammineq piumassutsini naapertorlugu peqqinnissaqarfiup napparsimaviisa arlaanni uninngasooq angerlarusuppat inatsimmi § 5-imi pinngitsaaliissummik unitsinermut piumasaqaatit atortinneqarnerat aallaavigalugu itigartinneqarpat, taava Dronning Ingridip Napparsimavissuani tarnikkut nappaatilinnut Immikkoortorta qarfiannut § 1 imm. 2-mi maleruaqqusat naapertorlugit napparsimavimmut pinngitsaaliissummik unitsinneqarnissaa aallartinneqassaaq.

2.4.1.2 Siunnersuut matumani pineqartoq, tak. §§ 7 aamma 11

Siunnersuummi inatsisitigut pisinnaatitaaffiit atuuttut ingerlateqqinneqarput. Nunami allami tarnikkut napparsimanermik nakorsarneqarnissamut napparsimasunik nuussinissamik periarfissaliissut § 1, imm. 4-mut nuunneqarpoq.

2.4.2 Pinngitsaaliissummik oqqussinnek aamma nammineersinnaajunnaarsitaanerup atuukkunnaarsinneqarnera

2.4.2.1 Inatsit atuuttoq

Inatsimmi atuuttumi § 10 naapertorlugu uninngavimminnit qimaasimasunik aamma takkutinngitsoortunik oqqussisoqarsinnaavoq. Taamaattorli takkutinngitsoornerup paasineqarneraniit sapaatit akunnerata ataatsip qaangiutinnginnerani taamaallaat oqqussisoqarsinnaavoq. Takkutinngitsoornerup paasineqarneraniit sapaatit akunnera ataaseq qaangiutereersimappat napparsimavimmut unitsinermut atatillugu pappiaqqanik nutaanik suliaqartoqarnissaa piumasaqaataavoq. Aninissamut akuerineqareerluni pineqartoq takkutinngitsoorpat utertitsinissamut

taamatuttaa q piumasaqaataavoq, ullut pingasut sinnerlugit unnuinertalerlugu aninissamut akuersisoqarsimannginnissaa.

Nammineersinnaajunnaarsitsineq § 11 naapertorlugu ingerlaannartumik taamaatinneqassaaq § 5-imi piumasaqaatit atuukkunnaarsimappata.

2.4.2.2 Siunnersuut matumani pineqartoq, tak. § 12-13

Siunnersuummi inatsisitigut pisinnaatitaaffiit atuuttut ingerlateqqinneqarput.

Erseqqissarneqarpoq nammineersinnaajunnaarsitsinerup taamaatinneqarnissaanut nakorsaneq kisimi aalajangiinissamut pisinnaatinneqartoq. Siunnersuummi § 13-imi oqaaseqaatigineqartut immikkut ittut innersuussutigineqarput.

2.4.3 Pinngitsaaliissummik napparsimavimmut unitsitsinermi periuseq

2.4.3.1 Inatsit atuuttoq

Napparsimavimmut unitsitsinermit periuseq §§ 6-8-imi sukumiisumik nassuiaatigineqarpoq.

Tassani ilaatigut allassimavoq napparsimavimmut pinngitsaaliissummik unitsitsinissap ingerlanneqarnissaanut politiit aalajangiissasut aamma tamatumani ikiutissasut. Taamaalillutik politiit tassaapput pinngitsaaliissummik unitsitsinerup ingerlanneqarnerani periutsip malinneqarneranik nakkutiginnittussat.

Dronning Ingridip Napparsimavissuani tarnikkut nappaatilinnut immikkoortorta qarfianni nakorsaanerup aalajangissavaa napparsimavimmut pinngitsaaliissummik unitsitsinermit piumasaqaatit atuutsinneqarnerisut, aamma napparsimasoq tamanna tunngavigalugu tarnimikkut napparsimasunut immikkoortorta qarvimmut pinngitsaaliissummik unitsinneqarsinnaanersoq.

2.4.3.3. Siunnersuut matumani pineqartoq, tak. §§ 8-10

Siunnersuummi inatsisitigut pisinnaatitaaffiit atuuttut ingerlateqqinneqarput. Oqaatsitigut a-taasiakkaanik erseqqissaateqartoqarpoq.

2.5 Pinngitsaaliissummik nakorsarneqarneq

2.5.1 Inatsit atuuttoq

Tunngaviusumik piumasaqaataavoq nakorsamit pinngitsaaliissummik nakorsarneqarnerni tamani taamaallaat napparsimasut uninngasut pinngitsaaliissummik nakorsarneqarsinnaanerat piumasaqaataasoq. Taamatuttaa q piumasaqaataavoq napparsimasut taakku pinngitsaaliissummik uninngatinneqarnissaannut piumasaqaatit naammassineqarsimanissaat. Dronning Ingridip

Napparsimavissuani tarnikkut nappaatilinnut immikkoortorta qarfianni nakorsaaneq kisimi pinngitsaaliisummik unitsitsinissamut aalajangiisnaavoq, tassunga ilanngullugit pinngitsaaliisummik nakorsarneqarnerup suunissaanik sivilisussusissaanillu aalajangiilluni.

Pinngitsaaliisummik nakorsarneqarneq pinngitsaaliisummik nakorsaatitortitsinertalik, innaallagialq atorlugu sianiutinik sunniineq aamma pinngitsaaliisummik nerisitaaneq taamaallaat Dronning Ingridip Napparsimavissuani aallartinneqarsinnaapput aamma ingerlanneqarsinnaallutik.

Innaallagialq atorlugu sianiutinik sunniineq atorlugu nakorsaanissamut immikkut piumasaqaataapput napparsimasup piffissami tassanerpiaq qanoq issusia imatut inissisimassalluni inuunera navianartorsiorsinnaalluni.

Pinngitsaaliisummik nakorsaatitortitsinissaq aallartinneqassanngilaq peqqinnissaqarfiup suliffeqarfiini allani pinngitsaaliisummik unitsitsinernik aallartitsereersuni. Tamatumani pingaartinneqarpoq suliffeqarfinni taakkunani ingerlaannartumik nakorsaatitortitsinissamut periarfissap suli atuutiinnarnissaa. Taamatut nakorsaatitortitsineq pinngitsaaliisummik ingerlanneqassappat timi atorlugu pissaanermik atuineq pillugu maleruagassani periarfissaliisoqassaaq aamma iliuuseqarnerut sakkukinnerusutut eqqissinartumik kapuummik kapitinneq atorneqarpat, tak. § 22 imm. 2. Sivilisuumik nakorsaatitortitsinissamut pilersaarusiornissamut, tassunga ilanngullugu pinngitsaaliisummik nakorsaatitortitsinissamut periarfissaqarnissamut piumasaqaataavoq napparsimasumik piffissami sivilisuumi nakkutiginninnissaq, tamannalu taamaallaat Dronning Ingridip Napparsimavissuani tarnikkut nappaatilinnut immikkoortorta qarfianni illersorneqarsinnaasumik ingerlanneqarsinnaavoq.

Inatsimmi periarfissiisoqarpoq napparsimasunik pinngitsaaliisummik uninngatinneqarnissamut piumasaqaatinik naammassinnittunik timikkut anniaatinik pinngitsaaliisummik nakorsaanissamut. Taamaattorli pinngitsaaliisummik nakorsaanissamut periarfissaq tamatumani killilerneqarpoq napparsimasut inuunerat imaluunniit peqqissusiat annertuumik navianartorsiorpat. Timikkut nappaatinik pinngitsaaliisummik nakorsaanissamut aalajangiineq tarnikkut napparsimasunut immikkoortorta qarfimmi nakorsaanerup aamma timikkut napparsimasunut immikkoortorta qarfimmi pineqartumi nakorsaanerup ataatsimoorlutik aalajangiiffigissa-vaat. Tarnimigut napparsimasooq Dronning Ingridip Napparsimavissuani tarnikkut nappaatilinnut immikkoortorta qarfimmiinngippat maleruagassaq taanna naapertorlugu pinngitsaaliisummik nakorsaanissamut piumasaqaataavoq, tamanna sioqqullugu pinngitsaaliisummik u-

nitsitsinermut uppersaatiip naammassineqarsimanissaa, aamma tarnimikkut napparsimasunut immikkoortortaarfimmi nakorsaanerup pinngitsaaliissummik unitsitsinermut piumasaqaatit naammassineqarnerat aalajangiiffiisimappagu.

2.5.2 *Siunnersuut matumani pineqartoq, tak. kapitali 4 §§ 14-15*

Siunnersuummi inatsisitigut pisinnaatitaaffiit atuuttut ingerlateqqinneqarput.

Tarnimikkut napparsimasut pillugit inatsit atuuttuusoq ullumikkut ima oqaasertaqartinneqarpoq nakorsaatit misilittarneqareersimasut nalinginnaasumik annertussusilerlugit aamma sapinngisamik ikinnerpaanik peruluutaasunik saniatigut sunniuteqartartut atorneqassasut.

Nakorsaatilli allatut sunniutigisinnaasaat assigiinngisitaartuupput, oqaaseqatigiinnilu taakkunani atorneqartuni soorlu assersuutigalugu uummatikkut ajoquteqalersinnaanermut aamma nutsat ilanngartulersinnaanerisa nalorninartoqarsinnaanera immikkoortinneqanngillat.

Siunnersuummi erseqqissarneqarpoq nakorsaatit allatut sunniutigisinnaasaasa amerlassusiat aalajangiisuunngitsoq, illuatungaaticullu nakorsaatit allatut sunniutigisinnaasaasa perulunnartut amerlassusiat. § 14, imm. 4-mi ilanngussap qulakkiissavaa nakorsaatit napparsimasunut sapinngisamik annikinnerpaamik ajoqusiisut atorneqassasut.

2.6 Napparsimavimmit angerlartinneqarnerup kingornatigut malinnaaffigininneq

2.6.1 *Inatsit atuuttoq*

Inatsimmi § 14-imi allassimavoq Dronning Ingridip Napparsimavissuani tarnikkut nappaatilinnut Immikkoortortaarfiani nakorsaanerup akisussaaffigigaa napparsimasut napparsimavimmit angerlartinneqarnermik kingornatigut peqqissuunissaq anguniarlugu nakorsarneqar-nissamat imaluunniit isumaginninnikkut neqeroorutit, napparsimasup peqqissusianut pisariaqartut pillugit namminneq saaffigininnissaat naatsorsuutigineqanngitsunut napparsimavimmit angerlartitaanermut isumaqatigiissuteqarfigineqassasut. Napparsimasoq § 14-imi pineqartoq napparsimavimmit angerlartitaanermut atatillugu isumaqatigiissuteqarfigineqarnissamat peqataajumangippat nakorsaanerup akisussaaffigaa napparsimasup nakorsarneqarnissamat tunngasutigut aamma isumaginninnikkut neqerooruteqarfigineqarnissamat ataqatigiissaakkamik pilersaarusiortoqarnissaa, takuuk § 15.

Napparsimavimmit angerlartinneqarnermut atatillugu isumaqatigiissuteqartoqarsimappat imaluunniit ataqatigiissaakkamik pilersaarusiortoqarsimappat tarnikkut nappaatilinnut immik-

koortortaqrarfiup aamma pisortaqrarfiit allat, peqqinnissamik suliallit il.il. akornanni paasisstissanik, napparsimasup inuttut nammineq inuuneranut tunngasunik paarlaasseqatigiittoqartarsinnaavoq.

Sullinniakkat taakkuupput napparsimasut tarnimikkut peruluutillit peqqissutsimikkut anner-tuumik eqqorneqartussat arlaatigut nakorsarneqarnissamut tunngasunik imaluunniit isuma-ginninnikkut tapersorsorneqanngikkunik. Tamatumani assersuutitut taaneqarsinnaasut tas-saapput napparsimasut skitzofreniimik napparsimasut tamannalu ilutigalugu atonerluinermik ajornartorsiuteqartut imaluunniit inuttut inuuniarnerminni annertuumik ajornartorsiuteqartut.

Napparsimavimmit angerlartinneqarnermut atatillugu isumaqatigiissut imaluunniit ataqatigiis-saakkamik pilersaarut napparsimasup maanna siunissamilu nakorsarneqarnissamut isumagin-ninnikkullu pisariaqartitaanik neqeroorutininik imaqartariaqarpoq. Taamatuttaaq nakorsarneqar-nissamut tunngasutigut tulluurtunik neqeroorutininik oqartussaasunik pineqartunik il.il. siuller-mik ataatsimiinnissamut ullua nalunaaqutaalu ilanngullugit aammattaaq ilanngunneqartaria-qarput. Taamatullu isumaqatigiissut eqquutsinneqanngippat kina malinnaaffiginninnissamut akisussaasuunersoq kinalu qisuariassanersoq allassimasariaqarput. Kiisalu isumaqatigiissum-mi allassimasariaqarpoq qaqugu isumaqatigiissut taamaatinneqassanersoq qaqugulu naliliivi-gineqassanersoq.

Tarnimikkut napparsimasut sanngiinneraannik ikiuineq annertusiniarlugu napparsimavimmit angerlartitaareernermi pinngitsaaliissummik malinnaaffigineqarnissamut periarfissiisoqarpoq. Napparsimasut namminneq aalajangiinnaatitaanerannut ataqqinninneq tarnimikkut peruluu-tillit katsorsartinnissamik annertuumik pisariaqartitsisut, nappaateqarnerminnilli paasisimasa-qanngitsut, ilaginnarneqarnerannik kinguneqassanngilaq. Siunnersuummi pineqartumi taama-tut tarnimikkut napparsimasunik naammaginartumik katsorsarneqarnissamut tungiorneqarnis-samullu namminneerlutik ujartuisinnaanngitsunik tamanna sumiginnaanertut isigisariaqas-saaq. Inatsisitigut illersugaanissaaq eqqarsaatigalugu pinngitsaaliissummik malinnaaffiginnin-nissamut tunngavilersuutit sukangasuut atuutilersinneqarput. Tamatumuuna ajortumik inger-lasoqalinnginnissaa aamma periarfissat pisariaqanngitsumik atorneqannginnissaat qulakkeer-niarneqarput. Napparsimavimmit angerlartinneqarnermut atatillugu pinngitsaaliissummik ma-linnaaffiginninnissaaq pillugu tunngavilersuutit sukumiinerusut § 17-imut immikkut oqaase-qaatinut innersuussutigineqarput.

Napparsimavimmit angerlartinneqarnerup kingornatigut pinngitsaaliissummik malinnaaffigin-ninnissaaq pillugu nakorsaanerup aalajangiinera peqqinnissaqarfiup suliffeqarfiisa arlaanni na-

korsaaitortinneqarnissamut takkunnissamut peqquneqarnermik taamaallaat imaqassaaq. Napparsimasoq takkutinnigippat politiit ikiorsiullugit aaneqarnissaa peqqinnissaqarfimmilu pineqartumi pinngitsaaliissummik nakorsaaitortinneqarnissaa nakorsaanerup aalajangersinnaavaa. Peqqinnissaqarfimmi pinngitsaaliilluni uninngatitsineq pineqartoq sivikitsuinnaassaaq (ulloq ataaseq). Pinngitsaaliissut tassanngaannaq pisoq taamaallaat atorneqassaaq napparsimasup, tarnimikkut nappaatilinnut immikkoortortaqarfimmit angerlareernermini, nakorsaaitortiinnarnissaa peqqissusianut apeqqutaappat, tarnimikkut napparsimasunut immikkoortortaqarfimmut unitsitseqqaarnagu pisariaqartumik nakorsaaitortiinnarnissaanut allatigut periarfissaqavinnigippat.

Pinngitsaaliissummik malinnaaffigineqarnissap aalajangiunneqarnera qaammatit pingasut qaangiukkaangata nakorsaanermit naliliiffigeqqinneqartassaaq. Nakorsaanerup tassani nalilisavaa tunngavissaqartumik aarleqqutaasinnaanersoq aamma tunngavissaqartumik nalorninar-toqarnersoq qaammatit pingajussaasa qaangiunneranni napparsimasup pisariaqartitamik nakorsartinnerminik taamaatitsinissaa. Taamaattoqassappat nakorsaanerup aalajangersinnaavaa pinngitsaaliissummik malinnaaffigineqarnerup qaammatit pingasukkaarlugit angullugit sivit-sorneqartarnissaa.

Kissaatigineqanngilaq tarnimikkut napparsimasut pineqartut inuttut nammineersinnaajunnaarsinneqarnerat qaqugumulluunniit atuuttussamik akuliuffigineqarnissaa. Napparsimavimmi uninngatinneqarsimanerup malinnaaffigineqarnera pineqarmat, inatsimmi allassimavoq napparsimasup sivilunerpaamik qaammatini aqqaneq-marlunni pinngitsaaliissummik malinnaavigineqarsinnaanera. Taamatut napparsimasup pinngitsaaliissummik malinnaavigineqarsinnaaneramik qaffasinnerpaaffissaasumik killiliinikkut napparsimasumik piffissami siviluallaami pinngitsaaliissummik katsorsartinnissamik pinngitsoortitsivoq. Taamaalilluni angerlareernermi pinngitsaaliissummik malinnaaffigineqarnissaq aatsaat aallartinneqaqqissinnaavoq napparsimasup matuma siuliani taaneqartut piumasaqaatit naammassippagit.

Napparsimavimmit angerlareernermi pinngitsaaliissummik malinnaaffigineqarnissamut piumasaqaatit pinngitsaaliissummik unitsitsinissamut aamma pinngitsaaliissummik nakorsarneqarnissamut piumasaqaataasut assiginngilaat, tak. siunnersuummi kapitali 3 aamma 4. Napparsimasut silanngajaartuusut aamma kapitalit taakku naapertorlugit nakorsarneqarnissamut imaluunniit ulorianartorsiornermut ersiutinik pigisaqartut Dronning Ingridip Napparsimavissuani tarnikkut nappaatilinnut Immikkoortortaqarfimmut unitsillugit sulii nakorsarneqarsinnaapput. Pinngitsaaliissummik malinnaaffigineqarnissamut siunertaavoq taamaaliornikkut taamatut napparsimasup, napparsimanerata ima ajornerulernissaa pinngitsoorniarlugu, pinngitsaaliissummik unitsitseqqinnissaq pisariaqalerluni.

Pinngitsaaliissummik malinnaaffiginninnissamut aalajangiineq inatsisitigut illersugaanerup sakkortuunik qularnaveeqquserneqarneranik malitseqartinneqarpoq. Napparsimasoq taamaalilluni automatiskiusumik siunnersortilerneqassaaq, pineqarnerlu Tarnimikkut Nappaatillit Maalaarutaannik Aalajangiisartunut, maalaarutip tiguneraniit kingusinnerpaamik ulluinnaat arfineq marluk qaangiunneranni aalajangiisussanut, maalaarutigineqarsinnaavoq. Napparsimasup maalaaruteqarnissani kissaatigippagu pinngitsaaliissummik malinnaaffiginninnissaq aallartinneqarsinnaanngilaq Tarnimikkut Nappaatillit Maalaarutaannik Aalajangiisartunit pinngitsaaliissummik malinnaaffiginninniarnepup akuersissutigineqartinnagu. Tarnimikkut Nappaatillit Maalaarutaannik Aalajangiisartunit napparsimasoq naammagittaalliutigisani pillugu ilalernerqarpat pinngitsaaliissummik malinnaaffiginninnissaq aallartinneqarsinnaanngilaq.

Napparsimasoq Tarnimikkut Nappaatillit Maalaarutaannik Aalajangiisartunit ilalernerqanngipat aalajangiineq eqqartuussivikkut aalajangigassanngortinneqarsinnaavoq. Pinngitsaaliissummik malinnaaffigineqarnerup sivitsorneqarneri tamaasa Tarnimikkut Nappaatillit Maalaarutaannik Aalajangiisartunit maalaaruteqartoqaqqissinnaavoq eqqartuussivikkut suliareqqitasanngortitsinermik periarfissalimmik.

Malugeqquneqarpoq angerlareernermi pinngitsaaliissummik malinnaaffigineqarnerup kingunerissagaa taamatut pinngitsaaliissummik iliuseqarneq siunnersuummi iliuserisassat allat assigalugit immikkoortortaqruiup pinngitsaaliissummik protokolianut ilanngunneqassasoq Nunatsinnilu Nakorsaannermut nalunaarutigineqassalluni, tak. § 30.

2.6.2 Siunnersuut matumani pineqartoq, tak. kapitali 5 §§ 16-20

Siunnersuummi inatsisitigut pisinnaatitaaffiit atuuttut ingerlateqqinneqarput.

2.7 Sukaterussineq il.il.

2.7.1 Inatsit atuuttoq

Inatsimmi atuuttumi pinngitsaaliissutit tamarmik, sukaterussinerit imaluunniit najumminnerit, pingaarnernut ukununga immikkoortinneqarput: Pinngitsaaliissummik sukaterussineq, timi atorlugu pissaanermik atuneq, sernissuiniarluni sukaterussineq, immikkut nakkutilliineq, immikkoortortaqrifimmi matunik parnaarsuineq kiisalu pinngitsaaliissummik timikkut eqqiluisaartitsineq.

Una eqqarsaatigalugu *pinngitsaaliissummik sukaterussinerup aamma sernissuiniarluni sukaterussinerup immikkoortinniarnepup*, iliuseqarnermut siunertaasoq aalajangiisuuvoq sukaterussinerit taakkua marluk sorliunerannut. Siunertarineqarpat ajoqusernissamut ulorianartorsiornissap pinngitsoortinnissaa, napparsimasup siunertarippagu imminut ajoqusernissani

imaluunniit avatangiisiminiittunik ajoqusiiniarnissani, taava pinngitsaaliissutitut tamanna taaneqassaaq. Akerlianik sernissuiniarneq pineqarpoq tassani siunertaappat napparsimasooq taamak piniangikkaluarluni nammineq timini malunnaateqarluartumik ulorianartorsiortilerpagu, tamakkua ilisarnaatigaat ulluinnarni iliuuserisakkat iliuuseriniarsarippagit, naak pineqartup tamakkua ingerlannissaat sapilersimagaluarlugit.

Siunertap saniatigut iliuuserisap suunera immikkoortitsiniarnermi pingaaruteqarpoq. Qitequtit, ungerutit assannut aalajangiissutit, ungerutit isikkanik aalajangiissutit aamma aaqqatit siunnersuut naapertorlugu pinngitsaaliissummik sukaterussinermi taamaallaat atorneqassapput.

Inatsimmi § 19, imm. 2 naapertorlugu *pinngitsaaliilluni sukaterussineq* taamaallaat atorneqarsinnaavoq pisariaqarpat napparsimasooq imminut ajoquseriataarsinnaaneranik imaluunniit allanik timikkut imaluunniit peqqissutsikkut ajoquseeriataarnissaanik pinngitsoortitsitsiniarluni. Taamatuttaaq pinngitsaaliilluni sukaterussineq pissaaq napparsimasooq uninngaqatiminik malersuippat assigisaanilluunniit sakkortuumik ajoqusiippat imaluunniit annertuumik aserorterrippat. Tamatumani piumasaaqaataangilaq pineqartup silanngajaartuunissaa imaluunniit tamatumunnga assingusumik pissuseqarnissaa.

Immikkut maleruaqqusaqangilaq pinngitsaaliissummik sukaterussinissamik aalajangiinissamut kina pisinnaatitaaffeqarnersoq, tak. inatsimmi § 20. Inatsimmi § 21-mi allassimavoq napparsimasut qiteqummik pinngitsaaliissummik sukaterussat aalajangersimasumik pigaartoqartarnissaat pillugu maleruaqqusaq.

Atorneqartartut pillugit piumasaaqaatinut assingusunut, pinngitsaaliissummik sukaterussinermut atuuttunut, napparsimasup pineqartup *timimi nukiit atorlugit najumminissaanut* aamma pineqartup sumiiffissamut allamukaanneqarsinnaanissaanut periarfissaqarpoq, tak. § 22 imm. 1, naggat siulleq. Pisuni ataasiakkaani pinngitsaaliissummik sukaterussineq imaluunniit taamaallaat timi atorlugu pissaanermik atuinissaq pillugit apeqqu annikinnerpaamik iliuuserisasamut tunngavilersuutaasup qimerloorneqarnerani aalajangiiffigineqassaaq.

§ 22-mi imm. 1, naggatit aappaanni allassimavoq inuit nammineersinnaajunnaarsinneqartut napparsimavimmit qimagunnissaat pinngitsoortinneqarsinnaasoq qanorluunniit timi atorlugu pissaanermik atuinissamut piumasaaqaataasut nalinginnaasut atuutinnikkaluarpata. Aalajangersakkami matut silarliit parnaarnissaat ilaatigut periarfissiissutigineqarpoq.

§ 22, imm. 2-mi periarfissaqarpoq pisariaqassappat pinngitsaaliisummik napparsimasoq eq-qissiveqanngitsoq eqqissisaammik nakorsaaitortinneqarnissaa. Tamanna peqqissutsimut tunngatillugu pisariaqarsinnaavoq napparsimasup pitsaanerulernissaa ilaatigut sinilersinneratigut anguneqarsinnaasarmat. Aammattaaq iliuuserisaq atorineqarsinnaavoq, soorlu assersuutigalugu pinngitsaaliisummik qiteqummik sukaterussinermit tamanna annikinnerusumik akuliunertut iliuuserisaammat.

§ 23-imi *sernissuilluni sukaterussinermit* maleruaqqusaq ilanngunneqarpoq. Taamaaliornikut pinngitsaaliisummik iliuuseqarneq imatut paasineqassaaq napparsimasup siunertarinngisaminik imminut annertuumik ulorianartorsiortinnissaanut illersorniarlugu iliuuserisatut.

Ullumikkut ima pisoqartarpoq napparsimavimmi sulisut nakkutilliuuaannartarlutik, tassunga ilanngullugu napparsimasup imminut toqunnissaanut imaluunniit napparsimaqatiminik ajoqusiinissaanik pinngitsoortitsiniaalluni eqqannguaniittarlutik. Taamatut periuseqarneq inuup nammineersinnaassuseqarneranut akulerunnertut taaneqarsinnaasoq, inatsimmi periarfissiisutigineqarpoq § 24 *inummi immikkut nakkutiginninneq*. Inummik immikkut nakkutiginninneq nakorsap, napparsimasumit misissuereernermit kingornatigut, aalajangersinnaavaa.

Ullumikkut aammattaaq pisoqartarpoq napparsimasup isumannaatsuutinnissaa siunertaralugu nalilerneqartarluni *immikkoortortaqarfimmi matut parnaarneqarnissaat*. Taamatut periuseqarneq inuup nammineersinnaassuseqarneranut akulerunnertut aammattaaq taaneqarsinnaavoq, tamanna inatsimmi § 26-imi immikkut periarfissiisutigineqarpoq.

Tarnimikkut napparsimasut imminut eqqiluisaarnissaminnut pisariaqartumik isumaginnissinnaanngitsut soorlu asattornermik pillugit, periarfissaliisoqarpoq taamatut *imminut eqqiluisaarnissap* pinngitsaaliisummik atuinikkut ingerlanneqarsinnaasoq, tak. § 27.

2.7.2 *Siunnersuut matumani pineqartoq, tak. kapitali 6 §§ 21-31*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.8 Allagarsianik/nassiussarsianik, ininik napparsimasut uninngaviinik, pigisanik timilu satsilugu misissuisarneq kiisalu pigisanik arsaarinnissuteqartarneq suujunnaarsitsisarnerlu.

2.8.1 *Inatsit atuuttoq*

Inatsimmi § 29-mi napparsimasup allagarsiaanik misissuinissamut, napparsimavimmi inaanik pigisaanillu misissuinissamut aammattaaq timaa satsillugu misissuinissamut piginnaatitsisoqarpoq. Pigisanik arsaarinnissuteqarneq aamma atortunik il.il. suujunnaarsitsisinnaaneq, inatsit naapertorlugu taamatutaaq inatsimmi namminerme malittarisassaliuunneqarpoq.

2.8.2 *Siunnersuut matumani pineqartoq, tak. kapitali 7 § 32*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.9 Pinngitsaaliissutinik atorineqartunik allattuisarneq aamma pinngitsuugassaannngitsumik nalilersueqqinneq

2.9.1 *Inatsit atuuttoq*

Inatsisissatut siunnersuummi § 30, imm. 1 naapertorlugu pinngitsaaliinikkut iliuseqarnerit suugalulluunniit tamarmik inatsimmi aalajangersakkat atuuttut tunngavigalugit immikkoortortaqarfimmi pinngitsaaliissutit atorineqartut pillugit nalunaarsuiffimmut, kiisalu iliuserisaq aamma tamatumunnga pissutigisaaq suunersut ilanngullugit, nalunaarsorneqassapput.

Nalunaarsuineq pisariaqarpoq napparsimasut ataasiakkaat inatsisitigut illersugaanerit eqqarsaatigalugu, soorlu assersuutigalugu naammagittaalliutit suliarineqarnerannut atatillugu. Taamatutaaq pinngitsaaliissummik atuisarnerit pillugit inuiaqatigiinni kisitsisitigut paasisstissanik pigisaqarnissamut nalunaarsuineq iluaqutaavoq. Pinngitsaaliissummik iliutsit qitiusumik nalunaarsorneqarnerit napparsimasut inatsisitigut illersugaanerannut toqqammavissat pingarnerit ilagaat. Nalunaarsuineq sammisamut tunngatillugu nakkutilliinissamut aamma nakkutiginninnissamut tunngaviususaaq.

§ 31 Naapertorlugu Dronning Ingridip Napparsimavissuani tarnikkut nappaatilinnut

Immikkoortortaqarfianni nakorsaaneq pisussaavoq nakkutigissallugu, pinngitsaaliissummik iliuseqarnerit inatsimmi periarfissalerneqartut pisariaqartitsisoqarnera sinnerlugu atorineqannginnissaat. Tamatumunnga atatillugu nakorsaanerup piffissatut killiliussaasut tunngavigalugit nakkutigissavai nammineersinnaajunnaarsitaanermut aamma sernissuiniarluni aamma pinngitsaaliissummik sukaterussinermut piumasaqaataasut suli eqquutsinneqarnissaat nakkutigissavaa. Napparsimasooq aamma napparsimasunut siunnersortaasoq nammineersinnaajunnaarsitaanerup atuutiinnarnissaa pillugu aalajangernermik ilisimatinneqassapput.

Danskit tarnimikkut napparsimasut pillugit inatsisaanni ullup unnuallu ingerlanerani pingasoriarluni nalilersueqqittoqartarpoq. Kalaallit Nunaani tarnimikkut napparsimasut amerlanngitsut Dronning Ingridip Napparsimavissuani tarnikkut nappaatilinnut Immikkoortortaqarfianni

uninngasarmata, Danmarkimi pissutsinut naleqqiullugu napparsimasut ataasiakkaat qaninnerusumik attaveqarfigineqarput. Tamanna tunngavigalugu ulloq unnuarluni takusaaqqittoqartarnissaa naammattutut nalilerneqarpoq. Taamatuttaaq Danmarkimi tarnimikkut napparsimasut pillugit inatsimmi piumasaqaateqarpoq nalileeqqinneq tarnip nappaataanut nakorsamit, tarnikkut nappaatilinnut immikkoortortaqarfimmi napparsimasup uninngaviani sulusuunngitsumik, ingerlanneqartassasoq, taamaaliornikkut qulakkeerniarlugu attuumassuteqanngitsumik naliliinissaq. Kalaallit Nunaanni Dronning Ingridip Napparsimavissuani tarnikkut nappaatilinnut Immikkoortortaqarfianni tarnip nappaataanut nakorsanik taamaallaat atorfeqartuqarmat Kalaallit Nunaanni tamatumunnga assingusumik attuumassuteqanngitsumik naliiisarnissamik piumasaqaateqarnissaq periarfissaanngilaq.

2.9.2 *Siunnersuut matumani pineqartoq, tak. kapitali 8 §§ 33-34*

Siunnersuummi inatsisitigut pisinnaatitaaffiit atuuttut ingerlateqqinneqarput.

2.10 Napparsimasunik siunnersuisartut

2.10.1 *Inatsit atuuttoq*

Inatsit malillugu pinngitsaaliissummik unitsinneqartunut, pinngitsaaliissummik uninngatinneqartunut imaluunniit pinngitsaaliissummik nakorsarneqartunut, angerlartinneqarnerup kingornatigut pinngitsaaliissummik malinnaaffigineqartunut, pinngitsaaliissummik sukaterunneqartunut, timi atorlugu pissaanermik atuinermik pineqarsimasunut, sernissuiniarluni sukaterunneqarsimasunut, immikkut nakkutigineqartunut kipisuitsumik nalunaaquttap akunneri 24-t sinerlugit atuuttuni, aammattaaq § 32, imm. 1, naapertorlugu immikkoortortaqarfimmi matut paarnaarneqarnerannut atatillugu taamatut pineqartunut tamanut napparsimasumik siunnersuisoqartitsisoqassaaq.

Napparsimasumik siunnersuisoq napparsimasumik ilitersuissaaq aamma siunnersuilluni napparsimavimmut unitsinneqarnermut, napparsimaveqarfiup napparsimaviini uninnganermut aamma nakorsartinnermut atatillugu, kiisalu napparsimasoq naammagittaalliteqassappat tamatumunnga aallartitsinissamut aamma naammassinninnissamut atatillugu ikiuissalluni. Napparsimasumik siunnersuisup atuuffia aamma pisinnaatitaaffii inatsimmi §§ 32, 34, 35 aamma 36-mi sukumiisumik nassuiaatigineqarput.

Toqqaanermut ingerlatseriaaseq inatsimmi § 33-mi takuneqarsinnaavoq.

2.10.2 *Siunnersuut matumani pineqartoq, tak. kapitali 9 §§ 35-40*

Siunnersuummi inatsisitigut pisinnaatitaaffiit atuuttut ingerlateqqinneqarput, taanna Inatsisartut Inatsisaat nr. 12, 3. juni 2015-imeersoq aqutugalugu kingullermik allanngortinneqarpoq.

Siunnersuummi erseqqissaatigineqarput napparsimasumik siunnersuisumik toqqaasoqassasoq pissaaneq atorlugu nakorsaammik eqqissisaatitortitsisoqartillugu.

2.11 Ilisimatitsineq aamma naammagittaalliornissamut ilitsersuineq il.il.

2.11.1 Inatsit atuuttoq

Nammineersinnaajunnaarsitaanerup aallartinnnginnerani aamma pinngitsaaliissummik iliuuseqarnerup allap atorneqalinnginnerani maleruaqqusaq pingaarneq tassaavoq napparsimasup ilisimatinneqarnissaa, pinngitsaaliissutip atorneqarniartup suuneranik, qanoq ittuuneranik, tungavigisaasumik aamma siunertaasumik. Napparsimasoq iliuuserisap naammagittaalliutigineqarsinnaanera pillugu tamatigut ilitsersorneqartassaaq.

2.11.2 Siunnersuut matumani pineqartoq, tak. kapitali 10 §§ 41-45

Siunnersuummi inatsisitigut pisinnaatitaaffiit atuuttut ingerlateqqinneqarput.

Tarnimikkut nappaatilinnik nammineersinnaajunnaarsitsinerumt allatigullu pinngitsaaliissummik iliuuseqarnermut atatillugit ilisimatitsineq maalaaruteqarsinnaanermillu ilitsersuineq pillugit Namminersorlutik Oqartussat nalunaarutaat nr. 16, 2. december 2013-imeersup atorunnaarsinneqarnerata kingunerisaanik, aalajangersakkat arlallit nalunaarummiittut inatsisissatut siunnersuummut nuunneqarput. Inatsimmit toqqaannartumik maannakkut ersersinneqarpoq napparsimasup ilisimatinneqarnissaa, tassa naammagittaalliut qanoq annertutigisumik kinguartitsisoqarsinnaaneranut sunniuteqarnerisooq, tak. inatsisissatut siunnersuummi § 41, imm. 1. Taamatuttaaq inatsimmi maannakkut ersersinneqarpoq napparsimasoq piumasaqaateqarnini naapertorlugu Tarnimikkut Nappaatillit Maalaarutaannik Aalajangiisartunut naammagittaalliornissamut periuseq pillugu ilitsersorneqassasoq.

Ilisimatitsinissaq pillugu aalajangersagaq kapitali 2-mut aalajangersakkanut nalinginnaasunut tunngasunut nuunneqarpoq.

2.12 Naammagittaalliornissamut periarfissaq aamma eqqartuussivitsigut misiliineq

2.12.1 Inatsit atuuttoq

Tarnimikkut Nappaatillit Maalaarutaannik Aalajangiisartut naammagittaalliutinut suliassanngortinneqartunut aalajangiisartuupput, tamatumani pineqarput; napparsimavimmut pinngitsaaliissummik unitsitsineq, napparsimavimmi pinngitsaaliissummik uninngatitsineq, oqqunneqarneq, pinngitsaaliissummik nakorsarneqarneq, napparsimavimmit angerlartinneqareernerup kingoratigut pinngitsaaliissummik malinnaaffigineqarneq § 17 tunngavigalugu, pinngit-

saaliissummik sukaterussineq, timi atorlugu pissaanermik atuineq, sernissuiniarluni sukaterussineq, immikkut nakkutiginninneq, kipsisuitsumik nalunaaquttap akunneri 24-t sinnerlugit sivi-sussuseqartut aammattaaq immikkoortortaqaarfimmi matunik parnaarsuinerit.

Aalajangiisartut tassaapput eqqartuussissuserisumik siulittaasoqartut. Eqqartuussissuserisoq pineqartoq napparsimaveqarfimmut attuumassuteqqartuussanngilaq, taamaalinikkut politikikkut attuumassuteqqannginneq qulakkeerneqassaaq. Taassuma saniatigut aalajangiisartunut ilaasortaapput Nunatsinni Nakorsaaneqarfimmit sinniisuutitaasoq aammattaaq tarnimikkut eqqarsartaatsimikkullu nappaateqartut peqatigiiffiannit sinniisuutitaasoq.

Ilaasortat Peqqissutsimut Ilisimatusarnermullu Naalakkersuisumit toqqarneqassapput ilaasortanut sinniisussat taamatuttaaq taassuma toqqassavai. Toqqagaaneq ukiuni sisamani atuutisaaq aamma toqqaagaqqittoqarsinnaavoq. Suliata ataasiakkaat oqaluuserineqarneranni aamma aalajangiiffigineqarneranni aalajangiisartut ilitsersorneqarnissaminnut attuumassuteqqanngillat.

Inatsimmi § 41, imm. 2 naapertorlugu Nunatsinni Nakorsaaneqarfik allatseqarnikkut isumaginnittussatut toqqarneqarpoq.

Pinningsaaliissummik iliuseqarnerit tamarmik Kalaallit Nunaanni Eqqartuussivimmut ingerlateqqinneqarsinnaapput.

2.12.2 Siunnersuut matumani pineqartoq, tak. kapitali 11 §§ 46-49

Siunnersuummi inatsisitigut pisinnaatitaaffik atuuttoq ingerlateqqinneqarpoq, taanna Inatsisartut Inatsisaat nr. 12, 3. juni 2015-imeersoq aqutugalugu kingullermik allanngortinneqarpoq.

Siunnersuummi erseqqissarneqarpoq pissaanermik atuilluni eqqissisaammik nakorsaaitortitsineq aammattaaq Tarnimikkut Nappaatillit Maalaarutaannik Aalajangiisartunut saqqummiunneqarsinnaasoq.

Taamatuttaaq Tarnimikkut Nappaatillit Maalaarutaannik Aalajangiisartut aalajangiineri pillugit naammagittaalliutit eqqartuussivinnut ingerlateqqinnerat immikkut pilertortumik misilinnissamut periarfissaqartitsinermut ilaatinneqartut erseqqissaatigineqarput, pinerluttulerinermi inatsimmi kapitali 28 naapertorlugu.

2.13 Oqaaseqatigiinnik aqqissuussinnerit

Soorlu taaneqartutut siunnersuummi tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut inatsisaanni aalajangersakkat arlallit ingerlateqqinneqarput. Taamaattorli siunnersuummi oqaaseqatigiinnik aaq-qissuussisoqarpoq aamma naleqqussaasoqarluni, tamatumani siunertarineqarpoq inatsisip imarisaataa erseqqinnerulernissaa aamma paasiuminarnerulernissaa.

3. Pisortanut aningaasaqarnikkut aamma allaffissornikkut kingunerisassai

Siunnersuutip pisortanut aningaasaqarnikkut aamma allaffissornikkut kinguneqarnissaa naatsorsuutigineqanngilaq, siunnersuut tunngavimmigut tassaamat maannakkut tarnimikkut napparsimasunik nakorsaanissamat neqeroorutiniq ingerlatsitseqqinneq, tamatuma malitsigisaanik naatsorsuutigineqanngilaq missingersuutitut ilanngunneqareersimanngitsunik aningaasartuuteqarnissaq.

4. Aningaasaqarnikkut aamma allaffissornikkut inuussutissarsiutiniq ingerlatsisunut kingunerisassai

Siunnersuutip inuussutissarsiutiniq ingerlatsisunut aningaasaqarnikkut aamma allaffissornikkut kinguneqarnissaa naatsorsuutigineqanngilaq.

5. Avatangiisinut, pinngortitamut aamma innuttaasut peqqissusiannut kingunerisassai

Siunnersuummi tarnimikkut napparsimasut ikiorneqarnissaat annertunerusumik periarfissiisutigineqarpoq, taakku naak nakorsartinnissamik pisariaqartitsigaluarlutik namminneq ikiorneqarnissamat ujartuinissamat sapertut imaluunniit tamatuma pisariaqarneranik akuerinnissinnaanngitsut.

Siunnersuutip avatangiisinut imaluunniit pinngortitamut malunnaateqartumik allatigut kinguneqarnissaa naatsorsuutigineqanngilaq.

6. Innuttaasunut kingunerisassai

Siunnersuut tarnimikkut napparsimasut nammineersinnaajunnaarsinneqarsinnaanerannut aamma allatut pinngitsaaliissummik iliuseqarfigineqarsinnaanerannut piginnaatitsivoq. Aallaavigineqarpoq pinngitsaaliissummik atuinissamik nakorsaaneq aalajangiisartuussasoq. Taamaattorli Dronning Ingridip Napparsimavissuani tarnikkut nappaatilinnut Immikkoortortaqaqfianni nakorsaanerup saniatigut nakorsaq alla, nakorsaanerup peqannginnerani, tamanna pillugu aalajangiisinnaavoq. Taamaattoqarsimappat tamatuma kingornatigut sapinngisamik piaarnerpaamik aalajangiineq nakorsaanermit akuersissutigineqassaaq.

Tamatumani siunertarineqartoq tassaavoq tarnimikkut napparsimasut pisariaqartumik nakor-sarneqarnissaat, sulisutigut isumalluutit qanoq ittuuneri apeqqutaatinnagit, tassa piffissami tassanerpiaq Dronning Ingridip Napparsimavissuani tarnikkut nappaatilinnut Immikkoortorta qarfianniittut.

Napparsimasut inatsisitigut isumannaatsuunissaat napparsimasunik siunnersuisoqarnikkut, naammagittaalliutit suliarineqartarnerisigut aamma eqqartuussivikkut misiliinissamik periarfissatigut atuutereersutigut qulakkeerneqarpoq.

7. Sunniutaasussat allat malunnaateqarluartut

Siunnersuutip allatigut malunnaateqarluartumik sunniuteqarnissaa naatsorsuutigineqanngilaq.

8. Oqartussaasunik aamma kattuffinnik il.il. tusarniaaneq

Siunnersuut 2. oktober 2018 tusarniaanermut nittartakkami uani www.naalackersuisut.gl tamanut saqqummiunneqarpoq, kingusinnerpaamik tusarniaanermut 2. november 2018 akissuteqarfissalerlugu.

Tusarniaanermut akissuteqaatit tamarmik peqqaarnerminni allanneqarnerattut Inatsisartuni ataatsimiititaliamut suliarinnittumut ilanngullugu nassiunneqassapput.

Aallaqqaasiut

Matuma kinguliani tusarniaanermut akissuteqaatit aamma allannguutissatut siunnersuutit tiguneqarsimasut sammineqarput.

Tusarniaanermut akissuteqaatit tamakkerlugit allaqqinneqarput uingasumik naqinnilerlugit aamma ilanngunneqarput Naalackersuisut taakkununga Naalackersuisut oqaaseqaataat. Tusarniaanermut allakkiami innersuussutit tusarniaanermi atukkat uteqqippaat.

Siunnersuut piffissami uani 2. oktobarimiit 2018 2. novembarimut 2018 tusarniaaffigineqartuni makkunani tusarniaassutigineqarpoq:

Namminersorlutik Oqartussani naalackersuisoqarfinni tamani

Nunap immikkoortuini peqqinnissaqarfinni tamani v/Peqqinnissamut Aqutsisoqarfik

Kommunini tamani

Nunatsinni Nakorsaaneqarfimmi

Nunatsinni Eqqartuussivinni

Nunatsinni Eqqartuussisuuneqarfimmi
 Kalaallit Nunaanni Politimestereqarfimmi
 Peqqinnissamut aamma Pitsaaliuineranut Aqutsisoqarfimmi
 Dronning Ingridip Napparsimavissuani tarnikkut nappaatilinnut Immikkoortortaqarfik, Nuuk
 Tarnimikkut Nappaatillit Maalaarutaannik Aalajangiisartuni
 Tarnimikkut Nappaatillit Peqatigiiffianni, Sugisami
 Nunatsinni Meeqqat pisinnaatitaaffii pillugit sullissivimmi, MIO-mi
 Kalaallit Nunaanni Nakorsat Peqatigiiffianni
 PK/PPK
 Sundheds- og Ældreministeriet
 Justitsministeriet
 Afdeling R, Aarhus Universitetshospital (Psykiatrien i Region Midtjylland)

Tamakku saniatigut uku tulliuttut tusarniaanermut kajumissaarneqaratik akissuteqarsimapput:

Tilioq – Innarluutillit oqaaseqartartoqarfiat
 Institut for Menneskerettigheder

Tusarniaassuteqarnermi akissuteqaatit 13-nit tiguneqarput taakkunanga oqaaseqaateqanngitsut tassaallutik:

Inuussutissarsiornermut Nukissiuuteqarnermullu Naalackersuisoqarfik, Aningaasaqarnermut Sulisoqarnermullu Aqutsisoqarfik, Aatsitassanut, Suliffeqarnermullu Naalackersuisoqarfik, Kommuneqarfik Sermersooq, Sundheds- og Ældreministeriet.

Tusarniaassuteqarnermut akissuteqaatit siunnersuummut oqaaseqaatitaqartut matuma kingulianiittut tassaapput:

Kalaallit Nunaanni Politimesteri, Peqqissutsimut Pitsaaliuinernullu Aqutsisoqarfik, Tarnimikkut Nappaatillit Maalaarutaannik Aalajangiisartut, Tarnimikkut Nappaatillit Peqatigiiffiat, Sugisaaq, Nunatsinni Meeqqat pisinnaatitaaffii pillugit sullissivik, MIO, Tilioq – Innarluutillit oqaaseqartartoqarfiat, Institut for Menneskerettigheder, Qeqertalik Kommune aamma Nunatta Eqqartuussisuuneqarfia.

Kalaallit Nunaanni Politimesterimit tusarniaanermut akissuteqaat

Kalalaallit Nunaanni Politiit maluginiarpaat Kalaallit Nunaanni Politiit annertunerusumik suliassaqartinneqalersimangitsut imaluunniit piginnaaneqalersinneqarnatik. Taamaattorli oqaaseqaatigiit " Kalaallit Nunaanni Politimesterip Danmarkimilu Inatsisinik Atuutsitsineranut Ministereqarfiup akuersinerisigut politiit..." ukunani §§ 9,11 aamma 19

allanngortinneqartariaqarput, taamaalillutik Kalaallit Nunaanni Pinerluttulerinermi Inatsimmi § 61-imut naleqquttunngorlugit, taanna malillugu taamaallaat justitsiministeri politiinik suliaasiinnaammat.

Siunnersuummi matumani siusinnerusukkut inatsisip § 29-a allanngortinnagu § 30-tut ingerlateqqinneqarpoq. Imm. 3-mi allanneqarpoq pigisanik nakorsaaneq "arsaarisinnaasoq". Taamatut oqaasiliorneq tulluannilaq tassami immaammat taamaallaat politiit pigisani arsaarinnissinnaapput. Taanna allanngortinneqartariaqarpoq assersuutigalugu "paarineqassasut" imaluunniit oqaaseqatigiit allanik attuumassuteqanngitsunik. Taassuma saniatigut Kalaallit Nunaani Politiinik politiit suliaasaannut tunngatillugu kissaatigineqarpoq aalajangersakkami tassani eqqornerusumik oqaaseqatigiiliortoqarnissaa. Tamanna tunngavigalugu siunnersuutigineqarpoq, tassa § 30, imm. 3-mi naggat kingulleq imatut oqaasertalerneqassasoq: "Atortut il.il. napparsimasumit pigineqartut inatsisinik nalinginnaasunik unioqqutitsisumik, (...) nakorsaanermik politiinut tunniunneqassapput."

Aalajangersakkamut tassunga oqaaseqaatini iluaqutaasumik ersersinneqarsinnaavoq, politiit suliaassat taamaattut suliarissagaat pinerluttulerinermi suliaassatut allatut, taamaaliornikkut erseqqissarneqassaaq soorlu assersuutigalugu eqqartuussisutigut ingerlatitsisoqassaaq tamanna pisariaqarpat.

Akissuteqaat:

Naalakkersuisut tusaatissatut tiguaat oqaaseqatigiit "Kalaallit Nunaanni Politimesterip Danmarkimilu Inatsisinik Atuutsitsinermut Ministereqarfiup akuersinerisigut (...) siunnersuummi § 9, imm. 3, § 11, imm. 2 aamma § 19 ilumoortumik allanngortinneqartariaqarpoq, taamaalilluni aalajangiinissamut piginnaatitsissummik aalajangiinissamut Kalaallit Nunaanni Pinerluttulerinermi Inatsimmi § 61, imm. 2-imi allassimasunut tulluurtunngorlugit. Malugineqassaaq maleruaqqusat sukumiinerusut maannakkut nalunaarutini aalajangersarneqarsimapput aalajangersakkat taaneqartut tunngavigalugit, taakkunani politiit suliaasaat sukumiisumik nassuiaatigineqarlutik. Soorlu assersuutigalugu Namminersorlutik Oqartussat nalunaarutaanni nr. 17, 2. december 2013-imeersumi § 7-imi pinngitsaaliissummik napparsimavimmut unitsitsinerit ingerlanneqarnissaat pillugu, tassa politiit ilaatigut nakkutigissagaat nakorsap uppernarsaataani paasissutissat pinngitsaaliissummik unitsitsinermut tunngaviusut pisariaqartut ilanngunneqarsimassasut, aamma § 8-imi allassimavoq politiit Dronning Ingridip Napparsimavissuani tarnimikkut nappaatilinnut immikkoortortaarfik isumaqatigiissuteqarfigisagaat, pinngitsaaliissummik sumi unitsitsisoqarnissaa pillugu, piffissaq pinngitsaaliissummik unitsitsinissap aallartinneqarnissaa pillugu, imaanngippat

unitsitsinissap ingerlaannartumik aallartinneqarnissaa pisariaqarluni. Naalackersuisut paasinninnerat naapertorlugu aalajangersakkat taamatut ittut pisariaqartippaat peqqinnissaqarfiup aamma najukkani politiit qanimut suleqatigiinnissaat aamma oqaloqatigiittarnissaat.

Naalackersuisut isumaat naapertorlugu Kalaallit Nunaani Pinerluttulerinermi Inatsimmi § 61, imm. 2-mi erseqqissumik allassimangilaq, immikkuualuttuni qanoq annertutigisumik politiit suliassaat Justitsministeriaqarfimmit akuersissutigineqartassanersut. Isumaqarnarpoq Justitsministeriaqarfimmit sapinngisamik annertunerpaamik politiit peqataatinneqassasut suliassanik tunniussinissaq sioqqullugu, aamma politiinut taamatuttaarlu Peqqissutsimut Naalackersuisoqarfimmut erseqqissaatigineqassasoq politiit qanoq ittumik pisinnaatitaanersut namminneq aalajangersaanissaminnut piumasaqaatinik sukumiinerusunik peqqinnissaqarfimmit suleqateqarnermi piumasaqaataasunut aamma pissutsinut tunngatillugu.

Matuma siulianiittut tunngavigalugit oqaaseqatigiit "*Kalaallit Nunaanni Politimesterip Danmarkimilu Inatsisunik Atuutsitsinermut Ministereqarfiup akuersinerisigut (...)*" uaniittut § 9, imm. 3, § 11, imm. 2 aamma § 19 imaalillugit "*(...) Danmarkimi Justitsministeriap akuersissuteqarneratigut aalajangersarneqassapput.*"

Naalackersuisut isumaqatigaat siunnersuummi § 30, imm. 3 allanngortinneqartariaqartoq. Taamaattumik § 30, imm. allanngortinneqarpoq imaalillugu: "*Nakorsaaneq aalajangersinnaavoq nakorsaatit, aanngajaarniutit aamma atortut navianartut imm. naapertorlugu misissuinermi nassaarineqartut paarineqarnissaannik. Nakorsaaneq aalajangersinnaavoq nakorsaatit, aanngajaarniutit aamma atortut navianartut imm. naapertorlugu misissuinermi nassaarineqartut paarineqarnissaannik. Atortut il.il. napparsimasumit pigineqartut inatsisunik nalinginnaasunik unioqqutitsisumik, tamatumunnga ilanngullugit aanngajaarniutit pillugit inatsimmik aamma sakkut pillugit inatsimmik, nakorsaanermik politiinut tunniunneqassapput.*" Taamatuttaaq aalajangersakkamut oqaaseqaatit allanngortinneqarput siunnersuutigisaaq malillugu.

Peqqinnissamut aamma Pitsaaliuinermit Aqutsisoqarfimmit tusarniaanermut akissuteqaat:

Ataatsimut isigalugu Peqqinnissamut Aqutsisoqarfiup maluginiarpaa tarnimikkut napparsimasut eqqartuunneqarsimaneq tunngavigalugu nakorsarneqartut nammineq immikkut malittarisassaliuunneqarsimangitsoq, kisianni taamaallaat taaneqarluni tarnimikkut napparsimasut eqqartuunneqarsimasut Danmarkimut nuunneqarsinnaasut, tak.

inatsisissatut siunnersuummi § 10, imm. 2. Nuussisinnaanermut periarfissap tamatuma Peqqinnissamut Aqutsisoqarfiup inatsimmi annertunerusumik malittarisassaliuunneqarnissaa kissaatigaa. Peqqinnissaqarfimmit malugeqquneqarpoq napparsimasut eqqartuunneqarsimaneq tunngavigalugu nakorsarneqartut amerliartornerat, tassa Danmarkimi R3-imi inissamik amigaateqartoqarnera pissutigalugu, taamaattumik inuit eqqartuunneqarsimasut paarnaarusnaanissaannut taarsiullugu inissinneqarsimasut Dronning Ingridip Napparsimavissuani tarnikkut nappaatilinnut Immikkoortortaqarfimmi nakorsarneqartut.

Nakorsaatilik toqqaanermut atatillugu maleruagassiornermi tassa tassanngaannartumik nakorsaatitortitsinermut atatillugu peqqinnissamut aqutsisoqarfik isumaqarpoq arlalinnik naleqqutinngitsoqartoq. Nalunaarneqarpoq nakorsaatit atorineqartut sapinngisamik ikinnerpaanik saniatigut sunniuteqartartuussasut. Tamatumunnga tunngatillugu oqaatigineqassaaq kiffaanngissuseqartumi nakorsaatilik toqqaasinnaaneq tunngavigalugu nakorsap akisussaaffigigaa, saniatigut sunniutaasartut pisorpiami pitsaanerpaamik sunniuteqartussat saniatigut sunniutaasartunut tamatigut naleqqiussisarnissaq. Tassanngaannarmik nakorsaatitortitsineq tunngaviusumik tamatigut pisarpoq ulorianarsinnaasutut ilisarnaateqarneq tunngavigalugu, taamaattumik nakorsaatip sunniutaa aammattaaq apequtaasarpog. Taamaattumik inassutigineqarpoq nakorsaatitortitsinermi pisorpiaq tunngavigalugu nakorsap nakorsatut naliliinera tunngavigineqassasoq. Peqqinnissamut Aqutsisoqarfiup paragrafinut ataasikkaanut oqaaseqaatigisai imaapput: §1, imm. 2:

"...nakorsaanerup, nakorsap unitsitsisup isumasioqatigineratigut aalajangissavaa, pinngitsaaliissummik unitsitsinissap qanoq pisariaqartiginera." Peqqinnissamut Aqutsisoqarfik isumaqarpoq oqaaseq "nakorsaanerup" erseqqissarneqartariaqartoq. Nunap immikkoortuani nakorsasup nalilersortarpaa pinngitsaaliissummik napparsimavimmut unitsitsinissamut ilisarnaatit piunersut. Nakorsaq nakorsamut pigaartuusumut saaffiginnittarpoq, taanna amerlanertigut tassaasarpog tarnimikkut napparsimasunut nakorsaq immikkut ilinniarsimasog, Dronning Ingridip Napparsimavissuani tarnikkut nappaatilinnut Immikkoortortaqarfiani sulisumut, taannalu aalajangiisarpog napparsimavimmut pinngitsaaliissummik unitsitsisoqarnissaanik tassunga ilanngullugit sumi aamma qaqugu.

§8 aamma §9:

Peqqinnissamut Aqutsisoqarfiup erseqqissorinnigilaa kina napparsimavimmut pinngitsaaliissummik unitsitsinissamut aalajangiisuunersog. § 8, imm. 1, tunngavigalugu politiit napparsimavimmut pinngitsaaliissummik unitsitsinissap aallartinneqarnissaanik aalajangiisarpog. § 8, imm. 2-mi aalajangersarneqarpoq napparsimavimmut

pinngitsaaliissummik unitsitsineq taamaallaat ingerlanneqarsinnaasoq nakorsamit nalunaarut tunngavigalugu, nakorsaq, Dronning Ingridip Napparsimmavissuata tarnimikkut napparsimasunut immikkoortortaqarfiani atorfeqartuussanngilaq. § 9, imm. 2-mi aalajangersarneqarpoq Dronning Ingridip Napparsimmavissuata tarnimikkut napparsimasunut immikkoortortaqarfiani nakorsaanerup pinngitsaaliissummik unitsitsinermut piumasaqaatit eqqortinneqarnersut aalajangiiffigissagaa. Paragrafit matuma siuliani taaneqartut imminnut assortuutut ipput. Siunnersuutigineqarpoq nakorsaq napparsimavimmut unitsitsisup nalilissagaa pinngitsaaliissummik unitsitsinissamut ilisarnaatit eqqortinneqarneranik nalilissasoq. Tamatuma kingornatigut politiit isummerfigissavaat, namminneq nakorsamit allagartaq tunngavigalugu napparsimavimmut pinngitsaaliissummik unitsitsinermut peqataassanerlutik, tamatuma kingornatigut nakorsaanerup nalilissavaa, napparsimavoq napparsimavimmut unitsinneqassanersoq.

§10:

Peqqinnissamut Aqutsisoqarfik isumaqarpoq § 10 erseqqippallaanngitsoq napparsimavimmi pinngitsaaliissummik uninngatitsinissap ingerlanneqarnissaanut piffissarititaasumut naleqqiussilluni. Imm. 1 tunngavigalugu napparsimasumik napparsimavimmi pinngitsaaliissummik uninngatitsineq pissaaq nakorsaanerup nalilerpagu pinngitsaaliissummik unitsitsinissamut ilisarnaatit pigineqarnersut. Imm. 3 tunngavigalugu napparsimavimmit angerlartinneqarnissamut, ulloq unnuallu siulliup ingerlanerani qinnuteqaat, saqqummiunneqarsimasoq nakorsaanermit nalilerneqassasoq kiisalu taassuma aalajangernera nal. akunnerisa 48-t qaangiutsinnagit ilisimatitsissutigineqassalluni. Erseqqinngitsutut ippoq napparsimasoq napparsimavimmi pinngitsaaliissummik uninngatinneqassanersoq pinngitsaaliissummik unitsitsinermut atatillugu imaluunniit pinngitsaaliissummik uninngatitsineq atsaat pissanersoq nakorsaaneq aalajangereerpat aamma tamanna napparsimasumut nalunaarutigineqareerpat.

§18, imm. 3:

Naleqatigiissorinangilaq napparsimavoq nakorsarneqarluni agginngitsoortoq politiinit aaneqarnissaa peqqinnissaqarfiullu napparsimaviisa ilaanni pinngitsaaliissummik nakorsaatitortikkiartorlugu. Politiit aallernissaat sioqqullugu eqqarsaatigineqartariaqarpoq nunap immikkoortuani tarnimikkut napparsimasunik nakorsaasartut napparsimasumik takusaassanersut, kiisalu nakorsaatinik nakorsaaneq angerlarsimaffimmi ingerlallugu. Tamanna politiit ikiortigalugit pisinnaassaaq pisup uloriarnartutut ingerlalersinnaaneranut nalorninartoqarpat. Atsaat taamaattoqareerpat nakorsaaneq aalajangersinnaavoq, tak. § 18, imm. 3.

Akissuteqaat:

Inuit nakorsarneqartussanngorlugit eqqartuunneqarsimasut - § "tarnimikkut napparsimasut eqqartuunneqarsimaneq tunngavigalugu nakorsarneqartussanik" taaneqartartut – inatsisartut inatsisaanni atuuttumi, Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut Inatsisissaat nr. 24, 3. december 2012-imeersumi, toqqaannartumik ilaatinneqanngillat imaluunniit siunnersuummi matumani. Eqqartuunneqarsimasunik nakorsartinnissaq siunertaralugu Danmarkimut nuussinissamut atatillugu pisinnaatitsissut Kalaallit Nunaanni Pinerluttulerinermi inatsimmi § 157-imiippoq, tak. inatsimmi tassani kapitali 33. Taamaattumik eqqartuunneqarsimaneq tunngavigalugu tarnimikkut napparsimasunik nuussinissamut piginnaatitsissut pineqanngilaq, siunnersuummi § 10, imm. 2-mi, napparsimasunik nunani allani nakorsarneqartussanngortitsinermi, tassa eqqartuussinikkut nakorsarneqarnissamik eqqartuussinissamut piginnaatitsissut eqqartuussiveqarfimmiimmat. Taamatuttaaq Justitsministeri pisussaavoq aalajangersakkanik aalajangersaassalluni tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuseqartarneq pillugit inatsisartut inatsisaanni aalajangersakkat tarnimikkut napparsimasut eqqartuunneqarsimaneq tunngavigalugu nakorsarneqartussanut qanoq annertutigisumik atuutsinneqarnissaa pillugu, tak. pinerluttulerinermi inatsimmi § 263 a. Siunnersuutip § 1-iani immikkoortumik nutaamik ilanngussisoqarpoq, tassa ersersinneqarpoq napparsimasoq tarnimikkut napparsimasunut immikkoortortaqarfimmi uninngatinneqartoq, Kalaallit Nunaata avataani tarnimikkut napparsimasunut immikkoortortaqarfimmut matoqqasumut nuunneqarsinnaasoq, imaappat napparsimasoq avatangiisiminut ima ulorianartigisutut isigineqarluni, napparsimasup Dronning Ingridip Napparsimavissuani tarnikkut nappaatilinnut immikkoortortaqarfianni uninngatinneqarnissaa illersorneqarsinnaanngitsutut isigineqarpat. Tamatuma tarnimikkut napparsisunik nuussinissamut piginnaatitsissut erseqqissarpaa aamma assigilerpaa siunnersuummut oqaaseqaatini § 10, imm. 2-mut allassimareersut.

Aqutsisoqarfiup § 13, imm. 4-mut oqaaseqaatai, tassa pinngitsaaliissummik nakorsaatitortitsinermi nakorsaammik toqqaanermut tunngatillugu siunnersuummik allanngortitsitsinissamut pissutissaqartitsinngillat. Siunnersuummi erseqqissaatigineqarpoq nakorsaatit saniatigut sunniutigisartagaasa qanoq amerlatiginerat aalajangiisuunngitsoq, kisianni akerlianik nakorsaatit saniatigut sunniutaasa peruluutaasut qanoq amerlatiginerat. Nakorsaatit saniatigut annertuumik sunniutigisartagaasa ilanngunneqarneranni napparsimasoq nakorsartinnerup nalaani annertuumik persaqusersorneqarnissaanut illersorniarneqarpoq. Taamaalilluni § 13-imi ilanngunneqartup qulakkiissavaa nakorsaatit atorneqartut napparsimasunut sapinngisamik annikinnerpaamik akornusiinissaat. Nakorsaatit saniatigut

sunniutaannut sapinngisamik pitsaanerpaamik sunniuteqarnerannut naleqqiussineq piviusumik nakorsat suliatigut oqimaalutassavaat, kisianni nakorsaait arlallit toqqarneqarsinnaaneranni siunnersuummi erseqqissaatigineqarpoq, pingaaruteqartoq tassaasoq nakorsaammi saniatigut sunniutaat *peruluutaasut* amerlassusiat; imaanngitsoq nakorsaait saniatigut sunniutaasa *katillugit amerlassusiat*.

Aqutsisoqarfiup § 1, imm. 2-mut oqaaseqaataanut tunngatillugu: "Nakorsaanerup" nakorsaq tassaavoq uninngasunut immikkoortorta qarfimmi, napparsimasup uninngaffigisaani nakorsatut akisussaassuseqartoq. Taanna tassaasinnaavoq allaffissornermi nakorsaaneq kisianni taamaattuusariaqanngilaq. Tarnimikkut napparsimasunut immikkoortorta qarfimmi imaluunniit immikkoortorta qarfinni nakorsaaninngortinneqarsimasoq angalappat imaluunniit allamik pissuteqarluni peqanngikkallarpat, taava nakorsaq pisortap peqannginnerani pissutsit atuuttut tunngavigalugit immikkoortorta qarfimmi nakorsaanerugallassaaq, nakorsaanerup piginnaatinneqarnera, imaanngippat pisunut ataasiakkaanut tunngatillugu immikkut aalajangersaasoqarsimalluni. Aalajangiineq inatsisartut inatsisaat maannakkut atuuttoq tunngavigalugu "nakorsaanermit" aalajangerneqassappat, tamanna imatut paasineqassaaq nakorsaanerup pisinnaatitaanera allanut tunniunneqarsinnaanngitsoq, immikkoortorta qarfimmi nakorsanut appasinnerusumik inissisimasunut tassa nakorsaaneq sivikitsumik peqanngitsillugu, soorlu assersuutigalugu unnuakkut napparsimavimmut pinngitsaaliissummik unitsitsisoqassatillugu imaluunniit pinngitsaaliissummik uninngatitsisoqassatillugu. Siunnersuummi matumani tulluanngitsoq taanna aaqqiiffigineqarpoq taamaaliornikkut aammattaaq appasinnerusumik inissisimasoq, nakorsat sulisut pigaartuusut nakorsaanerup peqannginnerani aalajangiisinnaalerlutik, tamatuma pisariaqartillugu, tak. siunnersuutip § 5-ia. Aalajangersakkami tassani siunnersuutigineqarpoq nakorsaaneq sapinngisamik piaartumik aamma kingusinnerpaamik nal. akunneri 24 qaangiunneranni aalajangiineq pillugu isummissasoq. Innersuussutigineqarput siunnersuummut aalajangersakkat nalinginnaasut, immikkoortoq 2.3.2.

Aqutsisoqarfiup §§ 8 aamma 9-mut oqaaseqaataanut tunngatillugu: Tassa ilimagineqartariaqarmat inuup napparsimavimmut pinngitsaaliissummik unitsinneqarnissaminut akuttunngitsumik timini atorlugu pinaannissaa, taava piviusumik napparsimavimmut pinngitsaaliissummik unitsitsinissaq politiinut tunniunneqarpoq. Taamaattumik politiit aalajangiissapput napparsimavimmut pinngitsaaliissummik unitsitsinissap aallartinneqarnissaanut, tak. siunnersuummi § 8, imm., tamanna pissusissamisoortutut isigineqarpoq tassami tamatumunnga politiit ikiuuttussaammata. Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup aalajangissavaa, napparsimavimmut pinngitsaaliissummik unitsitsinissamut

piumasaqaataasut naammassineqarnerisut, tak. siunnersuummi § 9, imm. 2. Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup napparsimasumit tiguisussap, taamaalilluni inaarutaasumik piginnaeqarpoq aalajangissallugu, napparsimasoq napparsimavimmut pinngitsaaliissummik unitsitaasutut unitserneqassanersoq. Nakorsaaneq naliliinermit, nakorsamit aggersarneqarsimasumit naliliutigineqarsimasumit pituttugaanngilaq, tak. § 7, imm. 3. Tamanna § 9, imm. 2-mut oqaaseqaatini erserpoq.

Taamaalilluni nakorsaaneq napparsimavimmut pinngitsaaliissummik unitsitsinissaq naaggaarsinnaavaa aamma naaggaassallugu, nammineq napparsimavimmut pinngitsaaliissummik unitsitsinissamut atortussat imaluunniit piumasarineqartutut piumasaqaatit, tak. § 6 aamma § 9, imm. 1, eqqortinneqarsimanngitsut nalileruniuk. Oqaaseqaatit siunnersuummik allannortitsitsinissamut pissutissaqartitsinngillat, tassami matuma siulianiittut siunnersuummi aamma tamatumunnga oqaaseqaatini takuneqareersinnaammata. Oqaaseqaatini oqaatsit "nakorsaq napparsimavimmut unitsitsisoq" allannortinneqarput imatut "nakorsaq aggersarneqarsimasoq", taamaalilluni piginnaasanik agguataarineq erseqqinnerulerpoq.

Aqutsisoqarfiup §10-mut oqaaseqaataanut tunngatillugu: Napparsimavimmi pinngitsaaliissummik uninngatitsinissaq piviusunngortinneqartussaassaaq napparsimasoq tarnikkut nappaatilinnut immikkoortorta qarfimmi, nammineq piumassutsiminik imaluunniit pinngitsaaliissummik unitsitsineq aqutigalugu uninngasooreerluni angerlartinneqarnissaminut qinnuteqartillugu. Napparsimasup qinnuteqarnerminut akissuteqarfigineqassaaq sapinngisamik piaarnerpaamik aamma qinnuteqarnerup saqqummiunneqarneranit naatsorsorlugu nal. akunnerisa 24-t ingerlaneranni, tak. § 10, imm. 3, naggat siulleq. Imaappat napparsimasup (suli) siunnersuutip § 6-iani piumasaqaatit naammassisimappagit taava napparsimasoq napparsimavimmit angerlartinneqarnissaminut itigartinneqassaaq. Taamaattoqarpat taava napparsimasoq napparsimavimmi pinngitsaaliissummik uninngatinneqassaaq. Napparsimasunut ungasinngitsukkut pinngitsaaliissummik uninngatinneqalersimasunut pisariaqassaaq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneq nakkutiginninnissamut piffissaqartinneqarnissaa, tassa nal. akunnerinik 24-nik sivirusunerusumik isummerfigissammagu napparsimavimmi pinngitsaaliissummik unitsinneqarsimasoq uninngatinneqarnissaanut tunngatillugu. Nalinginnaasumik oqaaseqaatit immikkoortoq 2.4.1 innersuunneqarput, aammattaaq § 10-mut immikkut oqaaseqaatigineqartut.

Aqutsisoqarfiup §18, imm. 3-mut oqaaseqaataanut tunngatillugu: Inatsisartut Inatsisaanni piumasaaqatit killeqartut arlallit allattorneqarput, taakku eqqortinneqarsimassapput pinngitsaaliissummik malittarinnerup atorneqalinninnerani. Nakorsarneqarneq »napparsimasup peqqissusianut pisariaqassaaq«, tamanna imatut paasineqassaaq, tassa nakorsaanerup tamatumunnga naliliinnerminut naleqqiussilluni pingaartissavaa, nakorsarneqarneq unitsinneqarpat tamanna napparsimasup peqqissusianut qanoq kinguneqassanersoq. Tamatumunnga ilaapput piumasaaqatit kinaassusersionnertaqanngitsut. Nakorsaanerup aalajangiinneranut tarnimikkut napparsimasunut napparsimaveqarfiup saniatigut sumiiffinni allani nakorsaasoqarnissaanut peqqusummik ilaqarsinnaanngilaq. Napparsimasut napparsimavimmit angerlartinneqareerneramik kingornatigut pinngitsaaliissummik malinnaaffigineqartussanngortinneqarsimasut, taamaalillutik angerlarsimaffimminni nakorsarneqarsinnaanngillat, napparsimasoq nammineq angerlarsimaffimminiikkaluarpalluunniit, tamatumunnga ilanngullugit angerlarsimaffittut neqeroorutit imaluunniit unnuisarfinni il.il.

Aalajangersagaq killeqartumik atuutsinneqarfeqarsinnaammat aamma qaqutigunnaq atorneqartarluni, isumaliuutigineqarsimavoq pinngitsaaliissummik malittarinninnermut maleruaqqusat inatsimmit peerneqarnissaat. Tamatuma assigisaanik danskit inatsisissatut siunnersuummik tusarniaassuteqarput, tassani ilaatigut pinngitsaaliissummik malinnaaviginninnermut maleruaqqusat peerneqarnissaat anguniarneqarluni, tamatumani tunngavigineqassaaq aalajangersakkap atorneqartarnera pillugu nalilersuineq. Tamatuma assinganik aallartitsisoqarsinnaavoq imaappat aalajangersakkap atorneqarnissaata pisariaqarunnaartutut nalilerneqarpat.

Tarnimikkut Nappaatillit Maalaarutaannik Aalajangiisartunit tusarniaanermut akissuteqaat:

Ataatsimoortumik isiginnilluni siunnersuummi suli nakorsap unitsitsisup aamma Dronning Ingridip Napparsimavissuani tarnikkut nappaatillit immikkoortortaqaarfianni nakorsaanerup tiguisusussap akornanni erseqqissumik immikkoortitsisoqanngilaq, tassa tarnimikkut napparsimasunik nakorsaasarnermi nammineersinnaajunnaarsitsinermik aamma pinngitsaaliissummik atuinernik allanik aalajangiinnermut tunngatillugu. Aalajangiisartut isumaqarput tulluurtuunngitsoq Dronning Ingridip Napparsimavissuanut pinngitsaaliissummik unitsitsinissap aallartinneqarnissanik aalajangiineq nakorsaq unitsitsisoq isumasioqatigereerlugu aalajangiineqassappat, tassa piumasarineqartut aamma atorneqartut eqqarsaatigalugit nalorninartoqalersinnaammat, ilumut pinngitsaaliissummik unitsitsineq attuumassuteqannginneq tunngavigalugu ingerlanneqarnersoq. Aalajangiisartut siunnersuutigaat siunnersuummi nakorsap unitsitsisup aamma tarnimikkut napparsimasunut immikkoortortaqaarfimmi nakorsaanerup akornanni

immikkoortitsisoqarnissaa, aammattaaq inatsimmi ersersinneqassasoq nakorsap unitsitsisup nakkutigissagaa inatsimmi napparsimavimmut pinngitsaaliissummik unitsitsinermut piunasaqaataasut eqqortinneqarnerat, tamatumunnga ilanngullugit nakorsap misissuereerluni nappaatigisatut ilimagisaa, napparsimasut silaqassutsimigut qanoq inissisimanera aamma pissutsit nakorsamit tapersiisut, tassa inatsimmi § 6, normu 1-imi (nakorsartittariaqarnermut ersiut) imaluunniit normu 2 (ulorianassutsimut ersiut) taakkua naammassineqarsimanersut, taamatutaaq nakorsaaneq tigusisoq aalajangiissasoq, ilumut napparsimavimmut pinngitsaaliissummik unitsitsinissamut piunasaqaatit naammassineqarsimanerannut tunngatillugu.

Inatsisissatut siunnersuummi siunnersuutigineqarpoq inatsimmi § 5 allanngortinneqassasoq imatut ilisillugu, piginnaatitsissut ilanngunneqassaaq pinngitsaaliissummik atuinissamut aalajangerneq tarnimikkut napparsimasunut immikkoortortaqaarfimmi nakorsamit allamit aalajangerneqarsinnaasoq, tassa nakorsaanerup peqannginnerani aamma nakorsaaneq piaartumik kiisalu kingusinnerpaamik nal. akunnerisa 24-t qaangiunnerini aalajangiineq pillugu isummissasoq.

Tarnimikkut Nappaatillit Maalaarutaannik Aalajangiisartut siunnersuutigaat aalajangersakkami taarsiullugu ilanngunneqassasoq, nakorsaanerup "pisariaqanngitsumik kinguarsaanertaqanngitsumik" aalajangiineq pillugu isummissasoq.

Tamatumunnga tunngavilersuutaasoq tassaavoq tarnimikkut napparsimasunik nakorsaasarnermi pinngitsaaliissummik atuinissamut piunasaqaataavoq, akulerunnissamut taamak annertutigisumut aalajangiineq nammineersinnaajunnaarsitsineq aamma pinngitsaaliissummik allamik atuineq pillugit, aalajangiinerit tamatigut tarnimikkut napparsimasunut nakorsaasarnermi nakorsamit immikkut ilinniarsimasumit aalajangerneqartarnissaat, kiisalu tarnimikkut napparsimasunut immikkoortortaqaarfimmi akuttunngitsumik nakorsanik pigaartuusartunik atorfeqartoqartarmat, tarnimikkut napparsimasunut tunngatillugu immikkut ilisimasaqanngitsunik. Periarfissaliissut pilersinneqarpat tassa aalajangiinermik nakorsamit allamit aalajangiisoqarsinnaanngortitsilluni, kiisalu tamatumunnga ilutigitillugu ersersinneqarpoq nakorsaanerup aalajangiineq piaarnerpaamik akuerissagaa, tamannalu pissasoq aalajangiinerup kingornatigut kingusinnerpaamik nal. akunnerisa 24-t qaangiunnerisigut, taamaattoqarneratigut nalorninartoqalersinnaavoq tassa tarnimikkut napparsimasunut nakorsaasarnermi nakorsamit immikkut ilinniarsimasumit akuersineq nal. akunnerinut 24-nut qaninnerulernissaa akerlianik sapinngisamik piaartumik pilluni. Tamanna tarnimigut napparsimasup inatsisitigut illersorneqarneranik qasukkartitsinermik kinguneqarsinnaasutut

Aalajangiisartut isigaat, taamaattumilli Aalajangiisartut siunnersuutigaat matuma siuliani allanneqartutut oqaaseqatigiit allanngortinneqarnissaat.

Siunnersuummi § 1, imm. 2-mut Aalajangiisartut oqaaseqatigaat napparsimavimmut pinngitsaaliissummik unitsitsinissamik aalajangiinerup kingornatigut nal. akunnerinik 48-nik kingusinnerpaamik piffissaliinissaq ilanngunneqassasoq, Dronning Ingridip Napparsimavissuani tarnikkut nappaatilinnut immikkoortorta qarfiannut nuussisoqarnissaanut, taamatuttaaq tamanna nalorninartoqalersinnaavoq nuussinerup nal. akunnerinut 48-nut qaninnerulersinnaaneranut imaanngitsoq piaarnerpaamik pinnani, tak. matuma siulianiittoq. Tamanna tunngavigalugu Aalajangiisartut siunnersuutigaat kingusinnerpaamik piffissarititaasoq oqaaseqatigiinnik ukuninnga "pisariaqanngitsumik kinguarsaanertaqanngitsumik".

*Inatsimmut oqaaseqaatini siunnersuummut § 1, imm. 2-mut allassimavoq:
"Naatsorsuutigineqarpat napparsimasup qanoq issusia tassanngaannartumik pilluni qaangiukkiartussasoq sivikitsuinnaassasorlu taava nuutsitsineq pissanngilaq." Inatsimmi taamatut piginnaatitsineq erseqqissorinannngilaq.*

Siunnersuummut oqaaseqaatini § 3, imm. 3-5 allassimavoq Dronning Ingridip Napparsimavissuani tarnikkut nappaatilinnut immikkoortorta qarfianni nakorsaaneq "[...] taassuma tarnikkut nappaatit pillugit immikkut pisariaqartumik ilisimasaqarnissaa naatsorsuutigineqarmat [...]. Aalajangiisartunit tunngavigineqarpoq Dronning Ingridip Napparsimavissuani tarnikkut nappaatilinnut immikkoortorta qarfianni nakorsaanertut atorfinitsinneqassagaanni tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqartoqartussaavoq, taamaattumik Aalajangiisartut siunnersuutigaat inatsimmi oqaaseqaatit oqaasiliornermi atorineqartut assingusut atorineqassasut, taamaalilluni allanneqassaaq, tassa [...] tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqassaaq [...]"

Akissuteqaat:

Naalakkersuisut siunnersuut manna aqputigalugu napparsimavimmut pinngitsaaliissummik unitsitsinermik aalajangiinissamut kina inaarutaasumik piginnaatitaanersoq erseqqissarniarlugu misilippaat. Tamatuma kingunerisaanik ilaatigut oqaatsit aalajangersimannngitsut "Nakorsaq" inatsisartut inatsisaanni atuuttumik § 6, imm. 2-mi allanngortinneqarpoq imatut "Nakorsaq aggersarneqarsimasoq", siunnersuummi § 7, imm. 2-mi. Naalakkersuisut isumaqatigaat Dronning Ingridip Napparsimavissuani tarnikkut

nappaatilinnut immikkoortoqarfianni nakorsap unitsitsisup aamma nakorsaanerup assigiinngissutaat suli erseqqissarnerusariaqartoq, taamaalilluni qularneq pilersinneqassanngimmat napparsimavimmut pinngitsaaliissummik unitsitsinermut aalajangiinermut kina aalajangiisuunersoq.

Taamaattumik siunnersuummut oqaaseqaatini oqaatsit "nakorsaq unitsitsisoq" allanngortinneqarput imatut "nakorsaq aggersarneqarsimasoq", taamaalilluni piginnaatinneqarnerup sumiinnera erseqqissarneqarpoq. Pissutigineqartoq tamanna pissutigalugu siunnersuummi § 1, imm. 2, allanngortinneqarpoq, tassani pineqarpoq napparsimavimmut pinngitsaaliissummik unitsitsinerit, peqqinnissaqarfiup peqqinnissaqarfiinit allanit aallartinneqartunut tunngatillugu. § 1, imm. 2, naggatit aappaat allanngortinneqarpoq imaalillugu *"Dronning Ingridip Napparsimavissuani tarnikkut nappaatilinnut immikkoortortaqarfianni nakorsaanerup nakorsaq aggersarneqarsimasoq isumasioqatigalugu aalajangiivigissavaa, paasissutissat pigineqartut tunngavigalugit aamma nakorsap aggersarneqarsimasup misissuisimanera tunngavigalugu pinngitsaaliissummik unitsitsinissaq ilumut pisariaqarnersoq."*

Dronning Ingridip Napparsimavissuani tarnikkut nappaatilinnut immikkoortoqarfianni tigusinermi nakorsaanerup inaarutaasumik aalajangiineq aalajangissavaa, napparsimavimmut pinngitsaaliissummik unitsitsinissamut piunasaqaatit naammassineqarsimanersut, tak. siunnersuummi § 9, imm. 2. Taamaattumik pineqarpoq marloqiusamik misiliinissaq tassa nakorsaaneq naliliinermut pituttorsimanngimmat, nakorsap aggersarneqarsimasut naliliisimaneranik kiisalu politiit qanoq ittuugaluarnersumik iliuuseqarsimanerannut.

Taamaalilluni tigusinissaq sioqqullugu nakorsap aggersarneqarsimasup akisussaaffigivaa atortussanut piunasaqaataasut § 6 naapertorlugu napparsimavimmut pinngitsaaliissummik unitsitsinissamut naammassineqarsimasut, tak. § 7, imm. 4. Pisup ingerlanerani piffissap taassuma nallernerani nakorsaanerup akisussaaffeqarnera naliliinissaq sinnerlugu annertusineqarsinnaanngilaq, ilumut pinngitsaaliissummik napparsimavimmut unitsitsinissaq pisariaqavinnersoq, *tassa paasissutissat pigineqartut tunngavigalugit tamanna eqqortuunersoq.*

Taamaalilluni nakorsaanerup akisussaaffiginngilaa paasissutissat nakorsamit aggersarneqarsimasumit ingerlateqqinneqartut imaluunniit napparsimasumik naliliineq eqqortuunngitsut paasinarsippata, kiisalu tamakku tunngavigalugit nakorsaaneq aalajangiinermik kukkusumik aalajangiinermut peqataasimalluni, tassa napparsimasup pinngitsaaliissummik napparsimavinnut unitsinneqarnissamut piunasaqaatinik naammassinninneranut tunngatillugu.

Siunnersuummut § 1, imm. 2-mut oqaaseqaatit matuma siulianiittut kingunerisaannik allanngortinneqarput.

Naalakkersuisut suli annertunerusumik erseqqissaaqqinnissaq pisariaqartutut isiginngillat, tassa nakorsap aggersarneqarsimasup nakkutiginninnissaanut tunngatillugu inatsimmi napparsimavimmut pinngitsaaliissummik unitsitsinissamat piumasaqaatit naammassineqarsimanerannut atatillugu. Tamanna siunnersuutip § 7, imm. 3-mi aamma 4-mi ersersinneqareerpoq. Pinngitsaaliissummik unitsitsinermi periutsit pillugit Namminersorlutik Oqartussat nalunaarutaanni nr. 17, 2. december 2013-imeersumi § 5-imi toqqaannartumik ersersinneqarpoq, nakorsaq aggersarneqarsimasoq nappaatip suusinnaanerani, napparsimasup tarnimigut pissusaanik aamma nakorsap Inatsisartut inatsisaanni § 6, normu 1 (nakorsarneqartariaqarnerup ersuitaa) imaluunniit imm. 2 (ulorianartorsiornermut ersiutaa) naapertorlugu, piumasaqaatit eqquutsinneqarnerannut isumaqataanermik imalimmik nalunaarusiussaag.

Tarnimikkut Nappaatillit Maalaarutaannik Aalajangiisartut siunnersuutip § 5-ianut oqaaseqaataat aalajangersakkamik allanngortitsinissamat pissutissaqartitsinngilaq. Oqariaatsimi atorneqartumi "piaarnerpaamik" paasinarpoq nakorsaaneq isummissasoq sapinngisamik piaartumik aamma sapinngisamik piffissap sivikinnerpaap ingerlanerani. Taamaattumik Naalakkersuisut paasinninnerat naapertorlugu oqariaatsimi paasinareerpoq, tassa nakorsaaneq isummernissaa pissasoq pisariaqanngitsumik kinguarsaanertaqanngitsumik, taamaattumik oqariaaseq naannerusoq "piaarnerpaamik" atorusunneqarneruvoq. Oqariaaseq inatsimmi atuuttumi ilisimaneqareerpoq aalajangersakkammi tassaniittut ingerlateqqinneqarmata, ilaatigut §§ 8-mi aamma 9-mi 'sapinngisamik' "piaarnerpaamik" atorneqarpoq. Taamatuttaaq isumaqarnarpoq nutserineq eqqarsaatigalugu taaguusersuutit assigiit suli atorneqarunik, oqariaatsinut tunngatillugu Naalakkersuisut paasinnerat naapertorlugu taakku assigiipput. Naalakkersuisut isumaqataannngillat piffissanik kingusinnerpaaffiusussamik killissarititaasunik nal. akunnerinik 24-nik aamma nal. akunnerinik 48-nik § 1, imm. 2-mi ilanngussinerup nalorninartoqalersinnaanera kingunerissagaa, tassa aalajangiineq nakorsaaneq atsaat nal. akunneri 24-t qanillineranni pissasoq imaanngitsoq sapinngisamik piaarnerpaamik. Piffissap killissarititaasup nakorsaaneq isummernissaanut kingusinnerpaaffiusussaag pineqarpoq, tamatumma Naalakkersuisut paasinninnerat naapertorlugu innuttaasoq inatsisitigut illersorneqarnera pitsanngortippaa, "piaarnerpaamik" allassimasoqaannarneranit. Inatsimmi atuuttumi § 9, imm. 3-mi nalunnginneqareerpoq, taannalu siunnersuutip § 10, imm. 3-anni ingerlateqqinneqarpoq, tamannalu Aalajangiisartut eqqarsarnartoqartillugu uparuarsimannngilaat.

Tarnimikkut Nappaatillit Maalaarutaannik Aalajangiisartut oqaatigaat, piginnaatitsissut oqaaseqatigiinni ukunani *"Naatsorsuutigineqarpat napparsimasup qanoq issusia tassanngaannartumik pilluni qaangiukkiartussasoq sivikitsuinnaassasorlu taava nuutsitsineq pissanngilaq."* oqaaseqaatsini nalinginnaasuni, immikkoortoq 2.2.1-imi siunnersuummi ingerlateqqinneqartoq, taanna erseqqippallaanngitsoq. Oqaaseqaatini siunnersuummi § 1, imm. 2 innersuunneqarpoq. Siunnersuummi § 1, imm. 2-mi pineqarpoq napparsimavimmut pinngitsaaliissummik unitsitsinerit peqqinnissaqarfiup immikkoortuini allani aallartinneqartut. Tassani pineqarpoq soorunami nalinginnaasumik piffissami utaqqisoqassaaq napparsimavimmut pinngitsaaliissummik unitsitsinissap aalajangerneqarneranit aallartitsinermut, napparsimasup Dronning Ingridip Napparsimavissuani tarnikkut nappaatilinnut immikkoortoqarfiannut tikinnissaata tungaanut, tassami napparsimasup angalanissaa aallartinneqassammat aamma piviusunngortinneqarluni. Napparsimasup qanoq innera nalilerneqarpat tassaasoq *tassanngaannartumik pilluni qaangiukkiartussasoq sivikitsuinnaassasorlu*, taava tamatumani pissusissamisoortut piginnaatitsisoqanngilaq Dronning Ingridip Napparsimavissuani tarnikkut nappaatilinnut immikkoortoqarfiannut pinngitsaaliissummik unitsitsinissaq aallartissallugu, tassami inuk tikiunnermini pinngitsaaliissummik unitsinneqarnissamut siunnersuummi § 6-imi atortussanut ilaatinneqarnera atorunnaassammat.

Naggasiullugu maalaarutininik aalajangiisartut allapput iluaqutaassasoq § 3, imm. 3-5-imut oqaaseqaatini taaneqartut erseqqissarneqarpata, tassa Dronning Ingridip Napparsimavissuani tarnikkut nappaatilinnut immikkoortoqarfimmi nakorsaaneq tarnimikkut napparsimasunut nakorsaasinnaanermut nakorsatut immikkut ilinniarsimasutut akuersissummik pigisaqassasoq. Naalakkersuisut aalajangiussimavaat oqaaseqaatit allanneqarsimasut naammattutut isigineqartariaqartut, tassa nakorsaanerup piginnaasaanut naleqqiussilluni. Naalakkersuisut isumaqatigaat tarnimikkut napparsimasunik nakorsaasarneq aamma nakorsaanerup pisinnaatitaanerit pigisai, taakkunani piumasaqaataasoq tarnimikkut napparsimasunik nakorsaasarnermut pisariaqartumik tunngaveqarnissaq aamma ilisimasaqarnissaq, soorlu Tarnimikkut Nappaatillit Maalaarutaannik Aalajangiisartut tusarniaanermut akissuteqarnermini tamanna naatsorsuutigigaat.

Tarnimikkut Nappaatillit Peqatigiiffiannit, Sugisamit, tusarniaanermut akissuteqaat:
Peqatigiiffik tusarniaaffigineqartunut ilaavoq 2012-imi tarnimikkut napparsimasut pillugu inatsimmut siullermut atatillugu, kiisalu matumuuna pingaarnertut tunngaviusut isummanut tunngaviusunut, inatsimmut matumunnga tunngavigineqartut ilalerlugit.

Siunnersuutip matuma atuarnerani uagut paasivarput matuma siuliani tunngaviusut pingaarnerit aamma isummat tunngaviusut allanngorsimannigitsut, siunnersuummi matumani allannguutissatut siunnersuutigineqartuni. Allannguutissatut siunnersuutini taakkunani napparsimasut inatsisitigut isumannaatsuunissaasa ajornerulernissaat siunertarineqanngitsoq, kisianni siunertarineqartoq tassaavoq inatsisip tulluarsarnissaa piviusunut aamma atugassarititaasunut, maani Kalaallit Nunatsinni atuuttunut.

Taamaalilluta paasinnippugut taperserniarlugulu inatsimmi piginnaatitsisoqarnissaa nakorsap allap nakorsaanerup saniatigut pinngitsaaliissummik iliuuseqarnissamut aalajangiisinnaaneranut, taamaaliornikkut nakorsaanerup aalajangiineq tamanna nal. akunnerisa 24-t qaangiutinnginnerini isummerfigissallugu.

Taamatuttaaq paasilluarparput aamma taperserlugu nakorsaatilik napparsimasumut sapinngisamik ikinnerpaamik saniatigut peruluutaasartunik sunniuteqartartunik atuisarnissaq. Uagut isumarput tassaavoq tarnimikkut napparsimasunik nakorsaasarnerni annertunaarlugit nakorsaatitortitsisoqannginnissaa imaluunniit kukkusumik nakorsaatitortitsisoqannginnissaa.

Akissuteqaat:

Peqqissutsimut Naalackersuisoqarfiup nalunaarppaa Tarnimikkut Nappaatillit Peqatigiiffianit Sugisap siunnersuut taamatut saqqummiunneqarnermisut isikkoqartillugu tapersersinnaagaa.

Nunatsinni Meeqqat pisinnaatitaaffii pillugit sullissivimmit, MIO-mit akissuteqaat:

Nalinginnaasumik oqaaseqaatit

Meeqqat Illersuisuata iluaraa, tarnimikkut napparsimasut kiffaanngissusiiagaasarnermut allatigullu pinngitsaaliissummik iliuuseqarfigineqartarnermut il.il. atatillugu inatsisitigut inissisimaffiat Kalaallit Nunaanni nukittorsarneqarnissaa siunnersuutip siunertarimmagu.

Siunnersuut pineqartoq NP'p Meeqqat Pisinnaatitaaffii pillugit Isumaqatigiissutaanut atatillugu immikkut meeqqat inuusuttullu isiginnittaasiatigut Meeqqat Illersuisuata nalilerpaa:

NP-artikeli 3: Meeqqap pisariaqartitai

1. Meeqqanut tunngatillugu sulissuteqarnerni tamani, tamakku inuttut atugarissaarnissaq siunertaralugu pisortatigoortumik imaluunniit inuinnarnit ingerlassatut suliffeqarfinnit, eqqartuussivinnit, suliffeqarfinni pisortanit imaluunniit inatsisiliornikkut pisortaqarfinnit ingerlanneqaraluarpataluunniit, meeqqamut namminermut pitsaaneruserisaaq

salliutinneqartassaaq.

2. Naalagaaffiit peqataasut meeqqap ineriartornermini pisariaqartitaatut illersorneqarnissaa isumagineqarnissaalu piginnaatitaaffiit pisussaaffillu meeqqap angajoqqaavinut, taakku sinnerlugit perorsaasumut inunnulluunniit allatut inatsisinik tunngaveqarlutik meeqqamut akisussaaffiginnittunut atuuttut naapertorlugit isumannaallisassavaat, tamannalu siunertaralugu inatsiseqarnerup tungaatigut aammalu pisortaaffiginnikkut iliuusissanut maleruagassanik naleqquttunik tamanik aalajangersaassallutik.

3. Naalagaaffiit peqataasut isumannaallisassavaat suliffeqarfiit, sullissinerit pisorta qarfiillu meeqqanik isumaginninnissamut illersuinissamulluunniit akisussaassuseqartut najoqutassianut, pisortanit aalajangiisinnaatitaasunit aalajangersarneqartunut naapertuuttuunissaat, pingaartumik isumannaatsuunissap, peqqinnissap, sulisorisat amerlassusissaasa piukkunnaateqarnerisalu kiisalu suliamut paasisimasalinnit nakkutigineqarnissaasa tungaasigut.

NP-artikeli 12: Meeqqap tusaaneqarnissamut pisinnaatitaaffia

1. Naalagaaffiit peqataasut qularnaassavaat meeqqap, nammineerluni isummaminik saqqummiuussisinnalereersup, isummaminik taamaattunik pissutsini meeqqamut namminermt tunngassutilinni tamani akornuserneqarani oqaatiginnissinnaatitaanissaa; meeqqap isummamisut saqqummiussai qassinik ukioqarnera aammalu inerisimassusia naapertorlugit pingaartinneqartassapput.

2. Tamanna siunertaralugu meeraq periarfissinniarneqartassaaq pingaartumik suliassat meeqqamut tunngassutillit pisortanit imaluunniit nakkutiginnikkut pisortanit eqqartuussivitsigoortumik aalajangiiffiginiarneqarnerini tamani oqaaseqaateqarnissaanut nammineerluni imaluunniit sinniisitut aallartitaq aqputigalugu imaluunniit pisortaatitaq naleqquttoq aqputigalugu naalagaaffiup eqqartuussiviini periaaserineqartartut naapertorlugit.

NP-artikeli 24: Meeqqap peqqissutsimik sapinngisamik pitsaanerpaamik angusaqarnissaanut pisinnaatitaaffia

Naalagaaffiit peqataasut akuersaarpaat peqqinnissap tungaatigut isumagineqarnikkut, napparsimalermermi nakorsarneqarsinnaanikkut aammalu napparsimareermermi peqqissarneqarnikkut pitsaanerpaamik angusaqarnissamut meeqqap piginnaatitaanera. Naalagaaffiit peqataasut qularnaarniagassaraat meeqqat arlaannaataluunniit taamatut nakorsartinnissamut paarineqarnissamullu pisinnaatitaaffimminnik arsaarneqannginnissaat. Meeqqat Illersuisuata tusarniaanermi akissutai tamakku aallaavigalugit isigineqassapput.

Nalinginnaasumik isiginnineq

Meeqqat Illersuisuata innersuussutigaa, tarnimikkut napparsimasunik kiffaangissusiaasarnermut allatigullu pinngitsaaliissummik iliuuseqarfigineqartarnermut atatillugu meeqqat inuusuttullu inatsisitigut inissisimaffiannik nassuiaaneq inatsisit oqaasertaanni, nalunaarummi aamma tassunga ilitersuutini immikkoortortami ataatsimi immikkut katersorneqassasut. Meeqqat aallaavittut mianerisassaapput, meeqqallu tarnimikkut nappaatillit suli mianerisassaanerupput. Taamaattumik Meeqqat Illersuisuata siunnersuutigaa, inatsit meeqqat inuusuttullu inatsisitigut inissisimaffiannik ersarissaanermik imaqassasoq kiisalu immikkut immikkoortuni ersarissarneqassallutik.

Tamatuma saniatigut Meeqqat Illersuisuata innersuussutigaa, erseqqissarneqassasoq, meeqqat inuusuttullu tarnimikkut napparsimasut aallaavittut inatsisitigut inissisimaffimmi, inatsimmik makkununga atatillugu malinnittumik ilaatinneqassasut:

- *Meeqqat inuusuttullu napparsimasunik siunnersuisartumik kinaassusersiunngitsumik, meeqqanik inuusuttunillu oqaloqateqarnissamut ilinniarsimasumik neqeroorfigineqartassasut.*
- *Erseqqissarneqassasoq, meeraq/inuusuttoq naammagittaalliornissamut pisinnaatitaaffeqartoq.*
- *Meeqqat inuusuttullu sapinngisamik annertunerpaamik katsorsartinneqarnermini ilaatinneqartassasut.*
- *Paasissutissanik meeqqat inuusuttut oqaasii atorlugit suliaqartoqassasoq, taamaasilluni meeqqap/inuusuttup katsorsartinneqarnini kiisalu napparsimmavimmi uninngatitaanermi inatsisitigut illersugaanini pillugit ilisimasaqalerniassammat.*
- *Peqqinnissaqarfiup meeqqallu atuarfiata akornanni suleqatigiittoqassasoq, taamaasilluni meeqqap/inuusuttup napparsimmavimmi uninnganerani atuarnera sapinngisamik annikinnerpaamik sunnerneqassammat.*
- *Tarnikkut napparsimasut immikkoortortaanni immikkut ittumik meeqqat-inuusuttut immikkoortortaata ilusilersorneqarnera meeqqat inuusuttullu piumasaannik ilusilersorneqassasoq.*

Meeqqanut sunniutaasussanik naatsorsuineq

Meeqqat Illersuisuat isumaqarpoq, sunniutissanik naatsorsuinernut allanut atatillugu, inatsisissatut siunnersuummi immikkoortumik ataatsimik ilanngussisoqartariaqartoq "Meeqqanut inuusuttunullu sunniutissat":

Kalaallit Nunaat NP Meeqqat pillugit Isumaqatigiissutaannut ilanngunniukuvoq,

taamaattumillu qulakkeertariaqarlugu pisortani imaluunniit namminersortuni aaqqiissutit meeqqanut inuusuttunullu attuumassutillit, taakku pisariaqartitaannik siullertut inissiissasut. Isumassarsiorfissatut Skandinaviami nunat arlallit "Meeqqanut sunniutaasussanik naatsorsuinerit" atorneqartarput.

Akissuteqaat:

Inatsisissatut siunnersuummi ilaapput nammineersinnaajunnaarsitsineq aamma tarnimikkut napparsimasut nakorsarneqarneranni pinngitsaaliissutinik allanik atuinerit. Taamaattumik siunnersuummi aammattaaq ilanngunneqarput meeqqat aamma inuusuttut tarnimikkut napparsimasunut, Dronning Ingridip Napparsimavissuani immikkoortortaqarfiannut unitsinneqartut. Naalakkersuisut eqqumaffigaat Meeqqat Illersuisuata isumaqatigiissummi tunngaviit pingarnerit saqqummiussai, isumaqatigiissut Kalaallit Nunaannit akuersarneqarsimavoq.

Tarnimikkut napparsimasut nakorsaasarneq, napparsimasunik sullissinerup nalinginnaasup ilagaa sammisaaq immikkut ittoq. Naalakkersuisut isumaqarput periutsit amerlasuut Meeqqat Illersuisuanit erseqqissaqullugit ujartorneqartut, peqqissutsimut inatsimmi nalinginnaasumi ersersinneqartut. Taamatuttaaq siunnersuummi § 2-mi piginnaatitaaffiit arlallit malittarisassiuunneqarput, napparsimasunut 15-it inorlugit ukioqartunut imaluunniit paasissutissinneqareernikkut akuersissuteqarnissamik piginnaasaqarnermik ataavartumik annaasaqarsimasunut, taamatuttaaq napparsimasunut ukiukitsunut 15-inik ukioqalersimasunut kisianni isummernermik kingunerisassaannik paasinnissinnaanngitsutut isigineqartunut.

Tamatumani taamatuttaaq pineqarpoq periutsinik atuutereersunik ingerlatitseqqinneq aammattaaq marloqiusamik malittarisarsiornissamik pinngitsoortitsiniarneq.

Immikkoortut tulleriiaarneqarsimasut ulluinnanit ingerlatsinermut aamma isumalluuteqarnermut tunngasorujussuupput, apeqqutit taakkununga immikkut tunngatinneqarput. Naalakkersuisut immikkoortunut ataasiakkaanut oqaaseqarniarput imatut:

- Meeqqat inuusuttullu napparsimasunut siunnersuisartumik allanut attuumassuteqanngitsumik tarnimikkut napparsimasutut allatulli neqeroorfigineqarput. Kalaallit Nunaanni peqqinnissaqarfiup nammineq nalilissavaa tarnikkut napparsimanerit pillugit immikkut ilinniarsimasumik meeqqanik inuusuttunillu oqaloqateqartarnermut, tamanna isumalluutit eqqarsaatigalugu naleqquttuunersoq.
- Tarnimikkut napparsimasut naammagittaalliornissamut periarfissaat inatsimmi erseqqippit. Taakkaa aammattaaq ukiukitsunut atuupput.

- Naalakkersuisut siunnersuut aqputigalugu siunertaraat nakorsarneqarnerup ingerlanneqarnerani peqataatinneqarnissap pisariaqartup qulakkeerneqarnissat. Soorlu assersuutigalugu napparsimasunik siunnersuisoqarnermut maleruaqqusani aamma siunnersuummi aalajangersakkani nalinginnaasunik kapitali 2-mi tamanna erserpoq.
- Paasissutissat ugartorneqartutut ittut peqqinnissaqarfiup suliassarissavai. Peqqissutsimut Naalakkersuisoqarfiup nalunaarutigisimavaa peqqinnissaqarfimmi aqutsisoqarfik aperiniarlugu meeqqat oqaasii atorlugit suliaqarnissamik eqqarsaateqarnersut.
- Malinnaaffigiininnermut aamma nakorsartinnissamut pilersaarutit pigineqareerput tassani soqutigisaqartut naleqquttut suleqatigineqassapput. Tarnimikkut napparsimasut atuarnermittut malinnaasinnaanerat nakorsarneqarnerup ingerlanneqarneranut ilutigitillugu, tamanna piviusumik pineqartorpianut sulisunit tamatumunnga naleqquttunik nalilersorneqartuusariaqarpoq.
- Maannakkorpiaq immikkut ittumik meeqqanut-inuusuttunut tarnimikkut napparsimasunut immikkut immikkoortortaqarfimmi pilersitsisoqarnissaanik pilersaaruteqartoqangilaq.

"Meeqqanut sunniutaasunik naatsorsuineq" tarnimikkut napparsimasunik nammineersinnaa-junnaarsitsisarneq allatigullu pinngitsaaliissummik iliuuseqartarneq pillugit inatsisartut inatsisissaattut siunnersuutip matuma avataaniippoq. Meeqqat Illersuisuannut inassutigineqarpoq tamanna pillugu Inatsisartunut toqqaannartumik saaffigineqqullugu.

Tusarniaanermut akissuteqaat Tilioq – Innarluutillit oqaaseqartartoqarfiat:

Innarluutillit oqaaseqartartoqarfiannit nuannaarutigineqarpoq Peqqissutsimut Ilisimatusarnermullu Naalakkersuisoqarfiup Ombudsmandip isornartorsiorsimasai aaqiiviginiarmagit.

Innarluutillit oqaaseqartartoqarfiannit paasilluarneqarpoq pisoqarnerisa ilaanni pisariaqarsinnaammat nakorsaanerup peqannginnerani pisuni arlaqartuni aalajangiinerit nakorsanit allanit aalajangerneqarsinnaasunnngormata. Taamaattorli nuannaarutigaarput nakorsaanerup sapinngisamik piaarnerpaamik aamma nal. akunnerisa 24-t ingerlanerini nakorsap allap aalajangerneru akuerisussaammagu.

Taamatuttaaq Innarluutillit oqaaseqartartoqarfiata nuannaarutigaat nakorsaatit saniatigut sunniuteqartarnerannut apeqqut erseqqissaaffigineqarmat, aammattaaq oqaatsitigut naleqqussaasoqarmat tulluarsaasoqarlunilu, taakku inatsimmi pineqartut erseqqinnerulersippaat aamma ataatsimoortumik takuneqarsinnaasunnngortippat.

Allannguutinit allanik oqaaseqaatissaqanngilagut.

Akissuteqaat:

Peqqissutsimut Naalakkersuisoqarfiup nalunaarpaa Innarluutillit oqaaseqartartoqarfiannit siunnersuut taamatut saqqummiunneqarnermisut isikkoqartillugu tapersersinnaagaa.

Tusarniaanermut akissuteqaat uanngaanniit Institut for Menneskerettigheder:

Instituttip pitsaasutut isigaa siunnersuummi periutsip atorineqartartup inatsisitigut tunngavissaqartinneqarnissaa siunertarineqarmat, tamatuma kingunerisaanik nakorsaanerup peqannginnerani pisuni assigiinngitsuni aalajangiinernik nakorsat allat aalajangiisinnaallutik, tamatumalu kingornatigut aalajangiinerit nakorsaanermit akuersissutigineqassallutik. Instituttip tapersersinnaavaa nakorsaanerup peqannginnerani killilimmik aalajangiisinnaanerup inatsisitigut malittarisassiuunneqarnissaa, tamatumani eqqarsaatigineqarpoq nakorsaanerup peqataanerata inatsisitigut illersugaanermut qulakkeerinninnissamut pingaaruteqarnera.

Insitutti siunnersuummut allanik oqaaseqaatissaqanngilaaq.

Akissuteqaat:

Peqqissutsimut Naalakkersuisoqarfiup nalunaarpaa Institut for Menneskerettigheder siunnersuut taamatut saqqummiunneqarnermisut isikkoqartillugu tapersersinnaagaa.

Qeqertalik Kommunit tusarniaanermut akissuteqaat:

Kommune Qeqertalik Inatsisartut inatsisissaattut siunnersuuttip nassiuunneqartup imarisaanut isumaqataavoq, siunnersuummullu allanik oqaaseqaatissaqarnani.

Kommune Qeqertalimmit naatsorsuutigineqarpoq Peqqissutsimut Ilisimatusarnermullu Naalakkersuisoqarfiup kingusinnerusukkut inatsimmut ilitsersuutinik suliaqarnerminut atatillugu immikkoortut ataasiakkaat erseqqissassagai, ilaatigut § 2-mut tunngatillugu tassani pineqarput meeqqat inuusuttullu 15-it inorlugit aamma sinnerlugit ukioqartut.

Akissuteqaat:

Peqqissutsimut Naalakkersuisoqarfiup nalunaarpaa Qeqertalik Kommunita siunnersuut taamatut saqqummiunneqarnermisut isikkoqartillugu tapersersinnaagaa.

Meeqqanut inuusuttunullu tunngatillugu Peqqissutsimut Naalackersuisoqarfiup MIO-mut akissuteqaat innersuussutigaa aamma tusarniaaqqinnissaq pilersaarutigineqartoq.

Nunatsinni Eqqartuussisuuneqarfimmi tusarniaanermut akissuteqaat:

Pilertortumik suliassat aallat pissutigalugit ajoraluartumik tusarniaanermut akissuteqaat, tusarniaanermut kingusinnerpaamik piffissarititaasup qaangiutinnginnerani, nassiunnissaa angumerisinnaasimangilara.

Taamaattorli inatsisissatut siunnersuummut § 45-imut tassungalu oqaaseqaatigineqartunut ataasituamik oqaaseqaatissaqarpunga, tassani arlaleriarluni allanneqarpoq nammineersinnaajunnaarsitaaneq allaffissornikkut aalajangerneqartoq pillugu naammagittaalliutit Kalaallit Nunaanni Eqqartuussivimmi eqqartuussisumut ingerlatinneqarsinnaasut Kalaallit Nunaanni Pinerluttulerinermi inatsimmi kapitali 28 naapertorlugu.

Taamaattorli oqartussaasoq eqqortoq suliassanik pinerluttulerinermi inatsimmi kapitali 28 naapertorlugu ingerlateqqinneqartunik, tassaavoq Kalaallit Nunaanni Eqqartuussivik, tak. pinerluttulerinermi inatsimmi § 292, imm. 3, taanna suliassanik allaffissornikkut ittunik suliaqartartuummat, tassa imaanngitsoq Kalaallit Nunaanni Eqqartuussivimmi eqqartuussisumut.

Tamatuma saniatigut allanik oqaaseqaatissaqanngilanga.

Akissuteqaat:

Peqqissutsimut Naalackersuisoqarfiup tusaatissatut tiguaa siunnersuummi § 45 tunngavigalugu suliassanik ingerlatitseqqinnermi oqartussaasoq eqqortoq tassaasoq Kalaallit Nunaanni Eqqartuussivik, tassa imaanngitsoq Kalaallit Nunaanni Eqqartuussivimmi eqqartuussisoq.

Siunnersuummi aalajangersakkanut ataasiakkaanut oqaaseqaatit

Kapitali 1-mut
Inatsisip atuuffia

§ 1-imut

Imm. 1-imut

Aalajangersakkami aalajangersarneqarpoq napparsimavimmut pinngitsaaliissummik unitsitsineq, napparsimavimmi pinngitsaaliissummik uninngatitsineq aamma pinngitsaaliissummik allamik atuineq taamaallaat Dronning Ingridip Napparsimavissuani tarnikkut nappaatilinnut Immikkoortorta qarfianni atorneqarsinnaasoq.

Tamatumani pingaartinneqarpoq pinngitsaaliissummik unitsitsineq aamma pinngitsaaliissummik uninngatitsineq taamaallaat Dronning Ingridip Napparsimavissuani tarnikkut nappaatilinnut Immikkoortorta qarfianni isumannaatsumik pisinnaasoq. Tassani neqeroorutigineqarsinnaapput initigut aamma nakorsartinnissamut killiliussat pitsaanerpaat. Taamaalilluni sillimaffigineqareerpoq peqqinnissaqarfiup napparsimavii sinerissamiittut tarnimikkut peruluuteqarlutik napparsimasunik nakorsaanissaminnut immikkut ilinniagaqarsimasunik aamma isumal-luutunik pisariaqartinneqartunik nalinginnaasumik sulisoqartannginnerat.

Imm. 2-mut

Aalajangersakkami ersersinneqarpoq napparsimasumik pinngitsaaliissut atorlugu unitsitsineq aallartinneqarsinnaasoq peqqinnissaqarfiup suliffiini allani. Aalajangersakkami napparsimasut piffissap unitsinneqarfiusup nalaani Nuup avataaniittut sillimaffigineqarput.

Peqqinnissaqarfiup suliffiit allatut paasineqassapput Dronning Ingridip Napparsimavissuata saniatigut nunap immikkoortuini napparsimaviit aamma najukkani napparsimaviit/peqqissaaviit.

Napparsimaviit inuinnarnit (namminersortunit) pigineqartut aamma nakorsiartarfiit aammat-taaq soorlu assersuutigalugit sakkutooqarfinni peqqissutsimik sullissinissamut periarfissat ilanngunneqanngillat, tassani nakorsanilluunniit sulisoqaraluarpata apeqquataatinneqanngilaq.

Siunnersuummi ilanngunneqanngillat inuit napparsimaveqarfiup avataani angerlarsimaffinni uninngasut, naak taakkua qanoq innerat siunnersuummi ilaatinneqartutut isigineqarsinnaaga-luarpalluunniit. Taamaattumik aalajangersakkat inunntut angerlarsimaffinni utoqqarnik paaqqinniffiusuni imaluunniit inunntut timimikkut imaluunniit tarnimikkut annertuumik innarluuti-linnut ineqarfiusunik ineqartinneqartunut atuutinngillat.

Napparsimavimmut pinngitsaaliissummik unitsitsinerni Dronning Ingridip Napparsimavissua-ni tarnikkut nappaatilinnut Immikkoortorta qarfiannut nuutsitsinnissaq nalunaaquttap akunne-risa 48-t ingerlanerini aallartinneqassaaq, tamanna nalinginnaasumik angallannermi pissutsinit

akornuserneqanngippat. Tamatumani paasititsissutiginneqarpoq angallassineq nalinginnaasumik angallannermi aallarnissami siullermi ingerlanneqassasoq. Taamaalilluni angallassigasuarneq atorneqassanngilaq imaanngippat napparsimasup peqqissutsimigut inissisimanerata aammattaaq pineqartup ulorianassusiata tamanna pisariaqartikkaa.

Aalajangersagaq siunnersuummi § 10, imm. 1, 1-imi naggammut siullermut immikkut attuumassuteqarpoq, tamanna naapertorlugu napparsimasut ulorianassuseqarnerisa ilisarnaataat (pappiaqqat aappalaartut) tunngavigalugu unitsinneqartut ingerlaannartumik peqqinnissaqarfimmi tiguneqassapput. Taamaalilluni imm. 1, 2-mi aalajangersakkami periarfissiisoqarpoq napparsimasoq peqqinnissaqarfiup napparsimaviisa ilaanni ingerlaannartumik tiguneqassasoq, aammattaaq tamatuma kingornatigut Dronning Ingridip Napparsimavissuanut nuussinissaq aallartinneqassasoq aamma pilersaaruserneqarluni.

§ 1, imm. 2-mi, naggatit aappaanni ersersinneqarpoq, utaqqiisaagallartumik napparsimavimmut unitsitsinerit aamma uninngatitsinerit taamaattut Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsaannermit aalajangerneqartassasut nakorsaq unitsitsisoq isumasioqatigalugu. Tamanna ima paasineqassaaq nakorsaannerup najukkami nakorsaq isumasioqatigalugu aalajangissavaa, napparsimasup pineqartup nalinginnaasumik angallannermi aallarnissamut utaqqitinneqarnissaa illersorneqarsinnaanersoq, aammattaaq nakorsarneqarneq suna aallartinneqarsinnaanersoq. Peqqinnissaqarfiup ingerlatsivii amerlanerit nalunaarasuartaatit aqqutigalugit attaveqaammik atuisinnaapput, taamaattumik Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsaannerup napparsimasoq takusinnaavaa aamma napparsimasoq oqaloqatigalugu, tamannalu tunngavigalugu napparsimasup qanoq inneranik paasisaqarsinnaalluni.

Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsaannerup aalajangiineq inaarutaasoq aalajangissavaa, ilumut napparsimavimmut pinngitsaaliissummik unitsinneqarnissamut piunasaqaatit eqqortinneqarnersut, tak. siunnersuummi § 10, imm. 2. Taamaalilluni nakorsap aggersarneqartup napparsimavimmut unitsitsinissaq sioqullugu akisussaaffigaa pinngitsaaliissummik napparsimavimmut unitsitsineri atortussat § 7-imiittut eqqortinneqarnerat, tak. siunnersuummi § 8, imm. 4. Pisup ingerlanerani piffissami tassani nakorsaannerup akisussaaffeqarnera naliliinissaq sinnerlugu annertusineqarsinnaanngilaq, ilumut napparsimavimmut pinngitsaaliissummik unitsitsinissaq pisariaqavinneresoq, tassa paasissutissat pigineqartut tunngavigalugit tamanna eqqortuunersoq. Taamaalilluni nakorsaannerup akisussaaffiginngilaa paasissutissat nakorsamit aggersarneqarsimasumit ingerlateqqinneqartut imaluunniit napparsimasumik naliliineq eqqortuunngitsut paa-

sinarsippata, kiisalu tamakku tunngavigalugit nakorsaaneq aalajangiinermik kukkusumik aalajangiinermut peqataasimalluni, tassa napparsimasup napparsimavinnut pinngitsaaliissummik unitsinneqarnissamut piunarsaqaatinik naammassinninneranut tunngatillugu.

Napparsimasup tarnimigut qanoq issusia tassanngaannartumik pisimasutut qaangiuttussatullu nalilerneqarpat, taava Dronning Ingridip Napparsimavissuani tarnikkut nappaatilinnut Immikkoortortaqrifianni nakorsaaneq aalajangersinnaavaa nuussinerup ingerlanneqannginnissaa. Tamatumani ingammik pineqarpoq napparsimasup qanoq innerata pilertortumik iluarsiaortornera takuneqarsinnaalluni, kiisalu tamanna pissutigalugu nal. akunnerisa 48-t ingerlanerini angerlartinneqarnissaa ilimanarsinnaalluni. Taamaalillutik nuussinerit pisariaqanngitsut pinngitsoorneqassapput taamatuttaaq napparsimasumut pinngitsoortinneqassaaq malunnaatilimmik artorsaateqarneq, tassa avatangiisinit sungiusimasanit qimagunnermi malunniuttartoq.

Pinngitsaaliissummik napparsimavimmut unitsitsinermik piviusumik ingerlatsineq sulii politii-niippoq, tak. § 9, imm. 1.

Imm. 3-mut

Aalajangersakkami aalajangersarneqarpoq, timikkut anniaatigisamik pinngitsaaliissummik nakorsarneqarneq pisariaqarpat timikkut nappaatilinnut immikkoortortaqrifimmi ingerlanneqarsinnaasoq, § 15-imi piunarsaqaataasut tamatumani isiginiarneqassapput. Napparsimasooq timimigut anniaatiminik tarnimikkut napparsimasut immikkoortortaqrifianni naammaginartumik nakorsarneqarsinnaappat, timimikkut anniaatillit immikkoortortaqrifiannut nuussisoqassanngilaq.

Imm. 4-mut

Napparsimasooq imm. 4 nutaaq tunngavigalugu Dronning Ingridip Napparsimavissuani tarnikkut nappaatilinnut Immikkoortortaqrifianni uninngasoq Kalaallit Nunaata avataani tarnimikkut napparsimasunut immikkoortortaqrifimmut nuussinneqarsinnaavoq, imaappaat napparsimasooq avatangiisiminut ima ulorianartigaluni, napparsimasup Dronning Ingridip Napparsimavissuani tarnikkut nappaatilinnut Immikkoortortaqrifianni uninngatinneqaannarnissaa illersorneqarsinnaanngitsutut isigineqarsinnaalluni.

Ullumikkut peqqinnissaqarfiup napparsimaviini matoqqasunik immikkoortortaqrifeqanngilaq. Taamaattorli qaqutigoortumik imatut pisoqarsinnaavoq tarnimigut napparsimasooq avatangiisiminut ima ulorianartigaluni, pineqartoq Kalaallit Nunaata avataani tarnimikkut napparsimasut napparsimavianut nuussinneqartariaqarluni.

Nuussineq pinngitsaaliissummik uninngatitsinermi maleruaqqusat naapertorlugit ingerlanneqassaaq, imaappat napparsimasup nuutsinneqarnissamut ilisimatinneqareerluni akuersissuteqarsimanani. Aalajangersakkap inatsit aamma tassani periuseq ingerlateqqippaa, tak. atuuttumi § 9, imm. 2.

§ 2-mut

Imm. 1-imut

Aalajangersakkami pinngitsaaliineq imatut nassuiaaserneqarpoq, ilisimatitsereraluarluni taamaattorli akuersisoqarsimangitsoq iliuuserineqartut ingerlanneqarneratut, napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq kapitali 2 takuuk.

Inatsisitigut tunngaviulluinnarpoq nakorsarneqarneq sunaluunniit nammineq piumassutsimik aallaaveqassasoq. Tunngavigineqartumi pineqarpoq napparsimasup nammineq aalajangiisinaanerminut pisinnaatitaaffia aamma inuup ataqqinassusia kiisalu inniminassusia. Nammineq aalajangiisinaanerminut pisinnaatitaaffik napparsimasunut tamanut pingaernerpaajulluni maleruaqqusaavoq, tassa imaappoq napparsimasunut timimikkut anniaateqartunut taamatullu napparsimasunut tarnimikkut anniaateqartunut. Taamaalillutik paasissutissinneqareernikkut akuersineq pillugu maleruaqqusat, napparsimasut inatsisitigut inissisimanerat pillugu Inatsisartut peqqussutaanniittut, aallaaviusutut tarnimikkut nappaatilinnut aammattaaq atuupput.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 6-imi, imm. 1 allassimavoq nakorsarneqarneq aallartinneqassanngitsoq imaluunniit nanginneqassanngitsoq napparsimasoq paasissutissinneqareernermit isumaqataalluni akuersiteqqaartinnagu, tamanna inatsisini imaluunniit inatsisartut peqqussutaanni §§ 8-10-mi immikkut aalajangersaavigineqarsimangippat. Paasissutissinneqareernikkut isumaqataalluni akuersineq peqqussummi imatut paasineqassaaq peqqinnissamik suliaqartup tungaaniit paasissutissinneqareerneq sukumiisoq tunngavigalugu akuersinertut.

Oqariaaseq "paasissutissinneqareernikkut akuersineq" nunani siuarsimasuni tamani peqqinnis-saqarfinni atuutsinneqarpoq, ilaatigullu nunani tamalaani isumaqatigiissusiornermi atorneqartarluni.

Akuersissuteqarneq sukumiisumik paasissutissinneqarnermik tunngaveqanngitsoq naammanngilaq, tassami pineqarmat nappaammik nakorsarneqarneq taamak annertutigisoq. Napparsimasup nakorsarneqarneq taannarpiaq pillugu paasitinneqarnissani itigartitsissutigisimappagu. taava paasissutissinneqareernikkut akuersisoqarsimaneratut tamanna suli isigineqassaaq, naak paasissutissat amerlassusiat aamma annertussusiat napparsimasup nammineq kissaatigisaa naapertorlugu killeqarsinnaagaluartut.

Apeqqut matumunnga tunngasoq akuersissuteqartoqarsimanerata pigineqarneranik oqarsinnaaneq sioqqullugu paasissutissinneqareerluni atuuttumik akuersissuteqartoqarsimansoq, tamatumani ilaalluni isummanik qanoq erseqqitsigisumik saqqummiussisoqarsimansoq, tamanna napparsimasut inatsisitigut inissisimanerat pillugu Inatsisartut peqqussutaanni akuersissuteqartarnermut maleruaqqusat naapertorlugit nassuiarneqassaaq.

Una *erseqqissumik akuersissuteqarneq* pigineqarpoq napparsimasup nakorsartinnissaq pineqartoq akueralugu paatsuugassaangitsumik isumaqatigippagu. Akuersissuteqarneq oqaasiinnartigut aamma allakkatigut pisinnaavoq.

Una *allakkatigut akuersissuteqarneq* erseqqissumik tunngavissiivoq. Pisulli amerlanersaanni nakorsartinnissamut allakkatigut akuersissuteqarnissaq pisariaqassanngilaq. Tamanna aammattaq matumunnga atatillugu isigineqassaaq, peqqinnissamik suliaqartup allattuinnissamut maleruaqqusat naapertorlugit pisussaaffigaa allattukkanut ilanngutissallugit paasissutissat suut napparsimasumut tunniunneqarsimansut, kiisalu paasissutissat tunniunneqarsimasut tunngavigalugit napparsimasoq qanoq isummersimansoq.

Una *oqaasiinnartigut akuersissuteqarneq* siullertut atuuttutut inatsisip atuuffiani naammassaaq, tak. matuma siuliani peqqinnissamik suliaqartup allattuinnissamut maleruaqqusat naapertorlugit pisussaaffiani taaneqartut.

Una *oqaaseqanngikkaluarluni akuersissuteqarneq* pigineqarpoq inuit ataasiakkaat ileqqulersorneratigut aamma iliuusiatigut imatut paasineqarsinnaappata, paasissutissat tunniunneqartut tunngavigalugit akuersissuteqartoq. Oqaaseqanngikkaluarluni akuersissuteqarnerup inatsimmi piunnaasaqataasut taamaallaat naammassissavai, qularnanngippat nakorsartinnissamut siunnersuutaasoq il.il. imaluunniit taakku ilaat napparsimasup ileqqulersornermigut paasitissimaga. Annertunngitsumilluunniit qularutigineqarpat, napparsimasoq nakorsartinnissap ingerlanissanut akuersisimasoq, taava allakkatigut imaluunniit oqaasiinnartigut akuersissuteqarneq pissarsiarineqartariaqarpoq.

Nammineq kajumissuseq sulii pineqassaaq napparsimasooq eqqortumik ilitsersorneqarluni aamma paasissutissinneqarluni qularunnaarsinneqarpat imaluunniit peqataanissamut akuersisinneqarpat. Napparsimasup iliuuseqarfigineqarnissaminut suniannginnera imatut paasineqassanngilaq, taanna naammattoq paasissutissinneqareernikkut akuersissuteqarnertut isiginninnissamut, taannalu tunngavigalugu iliuuserisassaaq aallartinneqassanngilaq nammineq piuumassusermik tunngaveqartutut.

Napparsimasooq, inatsisartut peqqussutaat nr. 6, 31. maj 2001-imeersoq kapitali 2-mi maleru-aqqusat naapertorlugit napparsimasut inatsisitigut inissisimanerat pillugu, ukiukippallaarnikkut imaluunniit eqqarsartaatsikkut kinguarsimaneq pissutigalugu, paasissutissinneqarnikkut nakorsartinnissamut assigisaannullu nammineq akuersisinnaanngitsooq, aammattaaq naak inatsimmik tunngaveqartumik sinniisussa qaraluortoq sapinngisamik annertunerpaamik aalajangiinnermi peqataatinneqassaaq. Inatsimmik tunngaveqarlugit sinniisussat soorlu assersuutigalugu tassaapput angajoqqaatut oqartussaassusermik pigisaqartut, angajoqqaatut akisussaataasut imaluunniit ilaqqat qanigisat paasissutissinneqarnikkut akuersinermi napparsimasup soqutigisaanik isumaginnittussaataasut.

Imm. 2-4-mut

Napparsimasut 15-it ataallugit ukiullit imaluunniit uteqqissinnaanngitsumik paasissutissinneqareernikkut akuersissuteqarsinnaanermut pisinnaatitaanermut pisaqarunnaarsimasut pillugit, angajoqqaamit akisussaassuseqarnermik pigisartumit, angajoqqaatut akisussaassuseqartumit imaluunniit qaninnerpaamik qanigisanit akuersissuteqarnissamik pissarsiniartoqassanngilaq, imaappat tarnimikkut napparsimasut pillugit inatsit naapertorlugu ingerlaannartumik iliuuseqarnissamik ingerlatsinissaaq pisariaqarpat, inuup imminut navianartorsiortissinnaanera imaluunniit allanik timikkut imaluunniit peqqissutsikkut navianartorsiortitsinnaanera pinngitsoortinniarlugu, imaluunniit napparsimasup annikigisassaannngitsumik annertussusilimmik aserortersinnaanera pinngitsoortinniarlugu.

Immikkut periarfissaaq taanna tassanngaannartumik pisoqarnerani, aalajangersakkami kinguni-usinnaasutut taaneqartut pitsaaliornissaaq siunertarlugu pinasuurtumik akuliuttariaqarnermi taamaallaat atornerqarsinnaavoq. Matumani naatsorsuutigineqassaaq iliuuseqarnissaaq sioqqullugu angajoqqaamit akisussaassuseqarnermik pigisartumit, angajoqqaatut akisussaassuseqartunit imaluunniit qanigisanit akuersissuteqarnissamik pissarsisoqarsinnaannginnera. Tamatum kingornatigut taakku qanoq iliuuseqarneq pillugu ilisimatinneqassapput.

Aalajangersagaq matuma siuliani pineqartoq napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 8 imm. 1-imi aalajangersakkamut

tunngatinneqarpoq. Aalajangersagaq taanna naapertorlugu napparsimasoq 15-inik ukioqalereersimasoq paasisutissinneqareernikkut nakorsartinnissamut akuersisinnaavoq. Angajoqqaatut akisussaassuseqarnermik pigisartoq taamatuttaaq ilisimatineqassaaq aamma ukiukitsup isummerneranut akuliutinneqarluni.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 8 imm. 2 naapertorlugu, peqqinnissamik sullissisup immikkut naliliinermini napparsimasoq 15-inik ukioqalereersimasoq isummernerup kingunissaanik paasinnissinnaasorinngippagu, angajoqqaatut akisussaassuseqarnermik pigisartoq paasisutissinneqarnermigut akuersisinnaavoq. Siunnersuummi § 2 imm. 3-mi, qulakkeerneqarpoq aalajangersakkap § 2 imm. 2-miittup napparsimasunut pineqartunut taakkununga aamma atuuttuunissaa. Tassa imaappoq napparsimasunut taakkununga tunngatillugu § 2 imm. 2-mi piunasaqaatit eqquut-sinneqarpata, iliuuseqarnissap pineqartup aallartinnissaa sioqqullugu angajoqqaatut akisussaassuseqarnermik pigisartumit akuersisummik pissarsiaqartoqassanngitsaq.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq § 4-mi, peqqinnissamik suliaqartup immikkut inatsit naapertorlugu ilinniagagassuseq tunngavigalugu sulisinnaatitaasutut, aamma inuit taakku sinnerlugit sulisuusutut nassuiarneqarput. Tamatumani pineqarput nakorsat, aamma peqqissaasut imaluunniit inuit taakku akisussaaffigisaannik sulisinneqartut. Peqqinnissamik sullissisut aammattaaq tassaapput inuit immikkut maleruqaqusat naapertorlugit peqqinnissaqarfimmi namminneq suliassaminnik suliaqartut.

Inuit peqqinnissamik suliaqartut sorliit pinngitsaaliisummik iliuuseqarnerup sorliup atorneqarnissaanut aalajangiinissaasut eqqaarsaatigalugu, siunnersuummi § 10, imm. 2, § 11, imm. 1, § 14, imm. 2, § 15, imm. 2, § 19, imm. 1, 3 aamma 6 aamma § 22, imm. 1-4, § 25, § 26, imm. 2, § 27, imm. 3, § 29, imm. 1, § 29, § 30, aamma § 32, imm. 1 aamma 3 innersuunneqarput.

Kapitali 2-mut
Aalajangersakkat nalinginnaasut

§ 3-mut

Imm. 1-imut

Nakorsap pineqartup § 3, imm. 1 aamma 2 naapertorlugu pisussaaffigaa napparsimasup akuersinissaa anguniassallugu, napparsimavimmut unitsinneqarneq, uninnganeq aamma nakorsarneqarneq aammattaaq qanoq issutsip pitsaanerulernissaa pillugit pissusissamisoortumik ilitsersuereernermit. Nakorsaq napparsimavimmut unitsitsisoq taamatutaaq immikkoortortaqarfimmi uninngavissami nakorsat taamatut pissussaaffeqarput.

Imm. 2-mut

Nakorsap unitsitsisup unitsitsinerup siunertaa pillugu napparsimasumik ilitsersuinissaq pingaarnertut pisussaaffigaa, kiisalu peqqinnissaqarfimi nakorsap napparsimavimmi uninnganeq aamma nakorsarneqarneq aallartinneqartussatut siunertaasoq pillugit pingaarnertullugit ilitsersuissaaq. Napparsimasup peqqissinerusinnaaneranut tunngasoq ilitsersuinermi sammineqartutut tunngavigineqassaaq. Napparsimavimmut pinngitsaaliissummik unitsitsinermit imaluunniit pinngitsaaliissummik nakorsaatitortitsinermit tunngatillugu ilisimatitsinissamut pissusaaffik siunnersuummi § 4, imm.1-mi takuneqarsinnaavoq.

Imm. 3-mut - 5-imut

Aalajangersakkatut siunnersuut § 3 imm. 3-miittoq naapertorlugu Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup, immikkoortortaqarfimmut unitsinneqartut imaluunniit peqqinnissaqarfiup immikkoortortaqarfiinut allanut unitsikkallarneqartut tamarmik nakorsarneqarnissaanut pilersaarusiunneqartarnissaat akisussaaffiga. Nakorsartinnissamut pilersaarummi nakorsarneqarnerup qanoq ittuunera aamma sunik ilaqarnera allanneqassapput. Napparsimasup namminerminik nakorsarneqarnerminut peqataatinneqarnissaa sapinngisamik annertunerpaamik qulakkeerniarlugu aalajangersarneqarpoq, napparsimasooq peqataatinneqassasoq aamma pilersaarutip imarisaa pillugu tusaaniarneqassasoq pilersaarutip imarisaa pillugu ilitsersorneqaannarnani. Napparsimasup pilersaarutip ingerlanneqarnissaanut akuersissuteqarnissaa anguniarneqartuassaaq.

Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaaneq akisussaaffimmik pisussaaffilerneqarneranut aallaaviuvoq, taassuma tarnikkut nappaatit pillugit immikkut pisariaqartumik ilisimasaqarnissaa naatsorsuutigineqarmat, tamannalu piumasaqaataavoq nakorsarneqarnissanut pilersaarutininik illersorneqarsinnaasunik suliaqarnissamut. Taamaalilluni nakorsaaneq pisussaaffeqarpoq nakorsartinnissamut pilersaarummik suliaqartoqarnissaa isumagissallugu, kisianni imaangitsoq pisuni ataasiakkaani nakorsartinnissamut nammineerluni pilersaarutininik suliaqassalluni.

Pissusiviusut tunngavigalugit nakorsartinnissamut pilersaarusiornermi piumasaqaatit napparsimavimmut unitsinneqarnerup kinguninnguatigut utaqqiisaagallartumik naleqqussakkamik

pilersaarusiortoqarsinnaaneratul paasineqassapput. Napparsimasup aallaqqaataani malittarine-rata kingornatigut, nakorsartinnissamut pilersaarusiornissamut piumasaqaatit annertusissap-put. Nakorsartinnissamut pilersaarut ingerlaavartumik naleqqussarneqartassaaq aamma qaqu-gukkulluunniit ersersinneqassapput nakorsartinnerit suut ingerlanneqarnersut, kiisalu piffissaq-qaninnerusooq eqqarsaatigalugu angorusutat suut piviusunnngortinneqarusunnersut nakorsartin-nerit taakkorpiat atorlugit, tak. siunnersuummi § 3, imm. 4.

Nakorsartinnissamut pilersaarutip assinga napparsimasumut tunniunneqassaaq, imaangippat pineqartup taanna piumanagu, tak. § 3, imm. 5.

§ 4-mut

Imm. 1-imut - 2-mut

Aalajangersakkami aalajangersarneqarpoq napparsimasooq nammineersinnaajunnaarsitsineq aallartinneqartinnagu aamma pinngitsaaliissummik allamik atuisoqalersinnagu ilisimatinne-qassasooq aamma allanik paasissutissinneqassasooq. Tamanna atuuppoq napparsimasup paasis-sutissanik tamakkuninnga piumasaqarsimanngikkaluarpalluunniit.

Taamaattorli taamatut sioqqutsisumik ilisimatitsineq immikkut pilertortumik pinngitsaaliis-summik sukaterussinerup aamma nukiit atorlugit pissaanermik atuinermi pinngitsoorneqarsin-naavoq, tak. § 4, imm. 2. Tassanngaannartumik immikkut pisut imatut paasineqassapput pisut, ulorianartunik allanik pisoqarsinnaanera pinngitsoortinniarlugu pinngitsaaliissutip atortariaqa-lenera. Taamatut pisunik pisoqartillugu ilimagineqarsinnaanngilaq aamma pissutsit malillugit illersorneqarsinnaanngilaq iliuseqarnissaaq sioqqullugu imm. 1-imi paasititsinissamut piuma-saqaat atorneqassagaluarpat. Taamatut pisoqartillugu iliuseqarnermut tunngavilersuut tama-tuma kingornatigut paasititsissutigineqassaaq.

Pinngitsaaliissummik atuinissamik aalajangerneq pisortat ingerlatsineranni suliassat sularine-qartarnerat pillugu inatsimmi aalajangiisarnerit pillugit paasinninnermut attuumassuteqarsori-narmat, ilaatigut tamatuma kingunerisaanik pisortat ingerlatsineranni suliassat sularineqartar-nerat pillugu inatsimmi maleruaqqusaniittoq piumasaqaateqarneq tunngavigalugu tamatuma kingornatigut allaganngorlugu tunngavilersuisoqarnissaanik tamatumani atuutissaaq.

§ 5-imut

Imm. 1-imut

Napparsimasup nammineq akuersinissaa anguniarlugu periarfissaasinnaasunik tamanik misilleeqqaarnani pinngitsaaliissummik atuisoqannginnissaa qulakkeerniarlugu, § 5 imm. 1-imi aalajangersagaq naapertorlugu napparsimasoq akuersitinniarneqassaaq, kiisalu tassanngaannartumik pisoqartinnagu napparsimasoq tamatumunnga isummernissaminut piffissamik naammaginartumik eqqarsarfissaqartinneqassaaq. Tamatumani ilaatigut pineqarsinnaapput napparsimasup nammineq piumassutsiminik napparsimavimmut unitsinneqarnissaminut, nammineq piumassutsiminik nakorsartinnissamat peqataanissaa imaluunniit nammineq piumassutsiminik ileqqulersornerit ilaannik pinngitsoortitsinissaanut kajumissaarniarlugu.

Napparsimavimmut unitsitsinermi tassani nakorsartittariaqarnermut ersiutit takuneqarsinnaalutik tassani pissutsit qanoq ittuunerat apeqqutaatillugit, napparsimasoq nammineq piumassutsini naapertorlugu napparsimavimmut uninnissaanut piffissaq sivisuneq atorlugu kajumissaarneqarsinnaavoq. Taamaattorli napparsimasup imminut ulorianartorsiortinnissaa imaluunniit allanik ulorianartorsiortitsisinnaappat, napparsimavimmut unitsitsinissaa kinguarsarpallaasallugu nalinginnaasumik illersorneqarsinnaassanngilaq.

Imm. 2-mut

Napparsimasup kajumissaarneqarluni nammineq piumassutsiminik akuersissuteqarnissaa iluatsinngippat, kiisalu pinngitsaaliissummik iliuseqarnissap pisariaqartinneqarnera isumaliuutigineqartariaqarluni, pinngitsaaliissut anguniakkamut naapertuuttunngorlugu atorneqassaaq, tak. § 5, imm. 2. Ajornartorsiummik pisumik aaqqiiniarnermi periarfissat arlaqarpata iliuseqarneq annikinnerpamik iliuseqarnerusoq atorneqassaaq.

Imm. 2 tassaavoq "annikinnerpaaffissaqartitsinermik" tunngaviusup, tunngaviusutut nalinginnaasutut pinngitsaaliissummik atuineramik sumilluunniit atuilersinnaani tunngaviusup, inatsikkut aalajangersaaffigineqarnera. Tunngavissamat assigiimmik tunngaveqartumik sumik pisoqartillugu tamatigut iliuseqarnermi annikinnerpaamik iliuseqartoqartarnissaanut ilisarnaataavoq, kiisalu iliuseqarnermi piffissaq atorneqartoq taamaallaat pisariaqavissumut killeqartinneqarnissaa anguniarlugu. Tunngaviusoq inatsisip ilaani erseqqinnerusumik saqqummiunneqarpoq soorlu assersuutigalugu pinngitsaaliissummik nakorsaatitortitsinermi § 14, imm. 4-mi, kisianni pinngitsaaliissummik atuinermi suugaluartumi piumasaqaatini aamma qanoq iliornermi tamani suunera paasineqassalluni.

Taamaattorli nassuerutigineqartariaqarpoq tunngaviusup taassuma qanoq atorneqarnissaa ilaatigut pisuni ataasiakkaanik nalornissutaasinnaasarmat. Periutsip suup annikinnerpaamik iliuisiunerata nalornissutaasarnissaa ilimanarluinnarpoq. Inatsisip aaqqissuussaana naapertorlugu soorlu assersuutigalugu eqqissisaammik kapisineq, § 25, naapertorlugu, qiterut atorlugu

sukaterussinnermit annikinnerusumik iliuseqarnertut isigineqarpoq. Imaassinnaavoq napparsimasut ilaat allatut eqqarsartut, qiterut atorlugu sukaterussineq atorusunnerullugu eqqissisaammik kapitinnermut taarsiullugu. Napparsimasooq taamatut paasinarsaappat, napparsimasup piumasaa avaqqullugu eqqissisaammik kapisinissamut, nakorsatut suliatigut pingaarutilinnik tungavissaqartitsinissaa piumasaaqaataassaaq. Tamanna nakorsartinnissamut paasissutissinneqa-reerluni akuersissuteqarnissap aallaavigineqarnerata pissusissamisoortumik malitsigaa.

Aalajangersakkap § 5, imm. 2-mi qitiutinneqartoq ilaa tassaavoq pinngitsaaliissummik atuinerup annertussusia inatsimmi § 13-imi aamma § 34-mi piviusunngortinneqarpoq. Aalajangersakkanut taakkununga tunngasunut oqaaseqaatit innersuunneqarput.

Imm. 3-mut

Pinngitsaaliissutip aamma nukiiit atorlugit pissaanerup napparsimasunik pillaanertut atorneqartannginnissaat pillugit inatsisitigut maleruaqqusaliortoqarnissaa pisariaqanngitsutut isigineqartarsimavoq, taamatuttaaq nikassarpasittumik aamma kanngunarsaarpasittumik iliuseqarnerit inerteqqaapput. Pinngitsaaliissummik atuinerup sapinngisamik qajassuarnerpaamik atorneqarnissaanut aamma narrunarsaanerup imaluunniit akornusersuinerup pisariaqanngitsup tujormissutaasut atorneqannginnissaannut, tassani pineqarpoq pillaanermik iliuitsit aamma nikassarpasittumik pissusilersornerit aatsaat taamatulli taakkua inerteqqaapput, tak. § 5, imm. 3.

§ 6-imut

Imm. 1-imut - 2-mut

Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuseqarneq pillugu Inatsisartut Inatsisaanni nr. 24, 3. december 2012-imeersumi atuuttuusumi Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaaneq arlalinnik pissusaatitaaffeqarpoq aamma pissusaaffeqarpoq.

§ 3, imm. 3 naapertorlugu soorlu assersuutigalugu nakorsaanerup akisussaaffigivaa, immikkoortortaqarfimmut unitsinneqartunut tamanut nakorsartinnissamut pilersaarummik suliaqarnissaaq, aamma napparsimasup pilersaarutip imarisaa pillugu ilitsersorneqarnissaa taamatuttaaq tamatuma ingerlanneqarnissaanut ingerlaavartumik napparsimasup akuersissuteqarnissaa anguniassallugu. Taamatuttaaq § 34, imm. 1 naapertorlugu nakorsaanerup nakkutigissavaa inatsit tunngavigalugu pinngitsaaliissummik atuinerit pisariaqanngitsumik annertunerusumik atorneqannginnissaat. Tassaasinnaavoq nammineersinnaajunnaarsitsineq, pinngitsaaliissum-

mik nakorsartinneq, napparsimavimmit angerlartinneqarnerup kingornatigut pinngit-saaliissummik malinnaaffiginninneq, pinngitsaaliissummik qiterut atorlugu sukaterussineq, nukiit atorlugit pissaanermik atuineq, sernissuiniarluni qiterut atorlugu sukaterussineq, im-mikkut nakkutiginninneq, immikkoortorta qarfimmi matunik paarnaarsisarneq, pinngitsaaliis-summik inunnik eqqiluisaartitsineq, allagarsianik/nassiussarsianik, napparsimasut inaannik aamma pigisanik misissuineq, inuit timaatigut satsaalluni misissuineq, aammattaaq nakorsaa-tinik il.il. arsaarinnissuteqarneqarneq.

Oqaaseq "nakorsaaneq" pineqartuni taakkunani imatut paasineqarsinnaavoq, tassa nakorsaa-nerup akisussaaffigigaa aalajangersakkat pineqartut tarnimikkut napparsimasunut immikkoor-torta qarfimmi malinneqarnissaannut eqqortitsinissaq. Soorlu assersuutigalugu § 3, imm. 3 i-matut paasineqarsinnaavoq nakorsaaneq pisussaaffeqartoq isumagissallugu napparsimasunut tamanut nakorsartinnissamut pilersaarummik suliaqartoqarnissaa, kisianni imanngitsoq pin-ngitsoornani nammineeirluni pisuni tamani nakorsartinnissamut pilersaarummik suliaqassasoq.

Malugiuk oqaatsit artorneqartut ilaat inatsimmit atuuttumit pisuummata taamaattumik al-laanerularput terminologimit matuminnga nutserisumit atorneqartunit.

Inatsimmi atuuttumi aalajangersakkani allani oqaaseq "nakorsaaneq" atorneqarpoq aalajangi-nermut atatillugu, tassa pinngitsaaliissummik atuinermi piumasagaatit eqqortinneqarnerannut. Pineqarput § 1, imm. 2 aamma § 10, imm. 2, pinngitsaaliissummik unitsitsinissamik aalaja-ngiinnermut tunngatillugu, § 11 imm. 1, pinngitsaaliissummik tigummigallagassanngortitsiso-qarnissaanut tunngatillugu, § 12, imm. 1, pinngitsaaliissummik utertitsinissamut tunngatillu-gu, § 14, imm. 2, katsorsaaniarnermut atatillugu pinngitsaaliissummik iliuuseqarnerup aallar-tinneqarnissaanut aamma katsorsaanerup naammassinissaanut nukersornermik atuinissamut tunngatillugu, § 15, imm. 2, pinngitsaaliissummik iliuuseqarnerup aallartinneqarnissaa timikkut nappaatinik nakorsaasoqarnissaanut atatillugu § 19, imm. 1 aamma 3, angerlartitaanerup ki-ngorna pinngitsaaliissummik malinnaaffiginninneq aamma takkutinnngitsoorpat politiit ikiorti-galugit aaneqarnissaa, § 22, imm. 2, qiterut atorlugu aalaakkiinerup saniatigut paffinnut aam-ma imaluunniit singernernut aalaakkiissutit aqqatillu atorneqarnissaannut tunngatillugu, § 22, Imm. 3, sinerissami peqqinnissaqarfiup immikkoortuisa arlaanni pinngitsaaliissummik aalaak-kiinerup sivitsorneqarnissaanut tunngatillugu, § 30 timikkut eqqiarnissamut tunngatillugu pinngitsaaliissummik atuinissamik aalajangernissamut tunngatillugu, § 32, imm. 1, allagarsi-anik/nassiussarsianik, inip uninngaviusup aamma pigisat, timip satsillugu misissorneqarnis-saanut aammattaaq atortunik arsaarinnissuteqarnissamut aamma suujunnaarsitsinissamut aala-jangiinnermut tunngatillugu. Taamatutaaq nakorsaanerup § 34, imm. 2, naapertorlugu nakkuti-gissavaa nammineersinnaajunnaarsitsinermi piumasagaataasut inatsimmi killiliussat allassi-

masut tunngavigalugu eqqortinneqarnersut. Tamatumunnga atatillugu apeqquittingorsinnaavoq qanoq oqaatsip “nakorsaanerup” pinngitsoortissinnaagaa piginnaatitaanerup tamatuma nakorsanut allanut tunniunneqarsinnaanera, tassami pisuni taakkunani “nakorsaanerup” pinngitsaaliissummik atuinnermut atatillugu, inatsisitigut innarlerneqannginnissamut immikkut qularnaveeqqutaasutut paasineqarsinnaammat.

Naalackersuisut paasinninnerat naapertorlugu aalajangersakkani taakkunani piumasaqaat ilanngunneqartariaqarpoq, tassa aalajangiineq nakorsaanermit namminermit imaluunniit nakorsamit, nakorsaanerup peqannginnerani nakorsaanertut inissisimasumit (taartaaneq), taamaalilluni aalajangiinissamut pisinnaatitaaneq nakorsanit sulisunit appasinnerusumik inissisimasunik ingerlanneqarsinnaanani. Tamatumunnga pissutaavoq oqaaseq "nakorsaaneeq" taakkununnga atatillugu aalajangiinissamut attuumassuteqarmat, ilumut inatsimmi piumasaqaatit pinngitsaaliissummik atuinnissamut eqqortinneqarsimanerannut, kiisalu pisinnaatitaanermik nakorsaanermit inuttut tunniussineq taamaalilluni immikkut inatsisitigut qulakkeerinnertut paasineqasalluni. Paasinninneq taanna danskit Justitsministeriaqarfiata paasinninneranut naleqquppoq. Aalajangersakkap siunnersuutigineqartup tarnimikkut napparsimasut pillugit inatsimmi matumani § 7-imi kinguneraa aalajangiinerit aalajangersakkami taaneqartut, soorlu assersuutigalugit pinngitsaaliissummik napparsimavimmut unitsitsineq aamma pinngitsaaliissummik napparsimavimmi uningatsineq taakku nakorsaanermit namminermit aalajangerneqassapput, imaluunniit nakorsaanerup peqanngikkallarnerani nakorsamit nakorsaanerup peqannginnerani Dronning Ingridip Napparsimavissuani tarnikkut nappaatilinnut Immikkoortorta qarfianni nakorsarneqarnermut akisussaassuseqartumit (nakorsarneqarnermut akisussaalluni nakorsaaneeq) aalajangerneqassapput. Nakorsaanerup pisinnaatitaanera taamatut pisoqarnerani tunngaviusumik nakorsanut sulisunut appasinnerusumi inissisimasunut tunniunneqarsinnaanngilaq.

Taamaattorli aalajangersakkap aammattaaq kinguneraa nakorsaanerup pisinnaatitaaffianik allamut tunniussinerup kingunerissanngikkaa aalajangiinerup nakorsaanerup peqannginnerani nakorsanit allanit aalajangerneqarsinnaasoq. Nakorsaanerup peqannginnerani nakorsaq aalajangiippat taava nakorsaaneeq *piaarnerpaamik* aamma kingusinnerpaamik nalunaaquttap akunerisa 24-t qaangiunneranni nakorsap pinngitsaaliissummik atuneq pillugu aalajangiineranut isummissaaq, tassa imaappoq piffissami siullerpaami. Nakorsaanerup isummerneru pinngitsaaliissummik iliuseqarnerit pillugit allattaavissuarmut allanneqassaaq.

Aalajangersakkami tarnimikkut napparsimasut tarnikkut napparsimanermi pisariaqartumik nakorsarneqarnissaat qulakkeerneqarpoq aammattaaq nakorsaanerup peqannginnerata nalaani, taassumalu pinngitsaaliissummik iliuseqarnermut tamatumunnga attuumassuteqartumik akuersissuteqarnera pissarsiarineqarsinnaanani.

Siunnersuummi § 11, imm. 2 aamma § 34, imm. 2,4 aamma 5 isummerfiginninnissamut piffissarititaasut allartorneqarsimasut tassa napparsimavimmi pinngitsaaliissummik uninngatitsisoqarnissaanut aalajangerneq aammattaaq pinngitsaaliissummik atuinissaq pillugu aalajangerneq nakorsap pinngitsaaliissummik atuinissamik aalajangernerannit allartissasut, taamaattumillu nakorsaanerup tamatuma kingornatigut nakorsap aalajangiismaneranit akuersissuteqarneranit sunniuteqarfigineqassanngillat.

Nakorsaaneq soorlu assersuutigalugu nakorsap napparsimasup napparsimavimmut pinngitsaaliissummik unitsitsineqarnissaanut imaluunniit napparsimavimmi pinngitsaaliissummik uninngatinneqarnissaanut aalajangiineranik atorunnaarsitsippat, nammineersinnaajunnaarsitsisimaneq ingerlaannartumik atorunnaarsinneqassaaq tassami tamatumunnga piumasagaatit eqquutsinneqarunnaarmata. Pisoq tunggavimmigut pisunit allaanerunngilaq naammagittaalliorfiusumit nammineersinnaajunnaarsitsineq inatsisinik unioqqutitsinertut nalunaarutigineqarpat, tassa pinngitsaaliissummik napparsimavimmut unitsitsinermut imaluunniit pinngitsaaliissummik napparsimavimmi uninngatitsinermut piumasagaatit naammassineqarsimasutut isigineqannginneri pissutigalugit. Taamatutaaq tamanna atuuppoq pinngitsaaliissutinik allanik atuiluni iliuuseqarnernut tunngatillugu.

Malugineqassaaq inatsimmi napparsimasut pisinnaatitaaffii qulakkeerniarlugit aalajangersakkat nalinginnaasut soorunalimi aammattaaq atuummata, tassa nakorsaanerup peqannginnerani nakorsap pinngitsaaliissummik atuinissamik aalajangiineranut tunngatillugu. Ilaatigut tamanna imatut paasineqassaaq pinngitsaaliissut sunaluunniit atorneqartillugu napparsimasoq suli ilitsersorneqassammat iliuuserineqartumut naammagittaalliuteqarnissamut periarfissaqarnera pillugu, aammattaaq pinngitsaaliissummik katsorsaanerumut aalajangiineq aallaavigalugu kinguartitsinissamut sunniuteqanngimmat, tak. siunnersuutip § 41, imm. 1 aamma 3. Tamatuma taamatutaaq kingunerissava napparsimasup siunnersortia pinngitsaaliissut atorneqartoq pillugu paasitinneqassammat aammattaaq paasissutissamut allamut suugaluartumut tunngatillugu, tassa pineqartup toqqarneqarsimanermini suliassani isumannaatsumik suliarisinnaaniassamagat, tak. siunnersuummi § 38, imm. 1.

Napparsimasup iluuseqarneq naammagittaalliutigippagu siunnersuummi kapitali 11-mi naammagittaalliuteqarnissamut periarfissaqarnerumut aamma eqqartuussivik aqqutigalugu ingerlatsisinnaanermi ingerlatseriaatsit malinneqassapput.

Tamakku saniatigut immikkoortoq 2.3.2-mut nalinginnaasumik oqaaseqaatit innersuunneqarput.

Kapitali 3
Nammineersinnaajunnaarsitsineq

§ 7-imut

Aalajangersakkamut siunnersuutigineqartumut ilaapput napparsimavimmut pinngitsaaliissummik unitsitsinermi aamma napparsimavimmi pinngitsaaliissummik uninngatitsinermi ataatsimoortumik atugassat, naleqq. § 8 imm. 4, aamma § 11 imm. 1.

Tunngaviusumik piumasqaat tassaavoq inuup silanngajaartuunissaa imaluunniit silanngajaarnermut sanilliunneqarsinnaalluartumik pissuseqarnissaa. Silanngajaarnermut oqariaatsimut tunngatillugu aamma oqaaseqatigiinnut "imatut pissuseqarpat, tamanna tamatumunnga sanilliunneqarsinnaalluarluni" tunngatillugu immikkoortoq 2.4.1-imi nalinginnaasumik oqaaseqaatit innersuunneqarput.

Silanngajaarnerup piunerata saniatigut imaluunniit pissuseq tamatumunnga sanilliunneqarsinnaalluartoq pigineqarpat, napparsimavimmut pinngitsaaliissummik imaluunniit napparsimavimmi pinngitsaaliissummik uninngatitsinissamut piumasqaataapput nakorsarneqartariaqarnerup killinganiinnerup imaluunniit ulorianartorsiortitsisinnaanerup killinganiinnerup naammassineqarnissaat.

Ulorianartorsiortitsisinnaanerup ersiutaa tassaasinnaavoq inuk imminut navianartorsiortittoq, ilisarnaat tassaagajuttarpoq imminut toqunnissaminut imaluunniit imminut ajoquserujussuarnissaminut, imaluunniit allanik navianartorsiortitsinissaminut nalorninartorsiortitsinera. Ulorianartorsiortitsisinnaanerup annertullunilu ilimanaateqarluinnarnissaa piumasqaataavoq.

Napparsimavimmut pinngitsaaliissummik unitsitsinnissaq aamma napparsimavimmi pinngitsaaliissummik uninngatitsinissaq nakorsarneqartariaqarnerup ersuitaa tunngavigalugu taamaallaat pisinnaavoq, napparsimajunnaarnissamut imaluunniit malunnaateqarluartumik aamma pingaarutilimmik pitsanngoriarsinnaanermut neriuuteqarsinnaaneq taamak iliortoqangipat malunnaateqarluartumik ajornerulissammata.

Silanngajaarluni nappaatigisap immini ajorunnaavinnissaa piumasqaatigineqarsinnaanngilaq. Taamaattorli erseqqissumik tunngavissaqarluassaaq nakorsarneqarnerup malunnaateqarluartumik iluaqutaanissaa imaluunniit qanoq issutsip tassanngaannartumik ajornerulersinnaanera pitsaaliorneqarsinnaalluni. Pitsanngorneq malunnaateqarluartoq aammattaaq naammassaaq nakorsarneqartariaqarnerup ersuitaa tunngavigalugu nakorsaasoqarnissaanut piumaqaatit

naammassineqarnerannut. Piviusumik neriunartoqassaaq napparsimasup napparsimavimmi nakorsarneqarnermi kingunerisaanik qanoq innerata annertuumik iluaallannissaa, tassa nakorsarneqarnerup kingunerissallugu napparsimavimmit angerlartinneqarqeq.

Taamatuttaaq nakorsartinnissaaq siunertaralugu napparsimasumik nammineersinnaajunnaarsitsinnginneq akisussaassuseqanngitsuliornertut isigisariaqarnera piumasaqaataavoq. Taamatut piumasaqaateqarnikkut aalajangersagaq taanna naapertorlugu nammineersinnaajunnaarsitsineq nakorsartinnissamik siunertaqartoq erseqqissarneqarpoq. Napparsimasoq imminut navianartorsiortippat imaluunniit allanik navianartorsiortitsippat piumasaqaatip taaneqartup eqqortinneqarnera naammaginatutut isigisariaqarpoq, tassa nakorsarneqarnikkut ulorianassutsip iluaquserneqarnissaa naatsorsuutigineqarsinnaappat, naak tamatumunnga ilutigitillugu tarnikkut napparsimanerup taamaaqataataluunniit ajorunnaarsinneqarnissaa imaluunniit iluaallannissaa ilimanaateqanngikkaluartoq.

Aalajangersakkat siunnersuutigineqartut pinngitsaaliissummik napparsimavimmut unitsitsinermut aamma pinngitsaaliissummik napparsimavimmi uninngatitsinermut tunngasut inunnut inersimasuunngitsunut aammattaaq atuupput – kiffaannngissusiagaasimasunut aamma ukiukitsunut. Taakku saniatigut § 2, imm. 2-mut oqaaseqaatit immikkut ittut innersuunneqarput.

Napparsimavimmut pinngitsaaliissummik unitsitsineq

§ 8-mut

Imm. 1-imut – 2-mut

Siunnersuummi §§ 8-10-mi aalajangersakkat pinngitsaaliissummik napparsimavimmut unitsitsinermi iliuusissanik maleruaqqusaliipput. Dronning Ingridip Napparsimavissuani tarnikkut nappaatilinnut immikkoortorta qarfimmi uninnganeq eqqaassanngikkaanni, pinngitsaaliissummik napparsimavimmut unitsitsinissami napparsimasup sumiiffia apeqqutaanngilaq. Taamaallilluni pinngitsaaliissummik napparsimavimmut unitsitsisoqarsinnaavoq napparsimasup sumiiffianiit najugaanersoq, najukkami napparsimaviunersoq imaluunniit peqqissaaviunersoq apeqqutaatinnagit.

Napparsimasoq Dronning Ingridip Napparsimavissuani tarnikkut nappaatilinnut Immikkoortorta qarfianni uninngappat pinngitsaaliissummik unitsitsineq isummerfigineqassanngilaq kisianni pinngitsaaliissummik uninngatitsilersinnaanissaaq isummerfigineqassalluni.

Qanigisat tassa imaappoq nalinginnaasumik tasaanerusut katissimallugu aapparisaq, inooqatigisaq, angajoqqaat, qitornat inersimasut aamma inuit inoqutigiinnut ilaasut allat, pisussaaffeqarput napparsimaveqarfimmut attaveqassallutik inuk silanngajaarnasorisaq nammineq piuumassutsini naapertorlugu nakorsamit pisariartumik ikiorneqarnissani pillugu saaffiginninngippat, tak. § 8, imm. 1. Qanigisaasut piumasqaammik tamatuminnga eqqortitsinngippata imaluunniit napparsimasoq qanigisaqanngippat politiit peqqinnissaqarfimmut saaffiginninnissaq pisussaaffigaat, tak. § 8, imm. 2. Peqqinnissaqarfimmut tunngatillugu nunap immikkoortuani qitiusumik napparsimavik qaninneq, najukkami peqqissaavik imaluunniit nunaqarfimmi nakorsartitsivik matumani pineqarput. Pineqartumi kingullermi nakorsartitsivimmit suliassari neqarpoq napparsimasup misissorneqarnissaa siunertaralugu, nakorsamut qaninnerpaamiittumut attaveqarnissaq.

Imm. 3-4-mut

Nakorsap aggersarneqartup napparsimasoq misissoreerlugu napparsimavimmut unitsinneqartariaqartoq paasiguniuk, siunnersuummi § 5, imm. 1 naapertorlugu napparsimasup napparsimavimmut unitsinneqarnissaanut akuersitinniassavaa. Napparsimasoq napparsimavimmut unikkumannngippat nalinginnaasumik napparsimasup akerliunera ataqqillugu unitsinneqassanngilaq. Kisianni napparsimavimmut pinngitsaaliissummik unitsinneqarnissamut piumasqaattit, tak. siunnersuummi § 7 naapertorlugu equuppata, napparsimavimmut pinngitsaaliissummik unitsitsisoqassaaq. Taamaattoqarpat nakorsaq uppersaammik suliaqassaaq tassani nalunaarlugit ilaatigut nakorsap napparsimasup nappaatigisaatut ilimagisani, silaqassutsimigut qanoq innera aamma paasissutissat ulorianassutsimut imaluunniit nakorsarneqartariaqarnermut ilisarnaatip naammassineqarnerannit nakorsamut tapersiutaasut nalunaarsorlugit, tak. § 8, imm. 4.

§ 9-mut

Imm. 1-imut

Napparsimavimmut pinngitsaaliissummik unitsitsinerup piviusumik naammassineqarnissaa siunnersuut naapertorlugu politiinut suliassanngortinneqarpoq, tak. § 9, imm. 1. Napparsimavimmut pinngitsaaliissummik unitsitsinerumt pappiaqqat politiinit sularinnittutut atsiorneqasapput. Tamatumunnga atatillugu politiit nakkutigissavaat periaatsip eqqortup ator neqarsimamera, kiisalu nakorsamit uppersaamma paasissutissat napparsimavimmut pinngitsaaliissummik unitsitsinerumt tunngavilersuutaasut pisariaqartut ilanngunneqarsimanersut.

Imm. 2-mut

Napparsimavimmut pinngitsaaliissummik unitsitsineq taamaallaat ingerlanneqarsinnaavoq nakorsap uppersaasiineranik tunngaveqarluni, tamatumani tunngavigineqassaaq napparsimavimmut pinngitsaaliissummik unitsitsinissaq siunertaralugu nakorsap aggersarneqarsimasup misissuisimanera.

Eqqortumik iliuseqarnissamut piunasaqaatit naammassineqarsimassanngillat nakorsaq nammineq siusinnerusukkut allamik pissuteqarluni napparsimasumik misissuisimanini tunngavigalugu uppersaammik suliaqarpat. Tamatumani piunasaqaataavoq napparsimavimmut unitsitsinissaq siunertaralugu piffissami tassani misissuisoqarnissaa, tak. § 9, imm. 2, naggat siulleq.

Nakorsanit assigiinngitsunit marlunnit naliliivigineqarnissaq qulakkeerniarlugu, nakorsaq uppersaammik suliaqartoq (nakorsaq napparsimavimmut unitsitsisoq), Dronning Ingridip Napparsimavissuani tarnikkut nappaatilinnut Immikkoortorta qarfianni atorfeqartuussanngilaq, napparsimavimmut pinngitsaaliissummik unitsitsisarneq tassunga atammat, tak. § 9, imm. 2 naggatip aappaa.

Nakorsaq uppersaammik suliaqartoq napparsimavimmut pinngitsaaliissummik unitsinneqartussamut inummut attuumassuteqarpallaartutut akuliussinnaanngitsutut inissisimassanngilaq. Taamaamat nakorsap soorlu assersuutigalugu nammineq aapparissaminik imaluunniit qitornaminik napparsimavimmut pinngitsaaliissummik unitsitsinissamik suliaqarsinnaanngilaq. Inummut attuumassuteqarpallaartutut akuliussinnaannginnermut tunngatillugu, pisortat ingerlatsineranni suliaqartarnerat pillugu inatsimmi § 3 immikkut innersuunneqarpoq.

Imm. 3-mut

Nakorsap misissuineranik nutaajunngitsumik tunngaveqartumik napparsimavimmut pinngitsaaliissummik unitsitsisoqarnissaa pinngitsoorniarlugu, siunnersuummi § 9 imm. 3-mi aalajangersaasoqarnissaa siunnersuutigineqarpoq. Aalajangersagaq naapertorlugu ulorianarsinnaanermut ersiutaasoq tunngavigalugu napparsimavimmut pinngitsaaliissummik unitsitsinermi pilertortumik ingerlanneqartariaqartumi sivisunerpaamik nal. akunnerisa 24-t misissuinerup kingornatigut unitsitsisoqassaaq. Nakorsarneqartariaqarnermut ersiutaasoq tunngavigalugu napparsimavimmut pinngitsaaliissummik unitsitsisoqassappat ullut arfineq marluk killiliunneqarnissaat siunnersuutigineqarpoq. Killiussat allassimasut taakku eqqortinneqanngippata nakorsamit misissuineq nutaaq ingerlanneqassaaq aamma napparsimavimmut pinngitsaaliissummik unitsitsinissamut pappiaqqat nutaat suliarineqassallutik.

*§ 10-mut**Imm. 1-imut*

Napparsimavimmut pinngitsaaliissummik unitsitsineq ulorianarsinnaanermut ersiutaasumik tunngaveqarpat, napparsimasoq pinasuartumik peqqinnissaqarfimmut unitsinneqassaaq, tak. § 10, imm.1, naggatsiulleq. Dronning Ingridip Napparsimavissuani tarnikkut nappaatilinnut Immikkoortorta qarfiannut taamaallaat pinngitsaaliissummik unitsitsisoqarsinnaavoq, tak. § 1, imm. 1. Kisianni napparsimasut sinerissami peqqinnissaqarfiup immikkoortuisa arlaanniittut, Dronning Ingridip Napparsimavissuani tarnikkut nappaatilinnut Immikkoortorta qarfiannut nuunneqarnissap tungaanut, sumiiffimmi peqqinnissaqarfiup immikkoortuanut pinasuartumik unitsinneqassapput, tak. § 1, imm. 2.

Nakorsarneqartariaqarnerup ersiuteqarnera tunngavigalugu napparsimavimmut pinngitsaaliissummik unitsitsinissami napparsimasoq piaarnerpaamik, ullullu arfineq marluk qaangiutsinagit, unitsinneqassaaq, tak. § 10, imm. 1, naggatipaappaat.

Imm. 2-mut

Aalajangersakkatut siunnersuutigisaaq, siunnersuummi § 10, imm. 2, naapertorlugu Dronning Ingridip Napparsimavissuani tarnikkut nappaatillit Immikkoortorta qarfianni nakorsaaneq, tassaavoq inaarutaasumik ingerlatsinikkut aalajangiisusaaq ilumut napparsimasoq napparsimavimmut pinngitsaaliissummik unitsinneqartutut isigineqassanersoq. Nakorsaaneq tassani pituttorsimaneqanngilaq nakorsap aggersarneqarsimasup naliliineranik ingerlanneqarsimasumik.

Imm. 3-mut

Siunnersuummi § 10, imm. 3-mi Naalakkersuisut ingerlatsinikkut napparsimavimmut pinngitsaaliissummik unitsitsinermi periusissat pillugit sukumiinerusunik maleruaqqusanik aalajangersaasinnaanerat tunngavissinneqarpoq. Taamaalilluni sukumiinerusunik maleruaqqusalior-toqassaaq qanigisat, Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneqarnerup, nakorsap misissuisup, politiit aammattaaq napparsimaviup qanoq iliorlutik suleqatigiinnissaannut tunngatillugu, tassa inuup tarnimigut napparsimasup napparsimavimmut unitsinneqarneranut atatillugu pinngitsaaliissummik unitsitsinermi piumasaqaatit eqqortinneqarnissaannut atatillugu. Suli piumasaqaataavoq sumiiffinni oqartussaasut qanimut suleqatigineqarnissaat taakkununga ilanngullugit politiit, naak politiit peqataanisaanni Danmarkimi Justitsministeriaqarfik aqputigeqqaarneqartussaagaluatoq.

Tamakku saniatigut pinngitsaaliissummik napparsimavimmut unitsitsinermut atatillugu imm. 2.4.1-imi aamma 2.4.2-mi nassuiaatit nalinginnaasut innersuussutigineqarput.

Napparsimavimmi pinngitsaaliissummik uninngatitsineq

§ 11-mut

Imm. 1-imut

Aalajangersakkap siunnersuutigineqartup napparsimavimmi pinngitsaaliissummik uninngatitsinnaaneq malittarisassaliuuppaa. Tassa immappoq napparsimasumik Dronning Ingridip Napparsimavissuani tarnikkut nappaatilinnut Immikkoortortaqarfianni uninngasumik tarnimigut napparsimanerminik nakorsarneqartumik angerlartitsinissamik itigartitsinnaaneq.

Napparsimavimmi pinngitsaaliissummik uninngatitsineq taamaallaat pisinnaavoq § 7-imi atorineqartussatut piumasaqaatit eqqortinneqarpata. Tassa napparsimasoq silanngajaartuussaaq imaluunniit imatut pissuseqassaaq tamanna tamatumunnga sanillunneqarsinnaalluarluni. Tamatuma saniatigut ulorianartuusinnaaneranut ilisarnaateqarneranut imaluunniit nakorsarneqartariaqartuunermut ilisarnaateqarneranut piumasaqaatit eqquutsinneqassapput. Napparsimavimmi pinngitsaaliissummik uninngatitsisoqarnissaanut piumasaqaatit eqquutsinneqarpata, nakorsaq napparsimasumik angerlartitsinissamut naaggaarnissaminut pisussaataavoq, tak. § 11, imm.1.

Pinngitsaaliissummik Dronning Ingridip Napparsimavissuani tarnikkut nappaatilinnut Immikkoortortaqarfianni unitsitaasimasuinnaangitsut aammali nammineq piumassusertik naapertorlugu unitsitaasimasut, piumasaqaatit eqquutsinneqarpata pinngitsaaliissummik uninngatinneqarsinnaapput. Taamaattorli napparsimasoq tarnimigut nakorsartinniarluni peqqinnisaqarfiup immikkoortortaqarfianut allamut nammineq piumassutsini naapertorlugu unitsitaasimasoq Dronning Ingridip Napparsimavissuani tarnikkut nappaatilinnut Immikkoortortaqarfianni pinngitsaaliissummik unitsinneqartariaqalerpat angerlartinnissaa itigartitsissutigineqarsinnaavoq, tamatumunnga pissutaavoq pinngitsaaliissummik unitsitsineq taamaallaat tamaani pisinnaammat.

Imm. 2-mut

Maleruaqqusaq § 11, imm. 2, siullermiittoq napparsimasup siullermeerluni napparsimavimmit angerlarumalluni qinnuteqaateqarneranut atuutiinnarnani, kisianni aammattaaq pisimasuni siusinnerusukkut napparsimasup napparsimavimmit angerlartinneqarnissaminut qinnuteqaateqarnerminut itigartinneqarsimappat tamannalu pillugu nutaamik qinnuteqaateqarpat atuuppoq.

Napparsimavimmut pinngitsaaliissummik uninngatitsisoqartillugu napparsimasumut siunnersuisunnngortitsisoqassaaq imaanngippat siusinnerusukkut napparsimasumut taamaattumik toqqaasoqareersimalluni, soorlu assersuutigalugu napparsimavimmut pinngitsaaliissummik unitsinneqarnissaq sioqqullugu imaluunniit siusinnerusukkut napparsimavimmi pinngitsaaliissummik uninngatinneqarnerminut atatillugu.

§ 11, imm. 2, naggatit aappaat immikkut maleruaqqusamik ilaqarpoq tassani taamaallaat, napparsimasoq napparsimavimmut pinngitsaaliissummik unitsinneqarsimasoq, pinngitsaaliissummik unitsinneqarnerup kingornatigut ulloq unnuarlu siulleq napparsimavimmit angerlartinneqarnissaminut qinnuteqaateqartoq pineqarpoq. Taamatut pisoqartillugu Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup piffissamik nakkutiginninnissamik tunineqarnissaa pisariaqassaaq nalunaaquttap akunnerinik 24-nit sivisunerusumik, tassani isummerfigissamagu napparsimavimmut pinngitsaaliissummik unitsinneqarsimasoq pinngitsaaliissummik uninngatinneqalissanersoq. Siunnersuutigineqarpoq napparsimavimmut pinngitsaaliissummik uninngatitsinerup aallartinneranit nalunaaquttap akunnerinik 48-nik taassuma sivisussuseqarnissaa.

Napparsimavimmit angerlartinneqarnissamut qinnuteqaat napparsimasup siunnersortianit saqqummiunneqarsimappat taava taanna tamatutaaq aalajangiineq pillugu ilisimatinneqassaaq.

Tamakku saniatigut imm. 2.4-imi nammineersinnaajunnaarsitsineq pillugu oqaaseqaatit naliginnaasut innersuussutigineqarput.

Oqqussineq

§ 12-imut

Imm. 1-imut – 2-mut

Napparsimasunit nalunaaruteqarnatik anisimasunit aamma takkutinnngitsoortunik oqqussisarnissamut aalajangersakkamik ilanngussisoqarnissaa siunnersuutigineqarpoq. Taamaattorli oqqussineq takkutinnngitsoornerup paasineqarnerata kingornatigut sapaatit akunnerata ataatsip ingerlanerani taamaallaat pisinnaavoq. Takkutinnngitsoornerup paasineqarnerata kingornatigut sapaatit akunnera ataaseq qaangiutereersimappat, napparsimavimmut unitsitsinermut pappiaqqat nutaat atorlugit aatsaat unitsitsisoqarsinnaavoq. Pineqartoq akuerineqarluni anisimanermi kingornatigut takkutinnngitsoorpat taamatutaaq oqqussinissamut piumasaqaataavoq unnuisinaanerit 3-t anisimanissamut akuersissutigineqarsimanissaat.

Napparsimavimmut pinngitsaaliissummik unitsitaasimasut imaluunniit napparsimavimmi pinngitsaaliissummik uninngatinneqartut piffissap sivikitsuinnaap ingerlanerani oqqunneqarsinnaanerannut periarfissaq, napparsimasup qanoq issusiata allanngorsinnaaneranut attuumassuteqarpoq, tassa pineqartoq napparsimaveqarfiup avataaniinnermini piffissami sivisunerusumi nammineersinnaasimappat. Taamatut pisoqartillugu ataatsimut isiginnilluni siumoortumik ilimasuutigineqarsinnaangilaq nammineersinnaajunnaarsitsinissamut piumaqataatit suli naammassineqarsimanissaat. Taamatuttaaq napparsimasut ilaat piffissami sivisunerusumi napparsimavimmit qimagussimasut kiisalu piaaralutik toqqorsimasimanngitsut, taakkua ilimasuutigersinnaavaat napparsimavimmut oqqunneqannginnissartik.

Aalajangersakkap atuutinneqarneranut pingaartuuvoq napparsimasup pineqartup nammineersinnaajunnaarsinneqarsimasutut inissisimanissaa, tassa pineqartup immikkoortorta qarfiimmit qimagunnermi nalaani. Tamanna imatut paasineqassaaq pineqartoq piffissami tassani napparsimavimmut pinngitsaaliissummik unitsinneqarsimassaaq imaluunniit napparsimavimmi pinngitsaaliissummik uninngatinneqarluni. Taamaattumik aalajangersakkami ilanngunneqanngilat inuit piffissami immikkoortorta qarfiimmit qimagunnermik nalaani namminneq piumassusertik tunngavigalugu napparsimavimmi uninngasut. Tamanna atuuppoq taakkua piffissami pineqartumi napparsimavimmi pinngitsaaliissummik uninngatinneqarsinnaagaluarpataluunniit, naak napparsimavimmit angerlartinneqarnissamut qinnuteqaat saqqummiunneqarsimagaluartoq. Taamaattumik inuit taamatut ittut pinngitsaaliissut atorlugu taamaallaat oqqunneqarsinnaapput napparsimavimmut pinngitsaaliissummik unitsitsinermi periuseq atorneqartartoq qimerloorlugu.

Napparsimasup takkutinnitsoornera sanilliunneqartariaqarpoq ilumut napparsimavimmit angerlartinneqarnissamik kissaateqarnermut. Tamatuma kingunerissavaa Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup napparsimasup tikiunnerani isummerfigisariaqarlugu manna, ilumut napparsimavimmi pinngitsaaliissummik uninngatitsinermut piumasaqaataasut (suli) atuutsinneqarsinnaanersut, tak. siunnersuummi § 11.

Nakorsaanerup napparsimasooq napparsimavimmi pinngitsaaliissummik uninngatinneqarnissaa nalilerpagu taava napparsimasup aalajangiineq Tarnimikkut Nappaatillit Maalaarutaannik Aalajangiisartunut suliassanngortissinnaavaa. Taanna napparsimasup pinngitsaaliissummik oqqunneqarnissaanut aalajangiinermuttaaq atuuppoq tak. siunnersuummi § 47, imm. 1, nr. 2 aamma 3. Pisut apeqqutaatillugit Tarnimikkut Nappaatillit Maalaarutaannik Aalajangiisartut

aalajangigaat, Kalaallit Nunaanni pinerluttulerinermi inatsimmi kapitali 28, tak. § 49, imm. 1, naapertorlugu eqqartuussivikkut suliassanngortinneqarsinnaapput.

§ 12, imm. 2-mi piginnaatitsissummik ilanngussisoqarnissaa siunnersuutigineqarpoq tamanna naapertorlugu oqqussinermut atatillugu periutsinut ingerlatsinermi maleruaqqusat aalajangersarneqassammata.

Aalajangersakkami siunertaavoq sammisamut tamatumunnga tunngatillugu maleruaqqusanik ilassutaasunik aalajangersaasoqarnissaa, tassa piviusumik tamatuma pisariaqartinneqarnera takuneqarsinnaappat. Suli piumasagaataavoq sumiiffinni oqartussaasut qanimut suleqatigineqarnissaat taakkununnga ilanngullugit politiit, naak politiit peqataanissaanni Danmarkimi Justitsministeriaqarfik aqqutigeqqaarneqartussaagaluartoq.

Nammineersinnaajunnaarsitaanerup atorunnaarsinneqarnera

§ 13-imut

Siunnersuummi § 13, imm.1 naapertorlugu nammineersinnaajunnaarsitsineq erniinnartumik atorunnaarsinneqassaaq, nammineersinnaajunnaarsitsinissamut piumasagaatit § 7 naapertorlugu eqqortinneqarnerat atorunnaarpat. Taamatut pisoqassaaq napparsimasup aalajangiineq pi-sussanngortissimappagu § 11, imm. 2, naapertorlugu angerlartinneqarnissaminut qinnuteqaammik saqqummiussinermigut, imaluunniit qinnuteqaat taamaattoq saqqummiunneqarsimanngikkaluarpat, tak. § 34, imm. 1, tamakku kingunerisaanik nakorsaanerup nammineq aal-larnikkaminik ingerlaavartumik apeqqut nalilersussavaa.

Erseqqissaatigineqarpoq nakorsaaneq tassaasoq pisinnaatinneqartoq nammineersinnaajunnaarsitsinermik atorunnaarsitsinissamut aalajangiinissamut. Taamaattorli tarnimikkut napparsimasut immikkoortortaqarfiani nakorsaqa kinaluunniit nakorsaanerup peqannginnerani tamatumunnga aalajangiinissaminut pisinnaatitaavoq, tak. § 6, imm. 1. Tamatumani qulakkeerneqarpoq napparsimasup pisariaqanngitsumik nammineersinnaajunnaarsinneqarsimanissaa. Taamatut pisoqartillugu nakorsaaneq isummerpat napparsimasoq napparsimavimmit angerlartinneqartussaasimanngitsoq, taava napparsimavimmut pinngitsaaliissummik unitsitsinissamut periuseq aallaqqaataaniit allartinneqartariaqarpoq, imaappat nakorsaaneq isumaqarluni § 7-imi nammineersinnaajunnaarsitsinissamut piumasagaatit eqqortinneqartut, kiisalu napparsimavimmut pinngitsaaliissummik unitsitsinissaq pisariaqarluni.

Nammineersinnaajunnaarsitsinermik atorunnaarsitsinerup kingunerisariaqanngilaa angerlartit-sineq, tassami napparsimasup toqqarsinnaammagu nammineq piumassutsini tunngavigalugu napparsimavimmi uninngatinneqaannarnissani.

Kapitali 4-mut

Pinngitsaaliissummik nakorsaasoqartarnera

§ 14-imut

Imm. 1-imut

Nakorsatut suliatigut tarnimikkut napparsimasut nakorsarneqarneqarneranni nakorsaq napparsimasup nakorsarneqarneranik isumaginnittoq aammattaaq pisussaaffeqarpoq napparsimasup akuersissuteqarnissaanik pissarsinissaminut, tak. siunnersuummi § 3, imm. 1 aamma tassunga oqaaseqaatit. Tamanna iluatsinngippat nakorsaasoqarnissaanut pilersaaruteqarneq nalinginnaasumik unitsinneqartariaqarpoq, imaanngippat pineqartoq napparsimavimmut unitsinneqarsimasoq kiisalu napparsimavimmi pinngitsaaliissummik uninngatinneqarnissamut piumasaqaatit eqqortinneqarlutik. Taamaattoqartillugu siunnersuummi § 14, imm. 1 naapertorlugu, taava tarnimigut napparsimasoq nakorsarneqarnera pinngitsaaliissummik ingerlanneqarnissaa periarfissaqassaaq.

Imm. 2-3-mut

Siunnersuummi § 14-imi imm. 2-mi allassimavoq pinngitsaaliissummik nakorsarneqarnissaq pillugu aalajangiineq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanermit aalajangiiffiqineqassasoq.

Siunnersuummi § 14, imm. 3-mi, takuneqarsinnaavoq pinngitsaaliissummik nakorsarneqarneq taamaallaat Dronning Ingridip Napparsimavissuani ingerlanneqarsinnaasoq. Pinngitsaaliissummik nakorsarneqarneq tassaavoq pinngitsaaliissummik nakorsaatitortitsineqarneq, innaallagialaq atorlugu sianiutinik sunniineq aamma pinngitsaaliissummik nerisinneqarneq. Piumasaqaat tassa aammattaaq pinngitsaaliissummik nakorsaatitortitsineq taamaallaat Dronning Ingridip Napparsimavissuani ingerlanneqarsinnaaneranut tunngasoq, tassunga tunngavigineqartutut isigineqassaaq napparsimasunik tarnimikkut napparsimasunik nakorsaatitortitsineq, tamatumunnga ilanngullugu pinngitsaaliissummik atuisinnaaneq tamanna tassaammat napparsimasup pitsanngoriarnissaanut aamma iluaallannissaanut isumalluarnissamut iliuuserineqartoq pingaaruteqarluinnartoq. Taamaalilluni nakorsarneqarnissap pilersaaruserineqarnera aamma ingerlanneqarnera tarnimikkut napparsimasunut immikkut immikkoortorta qarfimmi ingerlanneqassapput.

Napparsimavimmut pinngitsaaliissummik unitsitsinissaq najukkami napparsimavimmi imaluunniit qitiusumik napparsimavimmi aallartinneqarsimatillugu, napparsimasoq eqqissisaammik nakorsaatitortissallugu pisariaqalersimappat, tamanna pissaaq § 25-mi piumasaaqaataasut isiginiarlugit.

Imm. 4-mut

Siunnersuummi § 14 imm. 4-mi allassimavoq pinngitsaaliissummik nakorsaatitortitsinermi nakorsaatit misilittarneqareersut atorineqassasut nalinginnaasumik annertussusilerlugit aamma allanik saniatigut peruluutaasunik annikinnerpaamik sunniuteqarsinnaasut. Maleruaqqusap qulakkiissavaa napparsimasup sapinngisamik annikinnerpaamik nakorsaaammit atorineqartumit ajoquserneqarnissaa.

Siunnersuummi erseqqissaatigineqarpoq saniatigut sunniutit allat amerlassusiat pingaartinneqanngitsoq, kisianni pinartunik saniatigut allanik sunniutaasa amerlassusii pineqarlutik. Pinartunik saniatigut allanik sunniutai pillugit ilanngussinermi napparsimasup katsorsartinnermi nalaani pisariaqanngitsunik pinartunut ajoqutaasinnaasunut illersorneqarnissaa ujartorneqarpoq. § 14-imut ilanngussap taamaalilluni nakorsaatit napparsimasunut peruluutaasumik sapinngisamik annikinnerpaamik ajoqusiisinnasut atorineqarnissaat qulakkiissavaa. Nakorsaatinut misilittarneqarsimasunut tunngatillugu nakorsaatissat ilisimaneqarluareersut pineqarput, uani ilanngunneqareersut Sundhedsstyrelsens Specialitetsregister-imi, tak. Lægeforeningens Medicinfortegnelse og Lægemiddelkataloget. Nalinginnaasumik annertussusiliinermi pineqarpoq nakorsaatitortitsinermi malittarisassat lægemiddelfortegnelsen-imi (nakorsaatit allattorsimaffianni) allassimasut kiisalu pitsaasumik nakorsatut sulinertut ittoq malinneqassapput. Immikkut annertunerusumik annertussusilinnik nakorsaatitortitsineq taamaalilluni pissusissamisuunngilaq. Napparsimasunik pinngitsaaliissummik nakorsaatitortitsinermi nakorsaatit sivisuumik sunniuteqartartut aallarniutigalugit nakorsaatit atorineqartariaqanngillat nappaatip suussusia tamakkiisumik paasineqanngippat, aamma napparsimasut katsorsartinnertik qanoq qisuariarfissaneraat ilisimaneqanngippat. Kisianni nakorsaatit sivisuumik sunniuteqartartut nappaataasa suussusiannik paasisaqarluarsimanikkut katsorsaaneermut akuerineqarsinnaapput napparsimasut kingumut napparsimaqqilersimanerat pissutigalugu pinngitsaaliissummik unitsinneqarsimappata.

Pinngitsaaliissummik nakorsaatitortitsinermi nakorsaq tamatigut najuutissaaq. Nakorsaatitortitsineq napparsimasumut isertuullugu ingerlanneqassanngilaq soorlu nerisaanut imaluunniit imigaanut nakorsaatinik akulerussinikkut, imaluunniit nakorsaatinut allanut napparsimasup sungiussimasaanut ilanngussinikkut.

Imm. 5-imut

Pinngitsaaliissummik nakorsaatitortitsinerup saniatigut pinngitsaaliissummik nakorsartinnerit allat ingerlanneqarnissaannut pisariaqartitsineq qaqutikkut pisarpoq, kisianni naleqquttuulluni soorlu assersuutigalugu innaallagialu atorlugu sianiutinik sunniinikkut aamma pinngitsaaliissummik nerisitsinikkut. Pinngitsaaliissummik nakorsartinnissaq Dronning Ingridip Napparsimavissuani tarnikkut nappaatilinnut Immikkoortorta qarfianni ingerlanneqarsinnaavoq imaluunniit napparsimavissuarmi immikkoortoqarfimmi allami immikkut ilisimasaqarfiusumi tuluartumilu, tassa nakorsartinnermik pitsaanerpaamik ingerlatsiviusinnaasumi.

Siunnersuummi § 14, imm. 5 tunngavigalugu innaallagialu atorlugu sianiutinik sunniinermi allamik pinngitsaaliissummik katsorsartinnermut atatillugu immikkut piumasaqaatit arlaqartut ilanngunneqarput. Tamatumani siunertarineqanngilaq innaallagialu atorlugu sianiutinik sunniineq pinngitsaaliissummik nakorsaasoqarneranik allamik taamatut nakorsaasoqarnera annertunerusutut paasinarsisissallugu. Akerlianik innaallagialu atorlugu sianiutinik sunniineq pissutsini aalajangersimasuni tassaasinnaavoq qajassuussilluni nakorsaasoqarnerani atorneqarsinnaasoq. Taamaattorli innaallagialu atorlugu sianiutinik sunniineq piviusumik atorneqartarpoq inuunermik navianartorsiortoqarnerani. Aalajangersakkami oqaasiliernerit taamaalillutik siunertaraat inatsisitigut atuuttuusunik erseqqissaateqarnissaq. Inatsisitigut isumannaatsuunissamut tunngasutigut mianereqquneqarput inatsimmi piumasaqaataasut allassimasuunissaat.

Innaallagialu atorlugu sianiutinik sunniinerup atorneqarsinnaaneranut pisumut assersuutigineqarsinnaavoq qanoq issutsimi tassanngaannartumik paatsiveerunnertut taaneqarsinnaasoq. Taamatut paatsiveerunneq ilaatigut tarnikkut nappaatip allatut pissuseqalerneratigut pilersinnaavoq. Taamatut tassanngaannartumik paatsiveerunneq takorruinernik, siniuinnermik aamma eqqissiviilluni aalasalernermik malunnaateqartitsisinnaasarpoq. Piffissap sivikitsup ingerlanerani kissarnejarujujussuortoqalersinnaavoq, imerpalasumik timi amigaateqalerluni aamma sanngiillinermik, napparsimasoq pilertortorujussuarmik toqusinnaalluni nakorsarneqarnera aallartinneqanngippat. Tassanngaannartumik paatsiveerunneq inuunermik ulorianartorsiortitsilernerumut aallarpat pinngitsaaliissummik innaallagialu atorlugu sianiutinik sunniinermik atuisoqarnissaa pisariaqartutut paasinarsisinnaavoq.

Annertuumik isummakkut nanertisimanerit ataasiakkaat inuunermik ulorianartorsiortitsilerinnaasarput. Napparsimasoq sakkortooujussuarmik imaluunniit tassanngaannartumik immi- nut toqunnissamut ulorianartorsiorsinnaavoq imaluunniit ilaguutiinnaleqqalluni, inuunermut pingaaruteqartut nalorninartorsiortinneqarlutik, soorlu assersuutigalugu nerisaqannginneq

aamma imertanninneq pissutigalugit. Taamatut pisoqartillugu innaallagialu atorlugu sianiutini sunniineq pinngitsaaliissummik ingerlanneqarnissaa eqqarsaatigineqarsinnaavoq.

Napparsimasut inatsisitigut inissisimanagerat pillugu Inatsisartut peqqussutaat nr. 6, 31. maj 2001-imeersoq tunngavigalugu napparsimasoq neriumajunnaarsinnaavoq, aalersorneqarnissani itigartitsissutigalugu, inuunerup sivitsorneqarsinnaaneranut nakorsartinnissaq itigartitsissutigalugu il.il. piumasaqaatit aalajangersimasut tunngavigalugit, tak. Inatsisartut Peqqussutaat §§ 14 – 17. Aalajangersakkat taakku siunnersuummi § 7-imi napparsimasunut ilaatinneqanngitsunut suli atorneqaannassapput.

Napparsimasup soorlu assersuutigalugu neriumajunnaarnissani kissaatigippagu tamatumungalu ilutigitillugu silanngajaartuulluni imaluunniit pissusia tamatumunnga assersuunneqarsinnaalluarluni, taava § 14, imm.1-imi aalajangersagaq naapertorlugu pinngitsaaliissummik iliuseqarfigineqarsinnaavoq soorlu assersuutigalugu pinngitsaaliissummik nerisinneratigut. Tamatumunnga pissutaavoq pineqartoq silanngajaarnini pissutigalugu eqqarsaatigilluakkamini iliuseqarnerata immaqa tunngaveqannginnera, kisianni akkerlianik taamatut iliornera silanngajaarneranit tunngaveqarnerusinnaalluni.

Imm. 6-imut

Siunnersuummi § 14 imm. 6 naapertorlugu napparsimasoq pinngitsaaliissummik nakorsarneqannginnerani naleqquttumik eqqarsarfissinneqassaaq. Eqqarsarfissinneqarnerup sivilissusia nakorsamit erseqqissummik nalilerneqassaaq pinngitsaaliissummik nakorsartinnissap qanoq tassangaannartigisumik pisariaqartigineranik naliliinermik tunngaveqartumik.

Imm. 7-imut

Siunnersuummi § 14-imi imm. 7-imi aalajangersagaq manna naapertorlugu pinngitsaaliissummik nakorsarneqarnissaq pillugu Naalakkersuisut maleruaqqusaliornissaannut pisinnaatinneqarput. Taamaalilluni pinngitsaaliissummik nakorsaatitortitsinissamut, pinngitsaaliilluni nerisitsinissamut aamma innaallagialu atorlugu sianiutini sunniinissamut sukumiinerusunik maleruaqqusaliortoqarsinnaavoq.

§ 15-imut

Imm. 1-imut - 2-mut

Siunnersuummi § 14-imi tarnimikkut napparsimasut tarnimikkut nappaatigisaannik pinngitsaaliissummik nakorsaasoqarnissaa maleruaqqusaliorneqarpoq, § 15-imi pisut aalajangersimasut tunngavigalugit tarnimikkut napparsimasut timimikkut anniaatigisinnaasaannik pinngitsaaliissummik nakorsaasinnaaneq periarfissinneqarpoq.

Taama timikkut anniaatigisanik pinngitsaaliissummik nakorsartinneq taamaallaat pisinnaavoq, siullertut napparsimavimmi pinngitsaaliissummik uninngatitsinissamut piumasagaatit eqquutsinneqarsimappata. Taamaattumik napparsimasoq silanngajaassaaq imaluunniit imatut pissuseqassaaq tamanna silanngajaarnermut sanilliunneqarsinnaalluarluni, tamatutaaq eqquutsinneqassapput ulorianartuusinnaanerup ilisarnaatai imaluunniit nakorsartariaqarnerup ilisarnaatai.

Aappaattut timikkut anniaatigisaaq ima peruluutaatigissaaq tamanna napparsimasup inuuneranut navianaateqarluni imaluunniit peqqissusianut annertuumik ajoqusiisnaalluni.

Kiisalu timikkut nakorsartittunut immikkoortorta qarfianni nakorsaanerup aamma Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup, akunnerminni timikkut anniaatip pinngitsaaliissummik nakorsarneqarnissaanut piumasagaataasut eqquutsinneqarneri isumaqatigiissutigissavaat, tak. siunnersuummi § 15 imm. 2.

Pisariaqarpat nakorsartinnissaaq siunertaralugu napparsimasoq timimikkut nakorsartinnermut immikkoortorta qarfiimmu nuunneqarsinnaavoq.

Napparsimasut timimikkut aanniaatilinnut immikkoortorta qarfianni uninngasut, Dronning Ingridip Napparsimavissuani tarnikkut nappaatilinnut Immikkoortorta qarfiannit, tassunga nuutsinneqarsimanatik § 15 imm. 2-mi, naggatit aappaanni aalajangersagaq naapertorlugu tunngaviusumik aalajangersakkamut ilaatinneqanngillat, naak napparsimavimmi pinngitsaaliissummik uninngatinneqarnissamut aalajangersakkat eqquutsinneqaraluartut. Taamaalilluni aalajangersagaq taanna naapertorlugu, pinngitsaaliissummik nakorsaasinnaanermi §§ 8-10 naapertorlugit tamanna sioqqullugu napparsimavimmut pinngitsaaliissummik unitsitaasimannissaaq piumasagaataavoq.

Dronning Ingridip Napparsimavissuani tarnikkut nappaatilinnut Immikkoortorta qarfianni nammineq piumasusertik tunngavigalugu uninngasut pineqartillugit § 7-imi piumasagaatit

eqquutsinneqarpata, taakkuninnga napparsimavimmut pinngitsaaliissummik unitsitseqqaarnani pinngitsaaliissummik nakorsaasoqarsinnaavoq aamma Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup aalajangerpagu, napparsimavimmut pinngitsaaliissummik unitsitsinissamut piumasaaqatit eqquutsinneqartut, tak. § 10, imm. 2. Tarnimigut napparsimasoq sinerissami napparsimavimmi imaluunniit peqqissaviit arlaanni nammineq piumasutsini tunngavigalugu uninngappat, pinngitsaaliissummik kat-sorsaanissami Dronning Ingridip Napparsimavissuani tarnikkut nappaatilinnut Immikkoortorta qarfianni pinngitsaaliissummik unitsitseqqaarnissaq piumasaaqataavoq, tak. § 15, imm. 1, naggatit aappaat.

Napparsimasut inatsisitigut inissisimanerat pillugu Inatsisartut peqqussutaat nr. 6, 31. maj 2001-imeersoq naapertorlugu piumasaaqatit aalajangersimasut tunngavigalugit, napparsimasoq neriumajunnaarsinnaavoq, aalersorneqarnissaminut itigartitsinnaavoq, inuuneq sivitsorsarniarlugu nakorsarneqarnissaminut itigartitsinnaavoq il.il. tak. Inatsisartut Peqqussutaanni §§ 14-17. Aalajangersakkat taakku sulii atuutiinnassapput napparsimasunut siunnersuummi § 7-imut ilaatinneqanngitsunut.

Siunnersuummi § 15, imm. 3-mi Naalakkersuisut piginnaatinneqarpud aalajangersagaq taman-na naapertorlugu pinngitsaaliissummik nakorsaanissamut sukumiinerusunik maleruaqqusaliornissaminut. Taamaaliornikkut ingerlatsivimmit Dronning Ingridip Napparsimavissuani tarnikkut nappaatilinnut Immikkoortorta qarfik aamma timikkut nappaateqarnermut immikkoortorta qarfimmi nakorsaq pineqartoq suleqatigalugit maleruaqqusat sukumiinerusut aalajangersarneqarsinnaappud, tamatumunnga ilanngullugit pinngitsaaliissummik nakorsartinnerup ingerlanneqarnissanut sukumiinerusut.

Tamatuma saniatigut immikkoortoq 2.5-imi oqaaseqaatit nalinginnaasut pinngitsaaliissummik nakorsaasoqartarneranut tunngasut innersuussutigineqarpud.

Kapitali 5-imut

Napparsimavimmit angerlartitsinerup kingornatigut malinnaaffiginnineq

§§ 16-17-imut

Napparsimavimmit angerlartitsinneqareernermi isumaqatigiissusiunneqartuni aamma ataqatigiissaanissamut pilersaarutini angorusutat tassaapput napparsimasut peruluutaasumik tarnimikkut napparsimasut, tassa malunnaateqarluartumik peqqikkunnaarnermik sunniuteqarfigineqartussat, nakorsarneqarnermikkut imaluunniit inunnik isumaginninnikkut tapersersorneqanngikkunik. Napparsimasut pineqartut soorlu assersuutigalugit tassaasinnaapput tarnikkut nappaammik skitzofreniimik nappaateqarnerup saniatigut atonerluisuusut imaluunniit inuunarnermikkut annertuumik ajornartorsiuteqartut.

Pitsaasumik ingerlatsinissamut ileqqup malittaanic napparsimavimmit angerlartinneqarnermi isumaqatigiissummi imaluunniit ataqatigiissaanermut pilersaarummi ilaatinneqartariaqarput napparsimasup maannakkorpiaq aamma siunissami katsorsartinnissamut aamma inunnik isumaginninnikkut neqeroorutaasussatut pisariaqartitai. Taamatuttaaq tassani ilanngunneqartariaqarput katsorsaanissamut neqeroorutissat tulluurtut aamma qaammatisiutit ulluat aamma nalunaaqutaq oqartussaasumik pineqartumik il.il. siullerpaamik ataatsimeeqateqarnissamut tungnatillugu. Ilanngunneqartariaqarportaaq kiap malittarinnittussatut akisussaasuunera aamma kina isumaqatigiissut eqquutsinneqanngippat iliuseqassanersoq. Naggataatigut isumaqatigiissutip qaqugu atorunnaassanersoq kiisalu qaqugu naliliivigineqarnissaa ilanngunneqartariaqarput.

Siunnersuummi § 16, imm. 2 aamma § 17, imm. 2-mi Naalakkersuisut piginnaatinneqarput napparsimavimmit angerlartitsinneqareernermi isumaqatigiissutigineqartut aamma ataqatigiissaanissamut pilersaarutit Nunatta Nakorsaaneqarfiani nalunaarsorneqarnissaannut maleruaqqusanik aalajangersaanissamut. Tamatumunnga atatillugu Naalakkersuisut maleruaqqusanit aalajangersaasinnaapput ataqatigiissaanissamut pilersaarutini aamma isumaqatigiissutigineqartuni napparsimasup kinaassusianik ilaqartinneqassanersut.

Tamatuma saniatigut immikkoortoq 2.6-imi oqaaseqaatit nalinginnaasut napparsimavimmit angerlartinneqareernermi malittarineqarneq tunngasut innersuussutigineqarput.

§ 18-imut

Napparsimavimmit angerlartinneqarnermut atatillugu isumaqatigiissusiortoqarsimappat imaluunniit ataqatigiissaanermut pilersaarusiortoqarsimappat, § 18-imi siunnersuutigineqarpoq tarnimikkut napparsimasunut immikkoortorta qarfiup pisortaqarfiit allat, peqqinnissamik sullissisut assigisaasalu akunnerminni paasissutissanik, napparsimasup inuttut nammineq inuuneranut tunngasunik, paarlaasseqatigiittarsinnaanerit.

Napparsimasoq sapinngisaq tamaat ikiorsinnaassagaanni tapersorsinnaassagaannilu, paa-sissutissanik inummut namminermt tunngasunik paarlaasseqatigiittarnissaq pisariaqarpoq. Inummut namminermt tunngalluinnartut ilaatigut tassaapput nappaammut tunngatillugu paa-sissutissat, peqqissuseq, inuup peqqinnissaqarfimmu attaveqarnera, ilaqtariinnermt tunngasut, isertitaqarnermt tunngasut il.il.

§ 19-imut

Imm. 1-imut

Napparsimavimmiit angerlartinneqareernermt pinngitsaaliissummik inuit malinnaaffigineqartussat tassaapput napparsimasut sanngiinnerpaat. Dronning Ingridip Napparsimavissuani tarnikkut nappaatilinnut Immikkoortortaqarfianni naammaginakannersumik nakorsarneqarsimallutik angerlartitaasut, tamatigut nakorsaatitornerminnik unitsitsisartut tamatumalu nassatariisaanik nappaqqillutik aamma pisariaqarpat napparsimavimmu pinngitsaaliissummik unitsinneqarqittariallit. Napparsimasut sanngiinnerpaat ikittuinnaat matumani pineqarput § 19-ip ilanngunneqarnera sioqqullugu anguneqarsinnaasimangitsut.

Taamaaliornikkut inatsisitigut illersugaanikkut kingunerluutilimmu saqisitsinnginnissaq qulakkeerniarlugu periarfissallu pisariaqanngitsumik atorneqarqunagit, angerlartitaareernermt inunnik pinngitsaaliissummik malinnaaffigisarialinnik immikkoortitsisussanik, maleruaqqusanic piumasaaqatitalinnik 4-nik ilanngussisoqarnissaa siunnersuutigineqarpoq. Piumasaaqatit tamarnik eqquutsinneqarpata aatsaat napparsimavimmiit angerlartitaareernermt pinngitsaaliissummik malinnaaffiginnittoqarsinnaavoq.

Tamatumani siullermik *tunngaveqartumik annilaangassutigineqassaaq aamma ilimanarluinnassaaq* napparsimasup napparsimavimmit angerlartinneqareernermt kingornatigut nakorsarneqarnini, namminerminut napparsimasutut peqqissutsiminut pisariaqartuusup taamaatitsinissaa.

Taama piumasaaqateqarneq napparsimavimmi uninnganermu pineqartumut tunngassuteqassaaq. Tassa imaappoq napparsimavimmi uninnganerup nalaani pissutsit suut tunngavigalugit, napparsimasup napparsimavimmit angerlareernermt kingornatigut pisarialimmik nakorsartinerninik taamaatitsinissaata ilimanaateqarluinnarnera nalunaarneqassaaq. Napparsimasut pineqartut napparsimavimmit angerlareernermt kingornatigut, nappaat utersaaqqunagu nakorsaanerup pisariaqartutut naliligaanik, nakorsartinernmik malittarinninniarnatik, namminneq

oqaatiginnittuusinnaapput. Imaluunniit allamik tunngaveqarluni soorlu assersuutigalugu napparsimasup uninnganermi nalaani nakorsartinnini pillugu suleqatiginnissamut piumasusia tunngavigalugu, nakorsartinneq pillugu atasinnaasumik suleqatigiinnissamut isumaqatigiissuteqanngippat, taamaammallu napparsimasup angerlareermermi kingorna nakorsartinnermik taamaatitsinissaata annilaanganaateqarnera ilimanarluinnarneraluunniit, nakorsaanermit naliivigineqarsinnaavoq.

Taamaalillutik nappaateqarnermik paasinninneq annikitsoq aamma nakorsartinnissamut kajumissuseqarneq annikitsoq, napparsimasup napparsimavimmit angerlareermermi kingornatigut nakorsartinnerup taamaatinneqarsinnaaneranut annilaangassutissaqarnermut qulakkeerinneqataasinnaapput.

Tamatuma saniatigut napparsimasut sanngiinnerpaat napparsimavimmit angerlareermermik kingornatigut pinngitsaaliissummik malinnaaffigineqarnissamut, maleruaqqusat malillugit pineqarnissaat qulakkeerniarlugu, pineqartut immikkoortissinnaanissaannut aalajangiinnermi tunngaviusussat piviusut eqqortinneqassapput.

Napparsimasup ukiut kingulliit pingasut ingerlanerini ikinnerpaamik ataasiarluni napparsimavimmut pinngitsaaliissummik unitsitaasimanissaa imaluunniit napparsimavimmi pinngitsaaliissummik uninngatinneqarsimanissaa siullermik piumasqaataapput, tak. § 19 imm. 1, nr. 1.

Tamatuma saniatigut ukiut pingasut kingulliit taakku ingerlanerini ikinnerpaamik ataasiarluni napparsimavimmit angerlartinneqarnermut atatillugu isumaqatigiissummik imaluunniit ataqatigiissummik pilersaarummik nakorsartinnissamik malittarinnissimannginneq piumasqaataavoq, tak. § 19, imm. 1 nr. 2. Taamaalilluni napparsimavimmit angerlartitaanermut atatillugu isumaqatigiissusiorsinnaaneq imaluunniit ataqatigiissummik pilersarusiorsinnaaneq misilinneqarsimassaaq.

Napparsimavimmit angerlartinneqarnermi isumaqatigiissutit imaluunniit ataqatigiissakkamik pilersarusiat ilaat nakorsarneqarnissamut tunngasut taakkua taamaallaat napparsimasup malinnissaat pinngitsoorsimasinnaavaa.

Taamaattumik napparsimasup angerlartinneqarnermi isumaqatigiissutip imaluunniit ataqatigiissakkamik pilersarusiap inunnut isumaginninnermut tunngasortaanik malinnissimanera tamatumunnga atatillugu sunniuteqanngilaq.

Inuit pineqartut kisiisa immikkoortissinnaajumallugit, napparsimasup napparsimavimmi uningannermi matumani pinngitsaaliisummik unitsitaasimanissaa imaluunniit pinngitsaaliisummik uninngatinneqarsimanagera pinngitsoornani piumasagaataavoq, tak. § 19 imm. 1, nr. 3. Immikkoortitsineq tamanna qulakkeerinneqataavoq pinngitsaaliisummik malinnaaffiginninnerup taamaallaat napparsimasunut, napparsimavimmut uninnermi tassani pineqartumut atatillugu silangajaarsimasunut imaluunniit tamatumunnga sanilliunneqarsinnaalluartumik pissuseqarsimasunut tunngavoq, tassanilu pineqartumit nakorsaasoqarnissaa siunertaralugu nammineersinnaajunnaarsitsinnginneq imminut illersorneqarsinnaanani.

Imm. 2-mut

Siunnersuummi § 19, imm. 2-mi takuneqarsinnaavoq napparsimavimmit angerlartinneqareernermi pinngitsaaliisummik malinnaaffiginninnissamut nakorsaanerup aalajangiinera taamaallaat napparsimaveqarfiup immikkoortuisa arlaannut nakorsaatitortartarnissamik imaqarsinnaasoq. Napparsimasut napparsimavimmit angerlartinneqareernerminni pinngitsaaliisummik malinnaaffigineqartussat, namminneq ineqaraluarpata isumaginnittoqarfiulluunniit ataani inisinneqarsimagaluarpata, angerlarsimaffigisaminni nakorsartissinnaanngillat. Nakorsaatitortitanerup peqqinnissaqarfiup immikkoortuani pinissaanut piumasagaateqarneq, napparsimasut sineriak tamakkerlugu peqqinnissaqarfiup immikkoortuani nakorsagassanngorlugit angerlartitaasernerinik tunngaveqarpoq.

Napparsimasumik nakorsaatitortitsineq matumani kisimi pineqarpoq. Taamaalillutik nakorsaariaatsit soorlu pinngitsaaliisummik nerisinneqarneq aamma innaallagiaq atorlugu sianiutini sunniisarnerit napparsimavimmit angerlartinneqareernermi pinngitsaaliisummik malinnaaffiginnermut atatillugu ingerlanneqarsinnaanngillat. Soorunami naatsorsuutigineqarpoq napparsimasumut, napparsimasutulli allatut nakorsaatitortinneqarluni nakorsarneqarnermi saniatigut, katsorsaanissamut allanik neqeroorfigineqarnissaat tamanna naleqquppat, tamatumunnga ilanngullugit oqaloqatigiittarluni katsorsaaneq aamma allatigut katsorsaanerit.

Imm. 3-mut

Napparsimasoq takkutinnngippat, tak. § 19, imm. 2, nakorsaaneq maleruaqqusaq naapertorlugu, napparsimasup pinngitsaaliisummik najukkami peqqinnissaqarfiup immikkoortuani nakorsaatitortinneqarnissaa siunertaralugu politiinit aaneqarnissaa pillugu aalajangiippat pinngitsaaliisummik nakorsaatitortitsisoqarsinnaavoq. Taamaalilluni nakorsaatitortitsinissamut pissaanermik atuinissaq piviusunngorsinnaavoq. Tamanna taamaallaat peqqinnissaqarfimmi pisinnaavoq, taamaaliornikkut tarnikkut nappaatit pillugit immikkut ilisimasalinnik sulisulimmi aammattaaq pinngitsaaliisummik nakorsaatitortitsinermi periarfissagissaarfiunerusumi tamatuma ingerlanneqarnissaa qulakkeerneqassaaq.

Napparsimasoq politiinit ikiorteqarluni aaneqassappat sapinngisamik qajassuarnerpaamik aamma malunnaarsaartumik ingerlanneqassaaq, taamaaliornikkut pisariaqanngitsumik narrunarsaaneq imaluunniit akornusersuineq tujormissutaasoq atorneqassanngimmata.

Taamatut pisoqarnera pinngitsaaliisummik napparsimavimmut unitsitsinertut ingerlanneqassaaq. Napparsimasumik napparsimavimmi pinngitsaaliisummik uninngatitsineq tamanna sivikitsuinnaassaaq (ulloq ataaseq). Naatsorsuutigineqarpoq pinngitsaaliisummik nakorsaati-tortitsiartorneq tamanna taamaallaat atorneqassasoq napparsimasup tarnimikkut napparsimasunut immikkoortorta-qarfimmit angerlartinneqarnermi kingornatigut suli nakorsaatitortinneqarnissaminut pisariaqartitsineratigut, aamma tarnimikkut napparsimasunut immikkoortorta-qarfimmut unitsitsinngikkaluarluni nakorsaatitortitsinissamut periarfissat allat tamarmik pisinnaajunnaarsimappata.

Napparsimasoq § 19, imm. 2 naapertorlugu nammineq piumassutsini tunngavigalugu takkunnermini imaluunniit aalajangersagaq naapertorlugu politiit ikiortigalugit takkunnermini ima napparsimatigippat, napparsimavimmut uninnissaq imaluunniit pinngitsaaliisummik unitsin-neqarnissaa pisariaqarluni, tamanna pinngitsaaliisummik unitsitsinermi maleruaqqusat naapertorlugit ingerlanneqassaaq. Taamaalillutik napparsimavimmit angerlartitaareermermi pinngitsaaliisummik malittarinninnermut maleruaqqusat, napparsimavimmut pinngitsaaliisummik unitsitsinermut maleruaqqusanit taarserneqanngillat.

Imm. 4-mut

Aalajangersagaq taanna naapertorlugu napparsimavimmit angerlartinneqareermermi pinngitsaaliisummik malinnaaffigineqarnermut atatillugu nakorsaatitortitaanermi, nakorsaatit napparsimasumut sunniutaat nakorsaanermit ilisimaneqartut ilaatigut piffissami sivisuumi sunniusimasartut atorneqassasut erserpoq. § 5 naapertorlugu annikinnerpaaffimmiitsinissaq eqqarsaatigalugu taamatut aalajangersaasoqarpoq. Taamaattumik napparsimasumut annikinnerusumik akuliunnertut tunngaviusumik aallaavigineqartariarpoq ullut tamaasa nakorsaatitortitaanermiit soorlu assersuutigalugu ullut 14-it allortarlugit sivisuumik sunniusimasartumik nakorsateqarnek. Sivisuumik sunniusimasartunik nakorsateqarsinnaanerup, napparsimavimmit angerlarnermiit pinngitsaaliisummik malinnaaffigineqarnissami, pissutsinik immikkut ittunik tunngaveqarnera oqaatigineqassaaq.

Imm. 5-imut

Siunnersuutigineqarpoq pinngitsaaliisummik malinnaaffigineqarnerup ikinnerpaamik qaamatit pingasut allortarlugit nakorsaanermit nalilivigineqartarnissaa.

Imm. 6-imut

Tamatuma kingornatigut siunnersuutigineqarpoq qaammatit pingasut qaangiunneranni nakorsaanerup nalilissagaa, annilaangassuteqarnissamut tunngavissaqarnersoq aamma nalorninartoqarsinnaanersoq pisariaqartumik katsorsaanermik napparsimasup unitsitsinissaanut. Taamaattoqassappat pinngitsaaliissummik malinnaaffiginninnerup qaammatit pingasukkaarlugit sivitsorneqartarnissaa, nakorsaanerup aalajangiivigisinnaavaa.

Tarnimikkut napparsimasut pineqartut nammineersinnaassusaannik ataavartumik arsaarinninnissaq kissaatigineqanngilaq. Napparsimavimmi uninngareernermi malinnaaffiginninnerummat napparsimasup sivilunerpaamik qaammatini aqqaneq marlunni malinnaaffigineqarnissaa siunnersuutigineqarpoq. Napparsimasumik pinngitsaaliissummik malinnaaffiginninnissamut qaangerneqarsinnaanngitsumik killiliinikkut, napparsimasup sivilsoorsuarmik pinngitsaaliissummik nakorsartissinnaanera pinngitsoortinneqassaaq. Taamaalilluni siunnersuut naapertorlugu piumasaaqatit eqquutsinneqarpata, aatsaat napparsimavimmit angerlareernerup kingorna pinngitsaaliissummik malinnaaffiginnittoqarsinnaavoq.

Napparsimavimmit angerlartinneqareernerup kingornatigut pinngitsaaliissummik malinnaaffiginninnermut atatillugu immikkoortoq 2.6-imi oqaaseqaatit nalinginnaasut taamatuttaaq innersuussutigineqarput.

§ 20-mut

Siunnersuutip § 20-ani Naalakkersuisut pisinnaatinneqarput ingerlatsinikkut angerlartinneqareernerup kingornatigut pinngitsaaliissummik malittarinninnermut atatillugu § 19-imi aalajangersakkanut sukumiinerusumik maleruaqqusanik suliaqarnissaminnut, tamatumunnga ilanngullugu politiinit ikiorteqarluni aallertarnermut tungasunut. Malugeqquneqarpoq Naalakkersuisut politiinik ikiorneqarnissamut tunngatillugu aalajangersakkanik suliaqarnissaminnut pisinnaatinneqannginnerat Justitsministeriamit akuersissuteqartoqartinnagu, tak. pinerluttulerinnermi inatsimmi § 61, imm. 2.

*Kapitali 6-imut**Pinngitsaaliissummik sukaterussineq**§ 21-mut*

Imm. 1-imut

Siunnersuummi § 21-mi pineqarpoq pinngitsaaliissummik sukaterussineq sernissuiniarluni sukaterussinerup akerlia, tamatuma atorneqarnera § 26-mi malittarisassaliuunneqarpoq. Pinngitsaaliissummik sukaterussinerup aamma sernissuiniarluni sukaterussinerup akornanni immikkoortitsinermut tunngatillugu immikkoortoq 2.7-imi oqaaseqaatit nalinginnaasut innersuunneqarput.

Imm. 1-imi ilaapput pinngitsaaliissummik sukaterussinermi suut atorneqarsinnaasut sukumii-sumik allattorsimanerat, taakku imm. 2-mi piumasaqaatini allassimappata. Qiterut, paffinnut singernernullu ungerutit aammattaaq aqqatit kisimik taamaallaat pinngitsaaliissummik sukaterussinermi atorneqarsinnaapput. Pinngitsaaliissummik sukaterussinermi atortut ataqtigiisillugit imaluunniit immikkoortillugit artorneqarsinnaapput, tamatumani § 5-imi annikinnerpaaffeqartitsinissamut tunngaviusoq isiginiarneqassaaq.

Imm. 2-mut

Aalajangersakkami pinngitsaaliissummik sukaterussinerup qanoq atorneqarnissaanut piumasaqaatit aalajangersarneqarput.

§ 21, imm. 2-mi nr. 1-imi pisut ajornerpaat takuneqarsinnaapput, tassani pineqarmat timikkut imaluunniit peqqissutsikkut ulorianartorsiorsinnaanerit qaninnerpaat. Matumani inuit sernisorniakkat amerlanerupput. Pinngitsaaliissummik sukaterussinermit maleruaqqusami inuk pineqartoq kisimi pineqarnani, kisianni aammattaaq napparsimavimmi uninngaqtat, sulisut, pu-laartut imaluunniit allat napparsimavimmiittartut pineqarput.

Ulorianartorsioertitsisinnaanermut ilisarnaat pineqarpoq. Ulorianartorsioertitsisinnaaneq ilimanaateqarluinnartutut nalilerneqarsinnaavoq tamanna piviusuuppat, maannakkut pisinnaalluni aamma navianartorsiuertit takuneqarsinnaalluni. Iliuuseqannginnermili ulorianartorsioertitsisinnaaneq ajoqusiinermik kinguneqartitsereersimasariaqanngilaq.

§ 21 imm. 2, nr. 2-mi pineqarput iliuuseqarnerit sakkortuallaanngitsut aammattaaq inunnut sammisut. Taamaattorli inuit illersorniakkat tassaaginnarlutik napparsimavimmi uninngaqtat. Peqqarniisaarnerli immikkut sakkortuppat taava tamanna pissutsit naapertorlugit ulorianartorsiornermik kinguneqassaaq, tamannalu normu 1-imut ilaatinneqarpoq tamatumalu kingunerisaanik pinngitsaaliisutit atorneqarnissaat, aalajangersagaq taanna naapertorlugu pissutissaqassapput.

Malersuinerit imaluunniit peqqarniisaarnerit ilaatigut kinguaassiutitut sammisutut qaninniaa-nerusinnaasarput, nipituumik suaartarneq, sakkortuumik qinngasaarinerit imaluunniit allat piinik innimiilliornerit tigooqqaanerit. Taamaattorli ilaannikkut taamatut pisoqartillugu eqqarsaatigineqarsinnaavoq napparsimasumik, napparsimaqatiminut annertuumik akornusersuisumik utaqqiisaagallartumik nuutsitsinerup, ajornartorsiummik aaqqiisinnaanermik kinguneqarsinnaanersoq, tak. § 5 (annikinnerpaaffimmiititsinissamik tunngaveqarneq).

Naggataatigut nr. 3-mi pinngitsaaliisummik sukaterussinissamut periarfissiisoqarpoq tamatumani pisariaqarpat napparsimasup annikigisassaannngitsumik aserorterinissaa pinngitsoortinniarlugu. Annikigisassaannngitsumik aserorterinerimik naliliinermi pigisat qanoq naleqarneri kisiisa isiginiarnagit, kisianni aammattaaq aserorterinerup annertussusia aamma qanoq sivistiginera isiginiarneqassapput. Pinngitsaaliisummik sukaterussinermi annikinnerusumik iliuseqarnikkut aserorterineq unitsinneqarsinnaappat annikinneq toqqarneqassaaq tak. § 5, imm. 24.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

§ 22-mut

Imm. 1-imut

Aalajangersakkami siunnersuutigineqartumi ilaavoq kina pinngitsaaliisummik sukaterussinerup atorpeqarnissaanut aalajangiinissamut pisussaataaffeqarnerisooq.

Imm. 1-ip kingunerisaanik pinngitsaaliisummik sukaterussineq nakorsap napparsimasumik takusaareernermigut tamanna aalajangissagaa.

Imm. 2-imut

§ 22, imm. 2, naapertorlugu qiterusiinerup saniatigut paffinnut imaluunniit singernernut ungerutit aqqatillu atorpeqarnissaannut, taamaattorli Dronning Ingridip Napparsimavissuani tarnikkut nappaatilinnut Immikkoortortaqaarfianni nakorsaaneq aalajangiisuussaaq.

Imm. 3-mut

Aalajangersakkami takuneqarsinnaavoq pinngitsaaliisummik sukaterussineq aallartinneqarsimasooq peqqinnissaqarfiup immikkoortuisa arlaanni nalunaaquttap akunneri aqqaneq marluk sinnerlugit sivistussusilik imaluunniit sivistussuseqassanganneqartoq, pinngitsaaliisummik

sukaterussinerup ingerlatiinnarneqarnissaanut aalajangiineq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneermit aalajangiivigineqassaaq. Dronning Ingridip Napparsimavissuata avataani pinngitsaaliissummik sukaterussinerni nalunaaquttap akunnerinik aqqaneq marlunnik maleruaqqusaqarnikkut qulakkeerneqassaaq, nakorsap nakorsarneqarnermik isumaginnittup nuna tamakkerlugu napparsimavimmut isumasiuinissaa sivilisunerusumik pinngitsaaliissummik sukaterussisoqartillugu. Tamatuma saniatigut aammattaaq sivikitsumik pinngitsaaliissummik sukaterussinermi, pisariaqarpat nakorsap immikkut ilisimasalimmik naliliisitsinissaa naatsorsuutigineqarpoq.

Nalunaaquttap akunnerinik aqqaneq marlunnik maleruaqqusaqarnerup pinngitsaaliissummik sukaterussinerni nalunaaquttap akunneri aqqaneq marluk sinnerlugit sivilisussuseqarnissaa nalunaarunnaarpat, ataasiarluni siunnersortinnissaa piunasaqaataavoq. Tamatuma kingornatigut napparsimasup peqqissusianik aamma pinngitsaaliissummik sukaterussinerup sivitsorneqarnissaanik naliliisarnerni, Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneerup immikkut ilisimasalittut naliliisinnissaanut pisariaqartisineq, nalinginnaasumik nakorsap nammineq naliliinera naapertorlugu aalajangiivigineqassaaq.

Imm. 4-mut

Aalajangersagaq naapertorlugu qanoq iliuuseqarnissamut tamanna sioqqullugu nakorsap peqqusineragut pisinnaanera immikkut pinasuartumik iliuuseqarfigisarialinni avaqqunneqarsinnaavoq. Tamatumani piunasaqaataavoq pisoq tassaasoq timikkut imaluunniit peqqissutsikkut ajoqusersinnaanerup ilimanaateqarluinnarnerani, pinngitsaaliissummik qitequsiilluni sukaterussinerup nakorsap takkunnissaata tungaanut kinguartinneqarnerata, isumannaallisaanikkut illersorneqarsinnaannginnera. Immikkoortorta qarfimmi imaluunniit peqqissaavimmit pisoqarfiusumi pigaartoqarnikkut pissutsit, ullup qanoq ilinera nakorsallu aggersarneqarnerani ilisimatitsissutigineqartut eqqarsaatigalugit, nakorsap takkunnissaata tungaanut piffissap sivilisussissaa naliliivigineqassaaq. Qitequsiinermi annikinnerusumik iliuuseqarsinnaaneq, pingaartumik nakorsap takkunnissaata tungaanut inummik allamik ilaqartinneqarnerup, pisariaqarpalu uninngatinneqarnerup naammassinnaanera, naliliiviginninnermi ilaatinneqassaaq.

Taamatut pinasuartumik iliuuseqarfigisarialinni qitequsiilluni sukaterussinissamut aalajangiinissamut piginnaatitaaneq peqqinnissamik sullissisuniippoq, tassa imaappoq peqqissaasoq pigaartuusoq imaluunniit taassuma taartaa, imaluunniit qaqutigunnaq peqqinnissamik suliaqartoq najuuttoq.

Pinngitsaaliissummik sukaterussinerit taamatut ittut piaartumik isummerfigineqassapput, tassa pinngitsaaliissummik atuinerup unitsinneqarnissaanut tunngatillugu. Taamaattorli qaquguk-kulluunniit peqqinnissamik sullissisut pinngitsaaliissummik sukaterussinerup unitsinneqarnissaa pisussaaffigaat, taamatut iliorneq pisariaqarunnaarpat.

§ 23-mut

Siunnersuummi § 23-mi napparsimasoq qitequserlugu pinngitsaaliissummik sukaterunneqarsimasoq aalajangersimasumik nakkutilliisoqarnissaa piumasaqaataavoq.

Maleruaqqusami pingaarnertut siunertaavoq pinngitsaaliissummik qiterummik sukaterussinerup annertuumik sunniuteqarluni kingunerlunnissaata sunniuteqarnerata annikillisinneqarnissaa, tassa sukaterussinerup aamma kisimiinnermut atatillugu. Tamatuma saniatigut aalajangersimasumik nakkutilliisoqarnerup pinngitsaaliissummik qiterummik sukaterussinerup atornerqarnera killilerneqarsinnaammat, ingammik piffissap sivissusiata taamaalilluni sivikillineratigut.

Aalajangersimasumik nakkutilliisuutitaq tassaavoq paaqqinnittoq, peqqissaasoq, imaluunniit sulisoq alla piginnaasaqartoq, tamatumunnga ilutigitillugu suliassanik allanik suliaqartussaangitsoq taamaallaat napparsimasunik pinngitsaaliissummik qiteqummik sukaterunneqarsimasunik isumaginnittussaq, tassa pineqartup aalajangersimasumik nakkutigisarisaminik. Napparsimasup piumasai, inuttut naleqassusaa imminullu qanoq isiginera ataqqillugit pissutsillu aallaavigalugit, inuttut nammineq inuunissamut pisinnaatitaaffeqarnissaa eqqarsaatigalugu, nakkutilliineq ingerlanneqassaaq.

Nukiit atorlugit pissaanermik atuineq

§ 24-mut

Nukiit atorlugit pissaanermik atuinerup piumasaqaat tassaavoq napparsimasumik najummi-saqarneq aamma isersimaffimmut allamut ingerlatsinerusinnaavoq, taakku pinngitsaaliissummik sukaterussinerup § 21, imm. 2, naapertorlugu piumasaqaatitut ipput. Pinngitsaaliissummik katsorsaanerup atatillugu nukiit atorlugit pissaanermik atuineq pisariaqarpat tamatumunnga periarfissiissutit § 14, imm. 2-mi takuneqarsinnaapput.

Nukiit atorlugit pissaanermik atuinermi suup atorneqarneranut apeqqut, tassa pisuni ataasiakkaani atorneqartussamut tunngatillugu annikinnerpaaffiutitsinissamut tunngaviusiq tak. § 5, imm.2 isiginiarneqassaaq. § 21, imm. 2-mi aamma § 24-mi aalajangiinermut tunngaviusut paasineqarneranni qanoq annertusiartortitsisoqarnera isiginiarneqartariaqarpoq, taamaaliornikut piumasaqaatit annertusiartussammata, iliuserisami akuliunnerup annertussusia apeqqutaatillugu.

Aalajangersakkami § 24, imm. 2 naggatit aappaanni ilaapput nukiit atorlugit pissaanermik atuinnissamut periarfissat napparsimasut nammineersinnaajunnaarsarneqarsimasut immikkoortorta qarfiimmit anitsaaliornissaat qulakkeerniarlugu. Maleruaqqusap ilaatigut Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanermik pinsinnaatitsivoq immikkoortorta qarfiup matuisa silarliit paarnaarsimaannarnissaannik aalajangiinnissamut. Tamanna atuuppoq naak § 21, imm. 2 siullermi piumasaqaatit eqqortinneqanngikkaluartut.

§ 25-mut

Maleruaqqusap napparsimasumik annertuumik eqqissiviitsumik eqqissisisimanerulersitsiniarluni kapuummik eqqissisaatitalimmik atuinnissamut pinsinnaatitsivoq. Tamanna peqqinnissamut tunngaveqartumik pisariaqarsinnaavoq tassami napparsimasup qanoq innera pitsaanerulissappat ilaatigut pisariaqarsinnaavoq pineqartup sinilernissaa. Taamatuttaaq pissutsit qanoq ittunerat naapertorlugi eqqissisaammik atuneq annikinnerusumik iliuseqarnerusinnaavoq, napparsimasup piffissami sivikinngitsuusinnaasumi najumminissaanut imaluunniit qiterut atorlugu pinngitsaaliissummik sukaterussinermut sanilliussilluni. Qanoq pisoqarnera tunngavigerpiarlugi naliliinermi suup atorneqarnerata annikinnerpaatitsisoqarnissaanut tunngaviunersoq toqqarneqassaaq. Tamatumunnga ilutigitillugu nakorsaatit ilaat eqqissisaatit sianutigissaatit atorneqarsinnaapput. Aalajangersagaq tamatut oqaasertaqqarnermigut tamatumunnga killilersuutaanngilaq.

Pinngitsaaliissummik nakorsaatitortitsinermi, nakorsarneqarnissamut pilersaarummi kapisarnerit ilaatinneqarpata, tamanna taamaallaat pinsinnaavoq § 14 naapertorlugi, tamatumani Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaaneq akuersissuteqassaaq. Taamaattorli nakorsap pigaartuusup § 25, imm. 2, tunngavigalugu qaqutigut pinasuartariaqarnermi kapuummik eqqissisaatitalimmik atuinnissaminut pinsinnaatitaavoq, tamatumani annikinnerpaaffimmiititsinissaq siunertarineqassaaq. Eqqissisaammik kapisinermi nakorsaq najuutissaaq.

Tamatuma saniatigut immikkoortoq 2.7-imi oqaaseqaatit nalinginnaasut innersuussutigineqarput.

Sernissuiniarluni sukaterussineq

§ 26-mut

Imm. 1-imut

Sernissuiniarluni sukaterussinerup aamma pinngitsaaliissummik sukaterussinerup akornanni immikkoortitsinissamut tunngatillugu immikkoortoq 2.7-imi nalinginnaasumik oqaaseqaatit innersuussutigineqarput.

Napparsimasumik sukaterussineq pineqartup piumassusia akerlilerlugu sernissuinissamik siunertaqarluni taamaallaat pisinnaavoq, tamanna pisariaqarpat pineqartoq taamatut siunertaqanngikkaluarluni annertuumik imminut navianartorsiortippat. Iliuserineqartoq pinngitsaaliissummik pisutut isigineqassaaq napparsimasoq toqqaannartumik akerliulluni oqaaseqarpat. Taamatuttaaq pinngitsaaliissutitut isigineqassaaq pineqartoq imatut ileqqulersorpat sernissuiniarluni atorneqartumit inuk pineqartoq peerniarsarippat. Napparsimasoq nammineerluni peersinnaappat tamatumunngalu akornusersorniarneqarnani, taava tassani tamanna sernissuiniarluni sukaterussinertut isigineqassanngilaq, kisianni iluaqutissatut ikiorsiissutitut.

Sernissuiniarluni sukaterussinermi assersuutit pingaarnert pivirusut tassaapput nerriviup saavanut napparsimasoq issiavimmut ingitsillugu, taamaalilluni napparsimasoq nammineerluni nikuissinnaajunnaarsillugu nerriviup sukaterussinermut immikkut suliaasup atorneratigut. Napparsimasoq siniffimmini innangatillugu qipiata qaavatigut tungimik imaluunniit ungerutissiamik annoraaminermik qajannaarlugu, uffarnermi, perusersartarfimmi imaluunniit issiavimmi qiterut atorneqarsinnaavoq taamaaliornikkut napparsimasup nikuinnginnissaa uppillunilu anninnginnissaa qulakkeerniarlugu.

Imm. 2-mut

Sernissuiniarluni sukaterussinerup nakorsap peqqusinera naapertorlugu, qanoq annertutigisumik qanorlu pisoqartillugu atortup sorliup atorneqarnissaanik innersuussisumik tunngaveqar-

nissaa piumasaqaataavoq. Tamatumunngalu ilutigitillugu qanoq ilinerani inassuteqaatip naliivigineqaqqinnissaa pillugu aalajangersaasoqassaaq, sisamariarlunili peqqussuteqareernerup kingornatigut tamanna sapaatit akunnerisa sisamat qaangiunnerini pisassaaq, tak. § 34, imm. 2.

Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaanerup sermissuiniarluni sukaterussinerup sapinngisamik pisariaqartitsineq naapertorlugu annertunerusumik atorneqannginnissaa akisussaaffigaa aamma nakkutigisussaallugu, tamatumani napparsimasup isumannaatsuunissaa mianerineqassaaq, tak. § 34, imm. 1.

Qanimut nakkutillineq

§ 27-mut

Imm. 1-imut

Inatsisissatut siunnersuummi § 27, imm. 1-imi qanimut nakkutillineq, sulisup ataatsip imaluunniit arlallit napparsimasup eqqaaniiginnavinnerattut nassuiarneqarpoq. Eqqaaniiginnarneq imatut paasineqassaaq napparsimasup ataavartumik nakkutigineqarneratut, tamatumunnga ilanngullugit perusersarnerani aamma uffarnerani taamaaliornikkullu sulisut ingerlaannartumik iliuuseqarsinnaassallutik.

Napparsimasup nakkutigineqarnissani akuerippagu, napparsimasut inatsisitigut inissisimaneerat pillugu Inatsisartut peqqussutaat nr. 6, 31. maj 2001-imeersoq kapitali 2-mipaasissutissineqareernikkut akuersinermut maleruaqqusat naapertorlugit taama pisoqarsinnaavoq. Napparsimasooq akuersinngippat, qanimut nakkutiginninneq tassa napparsimasooq ataavartumik nakkutigineqarluni, tamanna inuit ataasiakkaat innarligassaannngissusianut ima annertutigisumik akulerunnerussaaq, taamaalilluni inatsisitigut tamanna inatsisitigut maleruagassiortariaqarluni.

Imm. 2-mut

Siunnersuummi § 27, imm. 2 naapertorlugu qanimut nakkutiginninneq pisariaqartumik pingitsoortitsiniarnermut atorneqarsinnaavoq, napparsimasup imminut toqunnissaa imaluunniit allatut nammineq allaluunniit peqqissusiannik annertuumik innarliisinnaappat, imaluunniit uninngaqatiminik malersuippat imaluunniit allatut ajoqusersuippat.

Pineqartut tassaasinnaapput napparsimasut ingerlaaruusaartut eqqissiveerusimaannarlutik, allanullu ileqqulersornerat akulerunnertut aamma akornusersuinertut isigineqarsinnaalluni,

soorlu assersuutigalugit napparsimasut ingasannermik pissuseqartut, allat piinik tigussukartut, kinguaassiutinut sammisutut qaninniartut il.il. Aammattaaq pineqarsinnaapput tarnimikkut napparsimasut neriumajunnaarnermik nappaateqartut.

Annikinnerusumik nakkutilliinerit/nakkutiginninnerit aalajangersakkami matumani pineqanngillat.

Imm. 3-mut

§ 27, imm. 3-mi allassimavoq napparsimasup akuersissutiginnngisaanik qanimut nakkutilliineq nakorsamit takuniaareersimasumit aalajangiivigineqassasoq.

Qanimut nakkutigineqarneq nalunaaquttap akunneri 24-t sinnerlugit sivilissuseqarpat, aalajangiineq pinngitsaaliissummik iliuuseqarnermi nalunaarsuivimmu ilanngunneqassaaq, tak. § 33, imm.1. Taamaattoqartillugu napparsimasup § 47, imm.1, nr. 10naapertorlugu Tarnimikkut Nappaatillit Maalaarutaannik Aalajangiisartunut aalajangiineq maalaarutigisinnaavaa. Taama-tuttaaq napparsimasoq § 35, imm. 2, nr. 7naapertorlugu siunnersortissalerneqassaaq.

§ 28-mut

Siunnersuummi § 28-p malitsigisaanik napparsimaveqarfimmi oqartussaasut immikkoortortaqarfiit aaqqissuuneqarnerat pillugu ilisimatitsinissaq pisussaaffigaat. Tamatumunnga atatillugu immikkoortortami immikkut nakkutilliiveqarpat, tamatuma angissusaa aaqqissugaaneralu ilisimatitsissutigineqassapput. Ilisimatitsineq sapinngisaaq tamaat napparsimasup immikkoortortaqarfimmut uninneranut atatillugu pissaq. Napparsimasup qanoq inna pissaq taama pisoqarsinnaanngippat, piaarnerpaamik immikkoortortap aaqqissuussaana pillugu ilisimatineqassaaq.

Dronning Ingridip Napparsimavissuani tarnikkut nappaatilinnut Immikkoortortaqarfianni immikkoortumik ataatsimoortumik pilersitsisoqarnissaa pisariaqarsimavoq. Tamanna imatut paasineqassaaq immikkoortoq ammasutut taamatullu matoqqasutut atorineqarsinnaasut, tassa immikkoortortaqarfiup ilaa immikkoortuulluni (qanimut nakkutiginniffik), tassunga matu pisariaqartitsineq naapertorlugu paarnaarneqarsinnaalluni.

§ 29-mut

Imm. 1-imut

Aalajangersagaq naapertorlugu aalajangersaasoqarsinnaavoq immikkoortorta qarfirmi matut paarnaarneqarnissaanut, tassa napparsimasunut namminneersinnaajunnaarsinneqarsimasunut tunngatillugu, tak. siunnersuummi kapitali 3. Pineqartut tassaapput napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut.

Siunnersuummi § 29, imm. 1 nr. 2 naapertorlugu taamatuttaaq aalajangersaasoqarsinnaavoq matunik paarnaarsisoqarnissaanut, napparsimasunut imminnut annertuumik navianartorsior-tinnissaminnut aarlerinaateqartunut tunngatillugu. Napparsimasut tassani pineqartut tassaapput sernissuiniarluni sukaterussanut ilaasut, tak. § 26, imm. 1. Napparsimasunut taakkununga ilaasunut aalaavigineqarpoq inuit puiguttormermik nappaateqartut, kisianni aammattaaq inuit silaqassutsimikkut ajornartorsiutillit imaluunniit paatsiveerusimaartut, imaluunniit ularussisimasutut ittut aalajangersakkamut ilanngunneqarsinnaasut. Paarnaarsinermut siunertaa-voq illersuiniarluni iliuseqarnek taamaalilluni siunertamit uaniittumit allaaneruvoq, § 29, imm. 1-imi tunngaveqartumit paarnaarsinermut tassani pineqartut tassaapput napparsimasut nammineersinnaajunnaarsinneqarsimasut.

Imm. 2-mut

§ 29, imm. 2 naapertorlugu taamatuttaaq matunik paarnaarsisoqarsinnaavoq napparsimasunut imm. 1-imi ilaatinneqanngitsunut tunngatillugu, imaappat tamanna napparsimasumit noqqaasutigineqarluni. Napparsimasup apeqquteqaateqarneratigut paarnaarsimatitsineq atorunnaarsinneqassaaq.

Imm. 3-mut

§ 29, imm. 3 naapertorlugu napparsimasut tamarmik immikkoortorta qarfirmiittut ingerlaanartumik ilisimatinneqassapput, imm. 1 aamma imm. 2 naapertorlugit paarnaarsinissap aalajangerneqarnerata kingornatigut.

§ 30-mut

Pinngitsaaliissummik napparsimasup timimigut eqqiluisaarneqarnissaa pillugu aalajangiineq Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaannermit aalajangiiffigineqassaaq, tamatumani tunngavigineqassaaq piviusumik misissuineq aamma napparsimasup eqqiluisaarnermut tunngatillugu qanoq inissisimanerata nalilerneqarnera. Nakorsaannerup aalajangiinera tunngavilersuutigineqartullu napparsimasooq pillugu allattugaatinut nalunaarneqassapput, tak. § 13 nakorsat pillugit

inatsimmi, (Nakorsatut suliaqarneq pillugu Inatsit, Lovbekendtgørelse nr. 426 af 19. august 1976, Peqqussut nr. 860, 18. december 1991-imeersoq Kalaallit Nunaannut atortuulersinneqarsimasutut, kiisalu Peqqinnissakkut sullissinermik ussassaarisarneq pillugu Inatsisartut peqqussutaat nr. 8, 31. Maj 2001-imeersoq aqqutigalugu allanngortinneqarsimasutut).

Aalajangersagaq naapertorlugu napparsimasup timimigut eqqiluisaannginnera tarnimigut nappaataanik patsiseqartinneqarsinnaassaaq. Timip eqqiluutsuutinnissaanut assersuutaasinnaasut tassaapput uffarneq, qulinneq, kigutigissarneq aamma atisanik taarsiineq. Taamatuttaaq soorlu assersuutigalugit puiguttortuni nangit nalequttallu taarserneqartariaqarsinnaapput.

Pinngitsaaliissummik timikkut eqqiluisaartitsisoqarsinnaavoq napparsimasup peqqissusaa eqqiluisaannginnermik patsiseqartumik soorlu assersuutigalugit aseruuttoorsinnaaneq assigisaallu peqqutigalugit navianartorsiorpat. Kisianni aammattaarli napparsimasup eqqiluisaannginnera uninngaqaataanut sulisunullu ajoqutaappat, pineqartup pinngitsaaliissummik uffartinneqarnissaa ipiitsunillu atisitinneqarnissaa allatulluunniit eqqiluisaartinneqarnissaa nakorsaane-rup aalajangersinnaavaa.

Annikinnerpaaffissaaniititsinissamut tunngaviusoq, tak. § 5, imm. 2, pinngitsaaliissummik timikkut eqqiluisaarnissaaq pillugu aalajangiissagaanni eqqarsaatigineqassaaq. Napparsimasup nammineq piumassutsini naapertorlugu peqataanissaa sapinngisaaq tamaat anguniaqqaarlugu aatsaat taamaaliortoqarsinnaavoq, pissutsillu ajornartitsinngippata napparsimasooq periarfissaqarpat naammaginartumik eqqarsarfissaqartinneqassaaq. Pinngitsaaliissutaasoq aammattaaq anguniakkamut naapertuuttuussaaq, annikinnerusumillu akuliunnikkut iliuuseqarnerit naammaginarpata, tamakku qinerneqassapput.

Pinngitsaaliissummik timikkut eqqiluisaartitsineq sapinngisamik mianersortumik ingerlanneqassaaq napparsimasorlu sapinngisamik mianersuulluarlugu, taamatut pisariaqanngitsumik misigissutsimigut innarlerneqarsinnaanera ajoqusersinnaaneralu pinngitsoortinniarlugit, tak. siunnersuummi § 5 imm. 3.

Pinngitsaaliissummik eqqiluisaartinneqarneq pillugu maalaarutaasinnaasut napparsimavimmi pisortanut ingerlatinneqassapput.

§ 31-mut

Siunnersuummi § 31-mi Naalakkersuisut pisussaatinneqarput pinngitsaaliissummik sukaterus-sineq, nukiit atorlugit pissaanermik atuineq, napparsimasut imminnut ajoqusinnginnissaannut

sukaterussineq, qanimut nakkutigineqarnek aamma immikkoortortaarfimmi matunik par-naarsuineq pillugit maleruagqusanik aalajangersaasinnaanissaminnut.

Pinngitsaaliissummik iliuseqarnerit assigiinngitsut pillugit ersarinnerusunik maleruagassior-toqarnissaa, taamatullu sulisut paasinarsakkanik maleruagassiuunneqarnissaat pisariaqartinne-qalersinnaavoq.

Kapitali 7-imut

*Allagarsianik/nassiussarsianik, pigisanik timilu satsillugu misissuisarnek
aammattaaq pigisanik arsaarinnissuteqartarnek aamma suujunnaarsitsisarnek*

§ 32-mut

Imm. 1-imut

Aalajangersakkamut ilapput napparsimasup allagarsiaanit misissuinissamut, napparsimasup inaanik aamma pigisaanik misissuinissamut aammattaaq napparsimasumik timaatigut satsillu-gu piginnaatitsineq. Pigisanik arsaarinnissuteqarsinnaanerup aamma suujunnaarsitsisinnaane-rup assigisaasalu inatsimmi suli maleruagassaqartinnissaat siunnersuutaavortaaq.

Napparsimasup nakorsaatinik, aanngajaarniutitik sakkunilluunniit navianaatilinnik imminut uninngaqatinullu ajoqutaasinnaasunik pigisaqarsinnaanerata pissarsisinnaanerataluunniit pit-saaliorsinnaanissaa, aalajangersakkami eqqarsaataavoq. Nakorsaaitit, aanngajaarniutit, sakkul-luunniit navianaatillit napparsimasumut apuunneqarsimanerannut apuunniarneqarnerannul-luunniit *pasitsaassineq tunngavissaqarpat*, iliuseqarnissaq Dronning Ingridip Napparsima-vissuani tarnikkut nappaatilinnut Immikkoortortaqarfianni nakorsaanerup aalajangiivigisin-naavaa. Pissutsit suut pasitsaassinermi tunngaviusut, napparsimasoq pillugu allattuiffimmut ilanngunneqassapput.

Taamatuttaaqaq pisuni ataasiakkaani napparsimasup pasilliutigisanik il.il. pigisaqarsinnaanera immikkut naliliivigineqartassaaq. Taamaammat immikkoortortaarfimmi napparsimasunut ataasiakkaanut ataatsimoortunulluunniit aalajangersimasunik periuseqartoqarsinnaanngilaq.

Aalajangersagaq naapertorlugu napparsimasup nakorsaatinik, *aanngajaarniutitik sakkunil-luunniit ulorianartunik* pigisaqarnera misissorneqarsinnaavoq. Pineqartut immikkoortortaqar-

fimmiippata napparsimasumut namminermt, soorlu imminorsinnaasumut allanulluunniit navianaateqarsinnaapput. Pineqartut saviusinnaapput imaluunniit sakkut kisianni aammattaaq atortuusinnaapput nalinginnaasumik ulorianangitsutut isigineqartartut, soorlu assersuutigalugit sannatit, meqqutit imaluunniit puiaasat gassimik imallit il.il. Anngajaarniutinut pineqartut soorlu assersuutigalugu taaneqarsinnaapput imigassaq aamma ikiaroorntoq. Nakorsaatit nakorsamit allagartaligaasinnaapput pisiassaasinnaallutilluunniit.

§ 32, imm. 1, nr. 1-ip malitsigisaanik piginnaatitsissuteqartoqarpoq napparsimasup allagarsiai ammarneqarsinnaanerannut aamma aalajangersakkami taaneqartunik ilaqarnersut misissornissaannut. Allagarsiat taamatuttaarlu poortukkat misissorneqarsinnaapput. Allagarsiat taamaallaat aalajangersakkami taaneqartunik atortunik, nakorsaatinik aamma angajaarniutinik missisuiffigineqassapput. Allagarsiali oqaasertaannik atuarnissamut piginnaatitsisoqanngilaq. Napparsimasumut nassiussat taamaallaat pineqarput, akerlianik napparsimasup nammineq allagai aamma nassiussai tamatumunnga ilaatinneqanngillat.

§ 32, imm. 1, nr. 2 naapertorlugu napparsimavimmi inigisap pigisallu misissuivigineqarnissaat pillugu aalajangiisoqarsinnaavoq. Soorlu assersuutigalugu inigisami sikaaviit amusartullu misissuivigineqarsinnaapput, kisianni aammattaaq napparsimasup nammineq pigisai pooqattat pigisaalu allat misissuivigineqarsinnaapput.

§ 32 imm. 1, nr. 3 naapertorlugu napparsimasup timaa satsillugu misissuivigineqarsinnaavoq. Aalajangersakkap immikkoortuisa aappaat naapertorlugu, qaneq ilanngullugu timip ammarngisa misissuivigineqarnissaat inerteqqutaavoq. Annikinnerpaaffissaaniititsinermik tunngavissap § 5, imm. 2-miittup kingunerisaanik iliuseqarneq sapinngisamik mianersornerpaamik aamma sapinngisamik annertunerpaamik napparsimasoq mianeralugu ingerlanneqassaaq, taamaaliornikkut pisariaqanngitsumik narrunarsaaneq aamma persaqusersuineq pinngitsoornarlugit.

Imm. 2-mut

§ 32, imm. 2 naapertorlugu ajornanngippat napparsimasoq isigitillugu allagarsiai ini uninngavigisaa pigisaalu misissuiffigineqassapput. Naatsorsuutigineqarpoq misissuinerit taamaattut napparsimasoq peqataatinnagu taamaallaat ingerlanneqarsinnaasut, napparsimasup qanoq issusia imaappat pineqartup misissuineri peqataasinnaanani. Pissutsit allat soorlu assersuutigalugu napparsimasoq misissuinerup nalaani immikkoortortaqaqarfimmiinngippat, misissuinsaq napparsimasup immikkoortortaqaqarfimmut uternissaanut utaqqisinniartariaqarput.

Imm. 3-mut

Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup aalajangiivigisinnaavaa nakorsaait, aannngajaarniutit aamma atortut ulorianartut misissuinerni taaneqartuni nassaarineqartut arsaarinnissutaallutik paarineqartussangussapput. Naatsorsuutigineqarpoq pigisat tamakku immikkoortorta qarfimmi toqqortarineqarnissaat, tamakku illersorneqarsinnaasumik napparsimasumut tunniunneqarsinnaalernerisa tungaanut, soorlu assersuutigalugu napparsimavimmit angerlartinneqarnermut atatillugu. Pigisat tassaap-pata inatsisinik nalinginnaasunik unioqqutitsinermut attuumassuteqartut taakkua nakorsaane-rup politiinut tunniussinnaavai.

Nakorsaanerup aalajangigaa pineqartoq pillugu allattugaatinut nalunaarneqassaaq.

Allagarsianik/nassiussarsianik, napparsimavimmi inigisamik, pigisanik timilu satsillugu misissuinerit kiisalu pigisanik suujunnaarsitsineq, arsaarinnissuteqarneq aamma suujunnaarsitsi-neq il.il. pillugit naammagittaalliutaasinnaasut, napparsimavimmi pisortanut ingerlatinneqar-sinnaapput.

Imm. 4-mut

§ 32, imm. 4-mi Naalakkersuisut allagarsianik/poortugarsianik, pigisanik, timi satsillugu misissuineri kiisalu pigisanik arsaarinnissuteqarnermi suujunnaarsitsinermilu maleruaqqusalior-nissamat piginnaatinneqarput. Iliuseqarneq pillugu erseqqinnerusumik maleruaqqusalior-toqarnissaa taamatullu sulisut paasinarsakkanik maleruaqqusaliiunneqarnissaat pisariaqartin-neqalersinnaavoq.

Kapitali 8-mut

*Pinnngitsaaliissuteqarnermik nalunaarsuineq aamma
pinnngitsuugassaannngitsumik nalilersueqqinneq*

*§ 33-mut***Imm. 1**

Siunnersuummi § 33, imm. 1 naapertorlugu pinnngitsaaliissummik iliuseqarnerit pillugit aala-jangersakkat naapertorlugit, pinnngitsaaliissummik iliuseqarnerit suulluunniit pillugit paasis-sutissat nalunaarsorneqassapput. Napparsimasut ataasiakkaat inatsisitigut illersugaanerit, soorlu assersuutigalugu naammagittaalliutinik suliaqartarneq eqqarsaatigalugu, nalunaarsui-nissaq pisariaqarpoq. Taamatuttaaq pinnngitsaaliissummik atuisarnerit pillugu inuiaqatigiinni

kisitsisitigut paasissutissanik pigisaqarnissamut nalunaarsuineq iluaqutaavoq. Pinngitsaaliissummik iliuutsit qitiusumik nalunaarsorneqarnerat napparsimasut inatsisitigut illersugaanerannut toqqammavissat pingaarnerit ilagaat, kinguneqarluartumillu nakkutilliinissamut pisariaqarluni.

Imm. 2-mut

§ 33, imm. 2-mi Naalakkersuisut pisinnaatinneqarput ingerlatsinikkut pinngitsaaliissummik atuinermut allattuiffiit, tamatumunnga ilanngullugit pinngitsaaliissummik atuinermut immer-sugassat qanoq isikkoqarnissaannut maleruaqqusat, taakkua qanoq immersorneqarnissaanut aammattaaq Nunatsinni Nakorsaannermut nalunaaruteqartarnermut sukumiinerusumik maleruaqqusaliornissaminnut.

§ 34-mut

Imm. 1-imut

Aalajangersakkami siunnersuutigineqartumi siunertaavoq nammineersinnaajunnaarsitaaneq allatullu pinngitsaaliissummik iliuuseqarnerup annikinnerpaaffimmitinnissaa tunngavigalugu ingasaassinnginnissap qulakkeerneqarnissaa. Tamatuma eqquutsitsineqarnissaa Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaannerup pisussaaffigaa.

Aalajangersakkap pinngitsaaliissummik atuinert suulluunniit tamarmik immikkoortorta qarfiup pinngitsaaliissummik atuinermut allattaavissuanut ilanngunneqartarnissaanut tunngasup, tamatumunnga ilutigitillugu nalunaarsuinissamut maleruaqqusat atuuttut eqqortinneqarnissaat pinngitsoortinngilaa, taamaattumik immikkoortorta qarfiup pinngitsaaliissummik atuinermut allattaavissuanut ilanngunneqartut taamatutaaq napparsimasoq pillugu nalunaarsuiner-mut allattaavimmu ilanngunneqassapput.

Imm. 2-mut

Siunnersuummi § 34, imm. 2 maleruaqqusamik immikkut ilaqarpoq tassa pinngitsuugassaanngitsumik nalilersueqqinnissamut tunngasumik, tassa nammineersinnaajunnaarsitaanissamut piunasaqaatit suli atuutsinneqarsinnaanerannut tunngatillugu nalilersueqqinnissaq. Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaannerup § 34, imm. 1, naapertorlugu namminneerluni aamma ataavartumik nakkutigissava kikkuluunniit piffissami pisariaqartinneqartumit sivilisunerunngitsumik nammineersinnaajunnaarsinneqannginnissaat. § 34, imm. 2-mi maleruaqqusamik kissaateqarnermut tunngaviusoq tassaavoq

ingerlaavartumik nalilersueqqinnissap aaqqissuussaanagerusumik ingerlanneqartarnerata ilaneqarnissaa.

Maleruaqqusaaq naapertorlugu nakorsaanagerup inummut nammineersinnaajunnaarsinneqarsimasumut tunngatillugu nammineerluni iliuuseqarnermigut nammineersinnaajunnaarsitsinerup suli ingerlatiinnarneqarnissaanut apeqqut nalilersoqqissavaa aalajangersakkami akuttussusisatut allanneqarsimasut tunngavigalugit. Taamaalillutik napparsimasut pinngitsaaliissummik unitsinneqarsimasut, pinngitsaaliissummik uninngatinneqartut imaluunniit pinngitsaaliissummik utertinneqarsimasut matumani pineqarput. Pinngitsuugassaangitsumik nalilersueqqinnerup tamatuma inernera pinngitsaaliissummik atuinermik allattaavissuarmut ilanngunneqassaaq aalajangiinnermut tunngavilersuutit sukumiisut ilanngullugit.

Nakorsaanagerup piunasaqaataasut atuukkunnaarsimasut paasiguniuk taava nammineersinnaajunnaarsitsineq ingerlaannartumik unitsinneqassaaq, tak. § 13, imm. 1.

Imm. 3-mut

Nakorsaanagerup nammineersinnaajunnaarsitsinissamut piunasaqaataasut atuukkunnaarsimasut paasiguniuk, nammineersinnaajunnaarsitsineq ingerlaannartumik atorunnaarsissavaa, tak. § 13. Imatut pisoqarpat nakorsaanagerup nammineersinnaajunnaarsitsineq suli pisariaqartuusoq taava § 34, imm. 3-p malitsigisaanik, napparsimasumut siunnersortaasoq aamma taamatuttaaq napparsimasooq, aalajangiineq pillugu ilisimatinneqassapput.

Napparsimasup nammineq sukkulluunniit angerlartinneqarnissamik qinnuteqarsinnaanera, suleriaatsimi pineqartumi akornuserneqanngilaq, tak. § 11 imm. 2.

Imm. 4-mut

Siunnersuummi § 34, imm. 4-mi ilaavoq immikkut aalajangersagaq sernissuiniarluni sukaterussinerup akuerineqarneranut nalilersueqqinnermut tunngasoq. Sernissuiniarluni sukaterussinerup pisariaqartitsinnermut naleqqiussilluni siviluserusumik atorneqannginnissaa qulakkeer-niarlugu siunnersuutigineqarpoq, nalilersueqqinnermik nutarterisoqartarnissaa ullut pingasut, qulit, 20-t aamma 30-t siullermik akuersissuteqarnerup kingornatigut, tamatumalu kingornatigut sapaatit akunneri sisamakkaarlugit. Piffissani taakkunani nakorsamit akuersissuteqartoqar-nera nutarterneqanngippat aalajangersaaneq atorunnaassaaq, taamaalilluni sernissuiniarluni sukaterussinermik atuinissamut tunngavissaarutissaaq.

Imm. 5-imut

Aalajangersakkami ilaapput pinngitsaaliissummik sukaterussineq pillugu immikkut maleruaq-qusat. Pinngitsaaliissummik sukaterussineq ingerlatiinnarneqassappat taava nakorsamit nali-lersooqqinneqassaaq pinngitsaaliissummik sukaterussinermut ingerlatiinnarneqarnissanut a-peqqut, taamaattorli ikinnerpaamik ullup unnuallu ingerlanerani ataasiarluni. Taamaaliornik-kut pinngitsaaliissummik sukaterussisarnerup qanoq annertutigisumik atugaanera, nakorsamit nakkutigineqarnissaa sukannernerulersinneqarpoq.

Tamakku saniatigut immikkoortoq 2.9-mi oqaaseqaatit nalinginnaasut innersuussutigineqar-put.

Kapitali 9-mut
Napparsimasunik siunnersuisartut

§ 35-mut

Imm. 1-imut - 2-mut

Maannakkut akissarsiaqarlutik napparsimasunik siunnersuisartoqarnermik aqqissuussinerup ingerlatiinnarneqarnissaa siunnersuutigineqarpoq.

Siunnersuummi § 35 imm. 1 aamma 2 naapertorlugu automatiskiusumik aamma pinngitsoor-neqarsinnaanngitsumik napparsimasunik siunnersuisartut ilanngutsinneqassapput nammineer-sinnaajunnaarsitsineramik atuinerup aallartinneqarnerani aamma aalajangersakkami pinngitsaa-liissutinik allanik atuineri. Erseqqissaatigineqassaaq timi atorlugu pissaanermik atuneq aam-mattaaq ilaatinneqarmata pissaaneq atorlugu eqqissisaatitortitsineq. Tamatuma kingunerisaa-nik napparsimasunik siunnersuisartoq ilanngutsinneqassaaq pissaaneq atorlugu eqqissisaati-tortitsineri.

Pinngitsaaliissummik atuneq soorlu sukaterussineq il.il. napparsimavimmut pinngitsaaliis-summik unitsitsineriut imaluunniit napparsimavimmi pinngitsaaliissummik uninngatitsiner-mut atatillugu arlalitsigut pisassaaq, tassani napparsimasumik siunnersuisoq ilanngutsinneqa-reersimassalluni. Napparsimasumik siunnersuisoq taanna soorunami pinngitsaaliissummik a-tuineriut allanut atatillugu atorneqarsinnaassaaq.

Imm. 3-mut

Siunnersuummi § 35, imm 3-mi napparsimasumik siunnersuisup suliassai ilaapput, taakkua nalinginnaasumik sapaatit akunneranni ataatsimi nalunaaquttap akunnerini sisamat arfinillilu akornanni sivisussuseqartussatut naatsorsorneqartut.

§ 35, imm. 3, nr, 3 naapertorlugu napparsimasumik siunnersuisoq maalaarutip Tarnimikkut Nappaatillit Maalaarutaannik Aalajangiisartunit suliarineqarnerani sapinngisamik najuuttasaaq. Aalajangersakkap oqaasertalernerisa Tarnimikkut Nappaatillit Maalaarutaannik Aalajangiisartut oqarasuaatikkut ataatsimiissinnaanerak akornutissaqartinneqanngilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqarput.

§ 36-mut**Imm. 1-imut**

Napparsimasunut siunnersortit qinnuteqaatit tunngavigalugit Nunatta Eqqartuussivianit atorfinitsinneqassapput. Napparsimasunut siunnersortit eqqartuussisumit nalunaarsorneqartut Dronning Ingridip Napparsimavissuani tarnikkut nappaatilinnut Immikkoortorta qarfiannut nassiunneqassapput.

Napparsimasunut siunnersortit pingaartumik peqqinnissaqarfimmi inunnillu isumaginnittoqarfinni sulisut akornanni sulisussarsiarineqarnissaat naatsorsuutigineqarpoq. Soqutiginnittulli allat soorlu assersuutigalugu palasit, ilinniartitsisut, tarnip pissusaanik ilisimasallit (psykolog) immikkut tulluurtut isigineqartariaqarput. Qinnuteqartut pisariaqartitanit amerlaneruppata, qinnuteqartunit piginnaasaqarnerusorisat eqqartuussisumit atorfinitsinneqassapput. Qinnuteqartup atorfinimmut atatillugu napparsimasunut siunnersortaanissamut naapertuuttut isigisarialimmik, immikkut paasisimasaqarnera misilittagaqarneraluunniit, naliliinermi ilaatinneqartariaqarput.

Napparsimasunut siunnersortinngortut suliamik ingerlatsinissaq pillugu pikkorissarneqassapput. Tarnimikkut napparsimasut pillugit inatsisip matuma imaanik paasisutissiinissaq inatsisillu piunnaasaqatit tunngavigalugit sullissinissaq, napparsimasunut siunnersortinik pikkorissaanermi pingaarnertut anguniagaassaaq. Pinngitsaaliissummik iliuuseqarnerit siviunerusumik ingerlanneqartut taamaallaat Nuummi pinnaammata, napparsimasunut siunnersortinik

arfineq pingasut qilillu akornanni amerlassusilinnik atorfinitsitsisoqarnissaa naatsorsuutigineqarpoq. Napparsimasunut siunnersortit Nuummi najugaqartuussapput Dronning Ingridip Napparsimavissuani tarnikkut nappaatilinnut Immikkoortorta qarfianni atorfeqartuussanatik.

Imm. 2-mut

§ 36, imm. 2 naapertorlugu siunnersuisussanngortitsinermi, napparsimasunut siunnersortit nalunaarsuiffianni tullinnguuttoq, peqqissaasumit pigaartuusumit toqqarneqassaaq. Siunnersuisussanngortitsineq nalinginnaasumik oqarasuaatikkut nalunaarutigineqassaaq, kisianni tamatum kingornatigut peqqissaasumit pigaartuusumit nalunaarlugu uppersaaserneqassalluni. Nalunaarsuiffik naapertorlugu kikkut siunnersuisussanngortinneqarnerisa nalunaarsuiffimmilu killiffiup malinnaaviginissaat, peqqissaasup pigaartuusup pisussaaffigaa.

Pinngitsaaliissummik napparsimavimmut unitsitsinermi pinngitsaaliissummik iliuuseqalernermi siunnersuisussanngortitsisoqassaaq. Nammineq piumassutsiminnik napparsimavimmut unittunik pinngitsaaliissummik uninngatitsilernermi Dronning Ingridip Napparsimavissuani tarnikkut nappaatilinnut Immikkoortorta qarfianni nakorsaanerup angerlarnissamik itigartitsinera tunngavigalugu siunnersuisussanngortitsisoqassaaq. Nammineq piumassusertik naapertorlugu napparsimavimmut unittunik pinngitsaaliissummik katsorsaanerme imaluunniit napparsimavimmit angerlartinneqareernerup kingornatigut pinngitsaaliissummik malinnaavinnilernermit atatillugu, tak. § 19, imm. 1 pinngitsaaliissummik katsorsaalerne mit imaluunniit pinngitsaaliissummik nakorsaatitortitsilernermit atatillugu siunnersuisussanngortitsisoqassaaq.

Imm. 3-mut

Nalunaarsuiffimmi nalunaarsukkat arlaannik allamik siunnersuisoqartinneqarnissamut napparsimasup qinnuteqaataa, sapinngisaaq naapertorlugu akuersissutigineqassaaq tak. § 36, imm. 3. Siunnersuisussanngorsaaereerup nalunaarsuiffimmiittumik allamik taarserneqarnissaa kissaataappat, tunngavilersuutaasut naammaginarpata aatsaat akuerineqarsinnaasariaqarpoq.

Imm. 4-mut

§ 36, imm. 4-p malitsigisaanik nalunaarsuiffimmi nalunaarsimanngitsumik siunnersuisoqarnissaaq napparsimasumit kissaataappat, tamanna ilaatigut akuerineqarsinnaassaaq. Taama siunnersuisussanngortitsineq, Nunatta Eqqartuussiviani eqqartuussisup aalajangiivigisassaraa. Taamatulli pisoqarnerani utaqqiisaagallartumik tullinnguuttumik siunnersuisussanngortitsineq, peqqissaasumit pigaartuusumit isumagineqartussaassaaq, tak. § 36, imm. 2.

Taamatut piumasaqaateqarnerup akuersissutaanissaanik naliliinermi piumasaqaatip naammaginartumik tunngavilersorneqarsimanera siunnersuisussanngortinniakkallu piukkunnassusaa pingaartinneqartariaqarput. Qanigisat ikinngutillu napparsimasup tatigisatuarisinnaavai. Taak-kununngalu napparsimasunut siunnersortaasartut ilisimasassaattut naatsorsuutigineqartut im-mikkut paasisimasagarfiginissaat piumasaqaataasinnaangilaq. Taamaattorli taama suliaqar-nerup piumasaqaatitaanik paasisimanninnissaq piumasaqaataasinnaassaaq. Eqqartuussisup si-unnersuisussanngortitsineq pillugu aalajangigaa pisortaqarfimmut allamut ingerlateqqitassan-ngortinneqarsinnaangilaq.

Tamakku saniatigut immikkoortoq 2.10-mi oqaaseqaatit nalinginnaasut innersuussutigineqar-put.

§ 37-mut

Imm. 1-imut

Napparsimasup siunnersuisuatalu attaveqatigiinnerannut tunngasoq aalajangersakkami male-ruagassiuunneqarpoq. Napparsimasooq peqqinnissaqarfiup immikkoortuani Nuup avataaniittu-miippat, ataqatigiinneq telefonikkut imaluunniit nalunaarasuartaatit atorlugit attaveqatigiin-nikkut ingerlanneqassaaq. Sapaatit akunnerata qaangiunnerani napparsimasooq sumiiffimmi Nuup avataaniittumiiginnarpat, aalajangersagaq naapertorlugu pulaarnissaq qarasaasiaq ator-lugu attaveqatigiinnermik taarserneqassaaq.

Napparsimasut napparsimavimmit angerlarnermik kingorna pinngitsaaliissummik malittarine-qarnerminnut atatillugu siunnersuisoqartinneqartut, siunnersuisuminnut attaveqarniarneranni qarasaasiaq atornerussaaq. Napparsimasut napparsimavimmit angerlartitaanerminni Nuup avataani najukkaminnut utertut, peqqinnissaqarfiullu immikkoortuani pinngitsaaliis-summik nakorsaatitortinneqartut, matumani pineqarput. Peqqinnissaqarfimmi immikkoortoq pinngitsaaliissummik nakorsaatitortitsiviusoq, oqarasuaammik atukkiinikkut imaluunniit qara-saasiakkut attaveqaat Skype aqqutigalugu attaveqartitsisinnaanermut ikiuutissaaq.

Imm. 2-mut

Aalajangersagaq naapertorlugu napparsimasumut siunnersortaasoq akeqanngitsumik akornu-serneqarnanilu nammineq takkunermigut, allakkatigut, oqarasuaatikku napparsimasumut attaveqarnissamut pisinnaatitaaffeqarpoq. Taamaasilluni napparsimasooq Dronning Ingridip Napparsimavissuaniippat, napparsimasunut siunnersortip, soorunami katsorsartinnerup ilaati-gut killiliisinnaanera apeqqutaatillugu, sukkulluunniit napparsimasooq pulaarsinnaavaa. Oqara-

suaatikkut napparsimasumut attaveqartarnissaq napparsimasunut siunnersortip pisinnaatitaaffigaattaq, taamaammallu allakkatigut taamaallaat attaveqartarnissaa innersuussutaasinnaangilaq.

Aalajangersakkap oqaasertaliornera naapertorlugu napparsimasunut siunnersorti napparsimasumik attaveqarnissamut pisinnaatitaaffeqarpoq. Pissutsit piviusut maleruaqqusallu patsisaallutik killiliisoqarsinnaanera, soorlu assersuutigalugu napparsimasup piffissap qanoq ilinerani siunnersortiminut oqarasuaatikkut attaveqarsinnaanera ajornaquteqartinneqanngilaq. Napparsimasup immikkoortortaqarfimmi oqarasuaammik imaluunniit akiliilluni oqarasuaammik atuinikkut siunnersortiminut attaveqarsinnaaneranut naammaginantumik periarfissinnissaa, immikkoortortaqarfimmi sulisut isumagissavaat.

§ 38-mut

Napparsimasumik siunnersortaasup suliassani isumagisinnaassagunigit napparsimasoq pillugu paasissutissanik naapertuuttunik, napparsimasumit namminermit pissarsiaannaanngitsunik pisariaqartitsivoq. Napparsimasulli nammineq kissaataasa nakorsanullu nipangiussisussaataitanerit ilanngullugit eqqarsaatigineqarnissaat pingaaruteqarpoq.

Napparsimasunut siunnersorti soorlu assersuutigalugu pinngitsaaliissummik iliuseqarnernik nalunaarsuiffimmi paasissutissanik, napparsimasoq akerliugaluarpalluunniit, atuarsinnaasaaq. Taamatut pisoqassappat allamik siunnersortitaartitsinikkut napparsimasup allamik isumataartinneqarsinnaanera pillugu, Dronning Ingridip Napparsimavissuani tarnikkut nappaatilinnut Immikkoortortaqarfianni nakorsaaneq paasiniaasariaqartassaaq, taamaassappallu tamatuminnga suliassanngortitsisinnaassalluni.

Paasissutissanut isertuussanut pissarsiarisartakkanut pissusissamisoortumik napparsimasunut siunnersortit Pisortat ingerlatsineranni suliassat suliarineqartarnerat pillugu Inatsisartut inatsisaat nr. 8, 13. juni 1994-imeersumi § 27-imi aamma Kalaallit Nunaanni pinerluttulerinermi inatsimmi nr. 306, 30. april 2008-meersumi § 50-imi maleruaqqusat naapertorlugit nipangiussisussaataitaapput.

Naak napparsimasoq nalinginnaasumik nammineq pillugu nalunaarsuiffimmi allattukkanik paasitinneqarnissaminut pisinnaatitaaffeqarluartoq, taava napparsimasumik siunnersortaasup nalunaarsuiffimmi allattukkanik paasitinneqarnissaanut napparsimasup akuersissuteqarnissaa piunasaqaataavoq.

§ 39-mut

Siunnersuummi § 39 naapertorlugu pinngitsaaliissummik iliuuseqarfigineqarneq siunnersuisoqartitsisoq taamaatinneqarpat, napparsimasumut siunnersuisutut atuunneq unitsineqassaaq. Napparsimasulli pinngitsaaliissummik iliuuseqarfigineqarsimanini naammagittaalliutiginiarneraa siunnersortip paasiniassavaa, taamaassappallu tamatuminnga ikiorlugu. Napparsimasumut siunnersortaasup naammagittaalliutit suliarineqarlutik aallartereersut naammassineqarnissaannut ikiuutissaaq.

§ 40-mut

Aalajangersakkami siunnersuutigineqartumi Naalakkersuisut pisinnaatitaapput ingerlatsinikut napparsimasunut siunnersortinik atorfinitsitsinermi aamma siunnersuisussanngortitsinermi, taakku suliassat aamma pisinnaatitaaffii sukumiinerusut aammattaaq akissarsiai pillugit sukumiinerusumik maleruaqqusaliornissaminut

Kapitali 10-mut

Naammagittaalliuteqarnissamut ilitsersuineq

§ 41-mut

Imm. 1-imut

Pisortat ingerlatsineranni suliassat suliarineqartarnerat pillugu inatsimmi § 25-mi naammagittaalliornissamut ilitsersuineq pillugu aalajangersagaq, taamaallaat aalajangiinernut allaganngorlugit nalunaarutigineqartunut atuuppoq. Taamaattorli pisortat ingerlatsineranni suliassat suliarineqartarnerat pillugu inatsimmi § 7 ilitsersuinissamut pisussaaffik nalinginnaasoq, pisariaqarpat aalajangiineq oqaasiinnakkut nalunaarutigineqaraluartoq, aamma maalaaruteqarnermi ilitsersuinissamik nassataqarpoq. Pisortat ingerlatsineranni suliassat suliarineqartarnerat pillugu inatsimmi § 7a naapertorlugu, aalajangiinerup kalaallisut imaluunniit danskisut pissarsiarinissaa napparsimasup pisinnaatitaaffigaa.

§ 41-mi aalajangersagaq erseqqissoq siunnersuutigineqarpoq, taanna naapertorlugu pinngitsaaliissummik sumilluunniit atuisoqartillugu, taava napparsimasooq aalajangiineq pillugu al-

lakkatigut naammagittaalliuteqarnissamut periarfissaqarneq pillugu ilitserorneqassaaq. Taamaalilluni napparsimasoq aalajangiinerup Tarnimikkut Nappaatillit Maalaarutaannik Aalajangiisartunut allaganngorlugu naammagittaalliutigisinnaaneranut ilitserorneqassaaq, tak. siunnersuummi § 47. Tamatuma saniatigut napparsimasoq ilitserorneqassaaq naammagittaalliutip kinguartitsisoqarnissaanut sunniuteqarsinnaanera pillugu.

Aalajangersakkami aalajangerneqanngilaq naammagittaalliuteqarsinnaanermut qaqugu ilitseruisoqassanersoq. Taamaattorli naammagittaalliuteqarsinnaanermut tamatigut ilitseruisoqartassaaq pinngitsaaliissummik iliuseqarnissamut aalajangernerup piviusunngortinnissaa sioqullugu, tassa tamatumani kinguartitsisoqarnissaanut sunniuteqarnissaq periarfissaappat, tak. § 41, imm. 3. Tamannalu atuuppoq napparsimavimmit angerlartinneqareernerup kingornatigut pinngitsaaliissummik malinnaaffiginninneq pillugu naammagittaalliutit, § 19 naapertorlugu.

Imm. 2-3-mut

Naammagittaalliuteqarnissamut periarfissamik atuneq kinguartitsisoqarsinnaaneranut nalinginnaasumik sunniuteqanngilaq, tak. siunnersuummi § 41, imm. 2. Taamaattorli pinngitsaaliissummik katsorsaasoqartillugu immikkut maleruaqqusaq atuuppoq, tak. inatsissatut siunnersuummi § 41, imm. 3. Tassani naammagittaalliorneq kinguartitsinissamut nalinginnaasumik sunniuteqarpoq, imaangippat katsorsaanerup ingerlanneqarnissaata ingerlaannartumik aallartinneqarnissaa pisariaqarluni napparsimasup inuunerata imaluunniit peqqissusiata annertuumik navianartorsiortinnissaa pinngitsoorniarlugu, imaluunniit napparsimasoq allanik timaatigut imaluunniit peqqissusiatigut annertuumik navianartorsiortitsisinnaanera pinngitsoorniarlugu. Taamaalilluni piumasaqaataavoq allatut iliorsinnaajunnaarnikkut pinngitsaaliissummik nakorsaasoqarnissaata ingerlattariaqalerneranut, tassa napparsimasup imaluunniit napparsimasumut siunnersuisup pinngitsaaliissummik nakorsarneqarneq pillugu naammagittaalliummik saqqummiussisimappat. Taamaattorli navianartorsiornermut ersiut inuunermik navianartorsiortitsinerumut killeqaannanngilaq, tassami peqqissutsip ajornerulernissaata nalorninartorsiortinneqarsinnaanera aamma taaneqarmat taamaattumillu ilaatinneqarluni navianartorsiortitsinerup periataarsinnaanera nalilerneqarpat.

Tarnimikkut Nappaatillit Maalaarutaannik Aalajangiisartut aalajangiinissaat utaqqinagu pinngitsaaliissummik katsorsaanissamut periarfissaq taanna aammattaaq atuuppoq, naammagittaalliutip saqqummiunneqarnermini kinguartitsinissamut sunniuteqartutut nalilerneqarpat, kisiannili napparsimasup qanoq innera ajornerulersimalluni aalajangiisartut aalajangiinerata tiguineqarnera sioqullugu.

Pinngitsaaliissummik malittarineqarneq pillugu naammagittaalliuteqarneq § 19 naapertorlugu

taamatuttaa^q kinguartitsinissamut sunniuteqassaaq.

§ 42-mut

Imm. 1-imut 2-mut

Aalajangersarneqarpoq sapinngisamik naammagittaalliuuteqarnissamut ilitersuisoqassasoq pinngitsaaliissummik iliuuseqarnissaq pillugu napparsimasup ilisimatinneqarneranut atatillugu. Taamaattorli pinngitsaaliissummik nakorsaasoqarnerani naammagittaalliuuteqarnissamut ilitersuisoqassaaq pinngitsaaliissummik nakorsaasoqarniarnerata aallartinnissaa sioqqullugu. Tamatumunnga pissutaavoq pinngitsaaliissummik nakorsaasoqarnera pillugu naammagittaliorneq kinguartitsisoqarnissaanut sunniuteqarnera aallaavigineqarmat, tak. § 41, imm. 3.

§ 43-mut

Imm. 1-imut 2-mut

Aalajangersakkami pinngitsaaliissummik iliuseqarnerit taaneqartut pillugit napparsimasoq Tarnimikkut Nappaatillit Maalaarutaannik Aalajangiisartunut iliuseqarneq pillugu naammagittaalliornissaminut periarfissaqartoq. Tamatuma saniatigut napparsimasoq piumasaqarnini naapertorlugu Tarnimikkut Nappaatillit Maalaarutaannik Aalajangiisartunut naammagittaalliorneq pillugu periuseq pillugu ilitsersorneqassaaq, aammattaaq napparsimasup aamma napparsimasumut siunnersortip aalajangiisartunut suliamik saqqummiussinissamut pisinnaatitaaffiat pillugu. Tamatuma saniatigut napparsimasoq piumasaqarnini naapertorlugu aalajangiisartut piffissaq killiussaaf pillugu ilitsersorneqassaaq.

Aalajangersakkami qulakkeerneqarpoq napparsimasut tamarmik naammagittaalliutitut suliasat tamarmik pillugit qanoq periuseqartarnerup ataatsimoortumik isiginnissinnaanerisa piumasaqaataat, tassani apeqqutaatinnagit napparsimasut ataasiakkaat isumalluutaasa qanoq ittuunerat.

§ 44-mut

Aalajangersakkami aalajangersarneqarpoq naammagittaalliuteqarsinnaanermut ilitsersuinerimi aallaaviussasoq tamatuma oqaasiinnartigut pinissaa. Taamatutaaq naammagittaalliornissamut ilitsersuut allaganngorlugu tunniunneqassaaq, pineqartup tamanna piumappagu.

§ 45-mut

Aalajangersakkami Naalackersuisut piginnaatinneqarput ingerlatsinikkut sukumiinerusumik maleruaqqusaliornissaminut qaqugu aamma kimit ilisimatitsisoqarnissaanut tunngatillugu, aammattaaq pinngitsaaliissummik iliuseqartoqarneranut atatillugu naammagittaalliuteqarnissamut ilitsersuinerimut atatillugu.

*Kapitali 11**Naammagittaalliornissamut periarfissaq aamma
eqqartuussivikkut ingerlatitsisinnaaneq**§ 46-mut***Imm. 1-imut - 2-mut**

Kalaallit Nunanni napparsimasut naammagittaalliutaannik aalajangiisartunik eqqartuussissuserisumik, Nunatsinni Nakorsaanermik aamma napparsimasut peqatigiiffiannit tarnimikkut napparsimasunut sinniisumik ilaasortalimmik pilersitsisoqarnissaa, aalajangersakkami siunnersuutigineqarpoq. Naalakkersuisut naammagittaalliuuteqarnermut aalajangiisartut pilersisavaat.

Siulittaasup (eqqartuussissuserisup) napparsimasup pisinnaatitaaffiisa eqquutsinneqarnissaat qulakkiissavaa, kisianni nalinginnaasumik paasinninneq tunngavigalugu napparsimasumut eqqartuussissuserisuunngilaq. Nunatsinni Nakorsaanerup ilinniagaqassuseq tunngavigalugu peq-qinnissakkut sullissisut sinniisuuffigissavai. Tarnimikkut napparsimasunut sinniisooq soorlu assersuutigalugu Tarnimikkut eqqarsartaatsimikkullu nappaateqartut qanigisaasa peqatigiiffiannit Sugisaq toqqarneqarsinnaavoq.

Imm. 3-4-mut

Ilaasortat aamma sinniisussat ukiuni sisamani atasussatut toqqarneqassapput. Taamaalillutik ilaasortat aalajangiisartut sulineranni misilittagaqalersinnaapput. Akerlianik periarfissaqarpoq toqqaasoqarnerani tulliuttumi naaggaarnissaminut periarfissaqarpoq, tamanna ilaasortap kissaatigiguniuk. Ilaasortat namminneq aamma Naalakkersuisup tamanna kissaatigippagu.

Imm. 5-imut

Napparsimasut naammagittaalliutaannit aalajangiisartut Naalakkersuinut attuumassuteqannginnerat erseqqissarniarlugu oqaatigineqarpoq, suliat ataasiakkaat oqaluserineqarneranni aamma aalajangiiffigineqarneranni aalajangiisartut ilitsersuinernut attuumassuteqanngitsut.

Imm. 6-imut

§ 46, imm. 6-imi ersersinneqarpoq Nunatsinni Nakorsaaneqarfiup Tarnimikkut Nappaatillit Maalaarutaannik Aalajangiisartut allatseqarnikkut isumagisassarai. Nunatsinni Nakorsaaneqarfik, Sundhedsvæsenets Disciplinærnæv n i Danmark, timikkut nappaatit pillugit naammagittaalliutitut tunngatillugu, allatseqarfioreerpoq, taamaattumik pissusissamisoorpoq pinngitsaaliissummik atuinermut naammagittaalliutit pillugu allatseqarfik aamma tassaniippat.

Imm. 7-imut

Peqqissutsimut Naalackersuisoqarfiup aalajangiisartut ingerlatsinerannut aningaasartuutit, tamatumunnga ilanngullugit aalajangiisartuni ilaasortat ajunngitsorsiaat, akilertassavai.

Tamakku saniatigut immikkoortoq 2.12-mi oqaaseqaatit nalinginnaasut innersuussutigineqarput.

§ 47-mut**Imm. 1-imut**

Aalajangersakkami siunnersuutigineqarpoq napparsimavinni oqartussaasut pinngitsaaliissummik atuinernut naammagittaalliutit tamaasa Tarnimikkut Nappaatillit Maalaarutaannik Aalajangiisartunut ingerlatitsisarnissaat. Naammagittaalliut napparsimasumit namminermit imaluunniit napparsimasumik siunnersuisartumit pisinnaapput.

Napparsimavinni oqartussaasut tassaapput napparsimavissuarmi/napparsimavimmi imaluunniit peqqissaavimmi napparsimasup uninngaffigisimasaani imaluunniit uninngaffigisaani oqartussaasut. Peqqinnissaqarfiup ingerlatsiviata pisussaaffigaa naammagittaalliutip Tarnimikkut Nappaatillit Maalaarutaannik Aalajangiisartunut saqqummiunneqarnissaa, taassuma peqqinnissaqarfimmi sulisunut tunniunneqarata imaluunniit saqqummiunneqarnerata kinguninguatigut. Peqqinnissaqarfiup ingerlatsiviata, aalajangiisartut allattaa paasisutissat piumasai tamaasa, tunniutissavai. Periaaseq naleqquttoq tassaavoq paasisutissat katersorneqassapput Peqqissutsimut Pitsaaliuinernullu Aqutsisoqarfimmut nassiunneqarlutik, tassangaanniit Tarnimikkut Nappaatillit Maalaarutaannik Aalajangiisartunut ingerlateqqinneqarlutik.

Imm. 2-mut

§ 47 imm. 2-mi naammagittaalliornissamut kingusinnerpaamik piffissarititaasoq pisup naammagittaalliutigisap pineraniit qaammatinut arfinilinnut killileqarpoq. Kingusinnerpaamik piffissaliussaq taanna aalajangiunneqarpoq taamaangippat napparsimasup aamma peqqinnissaqarfimmi sulisut, pinngitsaaliissummik atuinermut suna tunngaviusimanersoq pillugu paasisutissanik tunniussisinnaanerat ajornarsinnaammat. Naak pinngitsaaliissut pillugu nalunaarsuiffimmut aamma peqqissutsimut paasisutissanut allatuiffimmut allattuisoqaraluartoq, pisoq pillugu immikkuualuttui tamaasa ilanngullugit allanneqartanngillat. Taamatuttaaq kingusinnerpaamik piffissaliussaq aalajangerneqarneranut tunngaviuvoq napparsimasup naammagit-

taalliteqarnermut ingerlanerani napparsimasunik siunnersuisumik pisariaqartumik tapersersorneqarnissaa eqqarsaatigalugu, taassuma isumagissavaa naammagittaalliutip sapinngisamik pilertortumik suliarineqarnissaa.

§ 48-mut

Imm. 1-imut

§ 48-mi aalajangersagaq Tarnimikkut Nappaatillit Maalaarutaannik Aalajangiisartut suliassaminnik ingerlatsinerannut maleruaqqusanik ilaqarpoq. Peqqissutsimut Pitsaaliuinemullu Aqutsisoqarfiup suliassaq Tarnimikkut Nappaatillit Maalaarutaannik Aalajangiisartunut saqqummiutissavaa. Tamannali imatut paasineqassanngilaq napparsimasoq imaluunniit napparsimasunik siunnersuisartuq toqqaannartumik Aqutsisoqarfimmut naammagittaalliummik saqqummiussissasoq. Napparsimasup imaluunniit napparsimasunik siunnersuisartup naammagittaalliut immikkoortorta q nakorsaannut, peqqissaasuinut aamma peqqissutsimik sullissisunut allanut napparsimasunik katsorsaannermut peqataasunut tunniussinavaat. Immikkoortortami nakorsaasut, peqqissaasuusut imaluunniit peqqissutsimik sullissisut allat tamatuma kingornatigut pisussaaffeqarput sapinngisamik piaartumik tamanna Peqqissutsimut Pitsaaliuinemullu Aqutsisoqarfimmut ingerlateqqissallugu. Soorunami aammattaaq napparsimasoq imaluunniit napparsimasunik siunnersuisoq periarfissaqarput soorlu assersuutigalugu pinngitsaaliissummik iliuseqarfigineqarnermut naammagittaalliut Tarnimikkut Nappaatillit Maalaarutaannik Aalajangiisartunut saqqummiussinallugu.

Peqqissutsimut Pitsaaliuinemullu Aqutsisoqarfiup aalajangiisartut oqartussaassuseqarfiannut tunngasumik naammagittaalliortoqarsimasoq paasiguniuk, taava suliassanut tunngassut taakkununga ilanngullugu naammagittaalliutigineqartup allannera, kiisalu Dronning Ingridip Napparsimavissuani tarnikkut nappaatilinnut Immikkoortorta qarfiani nakorsaannerup aamma/imaluunniit nunap immikkoortuani pineqartumi nakorsap uppersaana Tarnimikkut Nappaatillit Maalaarutaannik Aalajangiisartunut nassitissavai. Aalajangiisartut paasissutissanik amerlanerusunik kissaateqarunik tamatumunnga aalajangiisartut namminneq iliuseqasapput. Soorlu assersuutigalugu tassaasinnaapput nakorsamit paasissutissanut ilassutissat imaluunniit immikkoortorta qarfip peqqissutsimik sullissisuinit oqaaseqaatit.

Suliamut tunngatillugu illuatungeriit tassaapput sumiiffimmi peqqinnissaqarfimmi oqartussasut aamma napparsimasoq. Naammagittaalliteqarnermi pinngitsaaliissummik atuneq kisimi pineqarnani kisianni aammattaaq peqqissutsimik sullissut peqataasimasut ilanngunneqarlutik, taava taakku aammattaaq naammagittaalliteqarnermi suliassanut illuatungiussapput.

Imm. 2-mut

Napparsimasup aamma napparsimasunut siunnersuisut oqaasiinnakkut imaluunniit nalunaarasuartaatikkut atassuteqarneq atorlugu suliaq aalajangiisartunut saqqummiussinavaat, tak. § 48, imm. 2. Napparsimasoq nammineq ornigulluni peqataaniaruni angerlartinneqareersimaguni, Tarnimikkut Nappaatillit Maalaarutaannik Aalajangiisartunut Nuummot angalanissani nammineq aaqqissuutissavaa aningaasartuutigalugulu. Napparsimasup nalunaarasuartaatikkut atassuteqarneq atorlugu attaveqarnissani kissaatigippagu, sumiiffimmi peqqinnissaqarfiup immikkoortorta Skype assigisaaluunniit atorlugu attaveqarnissamut ikiuussinavaoq. Napparsimasoq Dronning Ingridip Napparsimavissuani suli uninngappat, taava naatsorsuutigineqasaaq Aalajangiisartut napparsimavissuarmi ataatsimiinnissaat. Napparsimasoq suliap Aalajangiisartuni suliassanngortinneqarnerata nalaani peqqinnissaqarfiup immikkoortuisa arlaanniikkuni, sumiiffimmi tassani nalunaarasuartaatikkut attaveqaataasut atorsinnaavai.

Immikkut ittunik pisoqartillugu napparsimasoq suliassap Aalajangiisartuni oqaluuserineqarnerani tamakkiisumik ilaannakortumilluunniit peeqataatinneqanngitsoorsinnaavoq, tak. § 48, imm. 2, oqaaseqatigiit aappaat. Taamaattoqarpat napparsimasup peqataatinneqannginnerata taamaalilluni tunngavilersorluagaanissaa piumasqaataavoq.

Peqqinnissaqarfimmi oqartussaasunut sinniisuutitaasup, immikkoortortaqarfimmi nakorsaa-neq, aammattaaq peqqinnissakkut sullissisut allat pineqarsinnaapput taakku suliamikkut naammagittaalliornermut attuumassuteqarunik napparsimasutulli, Tarnimikkut Nappaatillit Maalaarutaannik Aalajangiisartunit naammagittaalliutip oqaluuserineqarnerani najuunnissamut aamma peqataanissamut pisinnaatitaaffeqarput.

Illuatungeriit najuunnermikkut aamma suliamut tunngatillugu pisut saqqummiunneqarnerini peqataanissamut pisinnaatitaaffeqarnerisa kinguneraa, taakku nassuiaatinik pissutsit pillugit, Tarnimikkut Nappaatillit Maalaarutaannik Aalajangiisartut nalilersugaannut tunngasunik saqqummiussisinnaapput. Aalajangiisartut taamatuttaaq peqqissutsimik sullissisut attuumassuteqartut allat qinnuigisinnaavaat Aalajangiisartunut nassuiaassummik saqqummiusseqqullugit. Nassuiaassutit sukkulluunniit inatsisit tunngavigalugit eqqortumik oqaluttussaataa-nermik tunngaveqartinneqanngillat.

Tarnimikkut Nappaatillit Maalaarutaannik Aalajangiisartut ataatsimiinneri tamanut ammasuussanngillat aamma Aalajangiisartuni ilaasortat nipangiussisussaataa-pput.

Imm. 3-mut

Aalajangersakkap nassatarisaanik Tarnimikkut Nappaatillit Maalaarutaannik Aalajangiisartut pinngitsaaliissummik iliuseqarfigineqarneq aamma napparsimavimmit angerlareernerup kingornatigut pinngitsaaliissummik malinnaaffiginninnermut tunngasunut naammagittaalliutitut suliassanngortinneqarsimasunik, kinguartitsinissamut sunniuteqartunik aalajangiisartussaapput, tak. § 41, imm. 3, naammagittaalliutip tiguneqarnerata kingornatigut ullut arfineq marluk qaangiutsinnagit aalajangiisoqassaaq. Suliassanut allanut tunngatillugu Aalajangiisartut sapinngisamik pilertortumik aalajangiissapput. Tamatuma kingunerisaanik nalinginnaasumik piviusumik naammagittaalliutip tiguneqarneranit ullut 14-it nallertinnagit. Ullunik 14-inik killilii-neq qaqutigunnaq eqquutsinneqanngikkaluarpat Aalajangiisartut napparsimasoq aamma napparsimasumik siunnersuisartoq tamatumunnga patsisaasoq pillugu ilisimatissavaat, kiisalu aalajangiinerup qaqugu pisinnaaneranut tunngatillugu.

Aalajangiisartut aalajangigaat pinngitsaaliissummik iliuseqarsimanerup akuerineqarneranit imaluunniit iliuseqarnerup eqqunngitsuusimaneramik, soorlu assersuutigalugu inatsimmi taamatut iliortoqarnissaanut piunasaqaataasut naammassineqarsimanngippata, inerineqarsinnaapput. Naammagittaallimmi iliuserineqarsimasoq kisimi pineqarsimanngippat kisianni aammattaaq peqqissutsimut sullissisut, taamatut pinngitsaaliissummik iliuseqarsimanerup peqataasimasut pineqarlutik taava tamatumunnga ilutigitillugu Aalajangiisartut isummerfigissavaat, pineqartut/peqartup isornartorsiorneqarnissaanut tamanna tunngavissaqarneris.

Immikkut pinngitsaaliissummik iliuseqarneq § 14 naapertorlugu aamma angerlartinneqareernerup kingornatigut pinngitsaaliissummik malinnaaffiginninnermut § 19 naapertorlugu oqaatigineqassaaq, Aalajangiisartut piginnaatitaanerit iliuseqarnerup piunasaqaataasut ilumut eqquutsinneqarsimanerisa misissuinerup killilerneqanngilaq, tak. § 14, imm. 1, aamma § 19, imm. 1, kiisalu pinngitsaaliissummik katsorsaanerup tunngatillugu pinngitsaaliissummik atornerqartumik naliliinerup, tak. § 14, imm. 2, naggatit aappaat. Aalajangiisartut taamatuttaaq aalajangersaasinnaatitaapput katsorsaanerup nakorsap atugarisimasaanut, tamatumunnga ilanngullugit nakorsaat toqqarneqartoq aamma qanoq annertutigisumik atuisimanerup tunngatillugu, tak. § 14, imm. 4, aamma § 19, imm. 4, aamma § 5.

Tamakku saniatigut siunnersuummi § 41, imm. 3 malugeqquneqarpoq, taanna naapertorlugu pinngitsaaliissummik katsorsaanerup aallartinnera sioqqullugu naammagittaalliut saqqummiunneqarpat, tamatuma kingunerissavaa iliuserisap aalajangiisartut aalajangiinissaata tungaa-

nut kinguartinneqarnera, imaanngippat nakorsarneqarnissap ingerlaannartumik aallartinneqarnissaa pisariaqarluni ilaatigut napparsimasup inuunerata imaluunniit peqqissusiata malunnaateqarluartumik navianartorsiornissaa pinngitsoorniarlugu.

Aalajangiisartut pisinnaatitaaffiisa avataaniipput naammagittaalliutit nakorsartinnermut tunngasut, tassani pinngitsaaliissummik iliuseqarnerit atorneqarsimanngippata. Naammagittaalliutit taamaattut Peqqinnissaqarfiup aqunneqarnera, aqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. november 2010-meersumi maleruaqqusat naapertorlugit suliarineqartarput.

Imm. 4-mut

§ 48, imm. 4-mi Naalakkersuisut pisinnaatinneqarput Tarnimikkut Nappaatillit Maalaarutaannik Aalajangiisartut suleriaasissaannik aalajangersaanissamut. Aalajangiisartuni sulianik ingerlatsineq tassani nassuiaaserneqassaaq.

§ 49-mut

Imm. 1-imut - 4-mut

Tarnimikkut Nappaatillit Maalaarutaannik Aalajangiisartut napparsimasup imaluunniit napparsimasumik siunnersuisup qinnuteqarneratigut aalajangiinerit taaneqartut Kalaallit Nunaanni Eqqartuussivimmut suliassanngortissavai, Kalaallit Nunaanni pinerluttulerinermi inatsimmi kapitali 28-mi maleruaqqusat naapertorlugit.

Pinerluttulerinermi inatsimmi kapitali 28 immikkut pilertortumik aamma napparsimasumut pisariitsumik eqqartuussivimmi misiliinissamut periarfissiivoq. Aalajangiineq nammineersinnaajunnaarsinneqarnermut tunngasoq iliuuserisaq imatut annertutigaaq inatsisitigut isumannaatsuutitsinissaq pissutigalugu eqqartuussivimmi misilittariaqarluni. Eqqartuussivikkut misiliineq immikkut ittuummat suliassaq eqqartuussivimmit sapinngisamik piaarnerpaamik suliarineqassaaq.

Siunnersuummi imm. 2 naapertorlugu suliap Kalaallit Nunaanni Eqqartuussivimmut tunniunneqarnissaanut Tarnimikkut Nappaatillit Maalaarutaannik Aalajangiisartut aalajangereernerisa kingornatigut sapaatit akunnerisa sisamaanissaat aallaaviuvoq. Piffissarititaasoq suliap sapinngisamik pilertortumik eqqartuussivimmut suliassanngortinneqarnissaanut tapertassaaq. Taamaallilluni napparsimasup aammattaaq pisimasoq eqqaamalluarsinnaavaa suliap qanoq ingerlasimanerata qulaajarneqarneranut atatillugu.

Tamatumunnga ilutigitillugu pisariaqarpoq immikkut ittumik pissutissaqartillugu kingusinnerpaamik piffissarititaasup saneqqunneqarsinnaanera, taamaaliornikkut napparsimasoq pinngitsaaliissummik iliuseqarsimanerup inatsimmik unioqqutitsinertaqarsimannginneranik misilinnissaminut periarfissaajarneqassanngimmat, naak naammagittaalliut sapaatit akunnerisa sissamat qaangiutereersut tunniunneqaraluartoq. Taamaattumik immikkut tunngavissaqarpat Kallaallit Nunaanni Eqqartuussivimmi eqqartuussisup qaqtiguugaluartoq akuersissutigisinnavaa Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit angullugit naammagittaalliutip tunniunneqarsinnaanera. Naammagittaalliut Tarnimikkut Nappaatillit Maalaarutaannik Aalajangiisartut aalajangeereernerisa kingornatigut qaammatit arfinillit qaangiutereersut tunniunneqarpat naammagittaalliut suliarineqarsinnaassanngilaq.

§ 49, imm. 3-mi allassimavoq Napparsimasut Maalaarutaannik Aalajangiisartut napparsimasup nammineersinnaatinneqarnissaa akuerippassuk, angerlartinneqarnissamut apeqqut aalajangiisartut aalajangiinerisa kingornatigut qaammatit marluk qaangiutereerpata, aatsaat tamanna Tarnimikkut Nappaatillit Maalaarutaannik Aalajangiisartunut nutaamik oqaluusereqqullugu qinnuteqaatigineqarsinnaavoq. Apeqqutip nammineersinnaajunnaarsinneqarnermut tunngasup unioqqutitsinerunnginnera eqqartuussivimmut ingerlatinneqarsimappat, tak. imm. 1, piffissalissaaq taaneqartoq eqqartuussiviup aalajangiineranit aallartittutut isigineqassaaq.

Unioqqutitsisumik nammineersinnaajunnaarsinneqarnermut oqartussaasunit taarsiiffigineqarnissamut piomasaaqat tunngavigalugu eqqartuussivimmi suliaqarnermi aalajangiiffigineqassaaq, nammineersinnaajunnaarsinneqarnermut unioqqutitsinerusimannginnera pillugu, tak. pinnerluttulerinermi inatsimmi § 292-imi maleruaqqusat.

Tamakku saniatigut naammagittaalliornissamut periarfissanut il.il. tunngatillugu immikkoortoq 2.12-mi oqaaseqaatit nalinginnaasut innersuussutigineqarput.

Kapitali 12
Atuutsitsilernermut, atorunnaarsitsinermut aamma
ikaarsaariarnermut aalajangersakkat

50-imut

Imm. 1-imut

§ 50-imi aalajangersakkami qaammatisiutit ulluat atuutilersitsiffiusoq allanneqarpoq kiisalu ikaarsaariarnermi aalajangersakkatut siunnersuutigineqarput, maleruaqqusat nutaat tamarmik aalajangiinernut atuutsineqassasut, tassa qaammatisiutit ulluata atuutilerfiusup kingornatigut, tamatuma akerlianik aalajangiinerit pisoqaanerusut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq naapertorlugu nalilersorneqassapput.

Qaammatisiutit ulluat atuutilerfissatut 1. juli 2019 aalajangiunneqarpoq.

Imm. 2-mut

§ 50, imm. 2 naapertorlugu inatsisip atuutilerneratigut Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq atorunnaarsinneqarpoq.

Imm. 3-mut

Nalunaarutit aamma maleruaqqusat allat Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut Inatsisissaat nr. 24, 3. december 2012-imeersoq, kiisalu Inatsisartut Inatsisissaat nr. 12, 3. juni 2015-imeersumi allangortinneqarsimasoq tunngavigalugit aalajangersarneqarsimasut aamma atuutsinneqarsimasut, atorunnaarsinneqarnissamik tungaannut atuutiinnassapput.